

श्री

आगम सुधाजिबुं



विभाग : १/२

संपादक: संशोधकश्च

प्र. पन्थास श्री जिनेन्द्रविजयजी गणिवर

श्री हर्षपुष्पामृत जैन ग्रन्थमाला-ग्रन्थाङ्कः-६४

श्री महावीर जिनेन्द्राय नमः ।

तपोमूर्ति पूज्याचार्यदेवश्रीविजयकर्पूरसूरिगुरुभ्यो नमः ।

हालारदेशोद्धारक-पूज्याचार्यदेवश्रीविजयामृतसूरिगुरुभ्यो नमः ।

पञ्चम-गणधर श्रीमत्सुधर्मस्वामि-निर्मितं

श्रीमत्सूत्रकृतांग-सूत्रम्

प्रथममङ्गलम् ।

(मूलम्)

卐

संपादकः संशोधकश्च

तपोमूर्ति-पूज्याचार्यदेवश्रीमद्विजयकर्पूरसूरीश्वर-पट्टालङ्कार-हालारदेशोद्धारक-

कविरत्न-पूज्याचार्यदेवश्रीमद्विजयामृतसूरीश्वर-विनेयः

पंन्यास-श्री-जिनेन्द्रविजय-गणी

卐

प्रकाशिका-

श्री हर्षपुष्पामृत जैन ग्रन्थमाला

लाखाबावल-शांतिपुरी (सौराष्ट्र)

प्रकाशिका—श्री हर्षपुष्पामृत जैन ग्रन्थमाला
लाखाबावल-झांतिपुरी (सौराष्ट्र) गुजरात



बीर सं० २५०१]

विक्रम सं० २०३१

[सन् १९७४

आ आगमना अधिकारी योगवाही गुरुकुलवासी
सुविहित साधु महाराजो छे,

मूल्य रु. १०--००



मुद्रकः—
ज्ञानोदय प्रिन्टिंग प्रेस
पिण्डवाडा (राजस्थान)
(भावा-दिलोही रोड)

प्रकाशकीय निवेदन

अमारी ग्रन्थमाला तरफथी आ श्री सूत्रकृतांगसूत्र मूल प्रगट करता आनंद अनुभवीए छीए । हालमां ४५ आगम मूल अने केटलाक आगम टीका सहित प्रगट करवानुं काम शुरू करतां आ सूत्र नागरी लिपिमां मोटा टाइपमां प्रगट करेल छे ।

आ ग्रन्थनुं संशोधन संपादन हालारदेशोद्वारक कविरत्न स्व. पू० आचार्यदेव श्रीमद्-विजयअमृतसूरीश्वरजी महाराजना शिष्यरत्न पू० पंन्यास श्री जिनेन्द्रविजयजी गणिवरे षणी खंत भी करेल छे ।

कागळ छपाइ आदिना भाव बधवाने कारणे खर्च धार्या करतां बधु आवे छे । मोटा टाइपमां मुद्रित करतां पेज बधारे थाय छे । परंतु टकवानी अने अभ्यासनी दृष्टिए अनुकूलता रहेसे ।

आगम सूत्रोना अधिकारी योगवाही गुरुकुलवासी सुविहित मुनिओ छे । ए शास्त्रविधि मुजब पूज्य श्रमणसंघमां आगम वांचनादिमां अनुकूलता थाय ते रूप आ श्रुतभक्ति करतां अमे आनंद अनुभवीए छीए ।

श्री आचारांग सूत्रादि मूल सूत्रो प्रगट भइ रहयां छे । श्रीआचारांग सूत्र तैयार थई गयुं छे । श्रीस्थानाङ्गसूत्रनुं मुद्रण काम चालु छे । एज रीते सटीक आगमोमां श्रीमदन्तकृदक्षा, श्रीमदन्तरोपपातिकदक्षा अने श्रीमदूपासकदक्षा सूत्र तैयार थई गयां छे ।

बीर संवत् २१०१
षि० सं० २०३१
पोष सुब-२ मंगलवार
ता. १४-१-७५

लि:-

नेमचंद्र बाघजी गुहका
नवीनचंद्र बाबुलाल शाह

ॐ अनुक्रमणिका ॐ

प्रथमः श्रुतस्कन्धः

अध्ययन क्रमः नाम	पृष्ठ	अध्ययन क्रमः नाम	पृष्ठ
१ समय (उद्देशा-४)	१४१	९ धर्म	१७१
२ वैतालीय (उद्देशा-३)	१४६	१० समाधि	१७३
३ उपसर्गपरिज्ञा (उद्देशा-४)	१५२	११ मार्ग	१७५
४ स्त्रीपरिज्ञा (उद्देशा-२)	१५२	१२ समवसरण	१७८
५ नरकविभक्ति (उद्देशा-२)	१६१	१३ याथातथ्य	१७९
६ वीरस्तुति	१६५	१४ ग्रन्थ	१८१
७ कुशीलपरिभाषा	१६७	१५ आदानीय	१८३
८ वीर्य	१६६	१६ गाथा	१८५

द्वितीयः श्रुतस्कन्धः

अध्ययन क्रमः नाम	पृष्ठ	अध्ययन क्रमः नाम	पृष्ठ
१ पौण्डरीक	१८६	५ आचारश्रुत	२३६
२ क्रियास्थान	२०२	६ आर्द्रकीय	२३८
३ आहारपरिज्ञा	२२२	७ नालन्दीय	२४२
४ प्रत्याख्यान	२३२		



॥ शुद्धिपत्रकम् ।

५

पृष्ठं	पंक्तिः	अशुद्धं	शुद्धं	पृष्ठं	पंक्तिः	अशुद्धं	शुद्धं
१४१	२२	सिब	सिया	१६६	१३	रप्त	रत्त
१४३	८	तुमं दे	तु मंदे	२०५	१३	चिंतासोगरसं पविट्ठे	चिंतासोगसा- गरसं पविट्ठे
१४८	१८	सोउण	(सोउण)	२०६	१	मणी	माणी
१५४	१८	वत्त	वत्तया	२०७	१	नियट्टइ	ण नियट्टइ
१५६	१३	अन्नपागाय	(अन्नपागाय)	२१२	२०	अन्नेवि	देवजीवणिज्जे खलु अयं पुरिसे, अन्नेवि
१७१	५	सवाहट्टु	समाहट्टु	२१४	७	सव्वाओ-	वे वार छे ते एक
१७६	१	(इत्ताव एव	(इत्ताव एव)			जावज्जीवाए,	वार जाणवुं
१७७	१२	अइमाणं च,	अइमाणं च मायं च	२१७	१	सुद्ध हियवा-	”
१७७	१७	बुद्धे	बुद्धे			खगविसाणं व	
१८०	१६	मेवइ	सेवइ	२३४	२१	णवकम्मे	पावकम्मे
१८६	१७	कुसलेपं डित्ते	कुसले पंडिते	२४२	११	पुरिसे	से पुरिसे
१८८	४	णिन्सने	णिसन्ने				
१९०	२	मणुस्सिते	मणुस्सिंदे				
१९१	२	कडुएति	कडुएति				



॥ श्री हर्षपुष्पामृत जैन ग्रन्थमाला ॥

लाखाबावल-शान्तिपुरी (हालार) सौराष्ट्र

ग्रंथांक	ग्रन्थनुं नाम	मूल्य रू० पैसा	ग्रंथांक	ग्रन्थनुं नाम	मूल्य रू० पैसा
(१)	दीक्षानुं सुंदर स्वरूप	१-५०	(३६)	अक्षय तृतीया [सचित्र]	०-३५
(२)	विधियुक्त पोषवविधि	१-३५	(३७)	कार्तिक पूर्णिमा महिमा	०-२५
(३)	स्वाध्याय सुधारस (नूतन सज्जायो)	०-५०	(३८)	छन्दोमूतरसः	०-३०
(४)	स्तवनामृत संग्रह	१-५०	(३९)	समेतशिखर तीर्थवंदना	०-१६
(५)	जिनेन्द्र भक्ति भावना (त्रीजी आवृत्ति)	१-००	(४०)	नारकी चित्रावली [त्रीजी भावृत्ति]	८-००
(६)	चतुर्विंशति जिन चैत्यवन्दनादि	०-५०	(४१)	शत्रुञ्जय-तीर्थवंदना (बीजी आवृत्ति)	०-२०
(७)	नवस्मरणादि स्तोत्र संग्रह	१-००	(४२)	मक्तामर सौरभ (महिमा कथाभो)	१-२५
(८)	जयविजय कथानकम्		(४३)	नारकी चित्रावली (हीन्दी)	६-००
(९)	श्री लेखामृत संग्रह भा. १		(४४)	मनोहर स्वाध्याय सौरभ (उत्तरा- ध्ययन मूल)	१-७५
(१०)	सद्गुरुवन्दन चैत्यवन्दन		(४५)	महामंत्र प्रभाव	०-८०
(११)	चौद नियम धारवाणी बुक	०-२०	(४६)	श्री नमस्कार पद स्तवना	०-२०
(१२)	लेखामृत संग्रह भा. २	१-००	(४७)	वार्ता विहार	१-००
(१३)	जिनेन्द्र भक्तिमुधा (आवृत्ति त्रीजी)	१-७५	(४८)	सत्कर्म चित्रावली (बीजी भावृत्ति)	प्रेसमां
(१४)	सोम भीम कथा तथा तपोमूर्ति पू. आ. श्री विजय कर्पूरसूरिजी म. नुं जीवन चरित्र	०-५०	(४९)	कल्मसूत्र पूजा व्याख्यान (सचित्र)	३-५०
(१५)	संक्षिप्त श्राद्धधर्म प्रथम भाग	२-५०	(५०)	पू बापजी म० नो खुलासो	०-२०
(१६)	स्नात्रपूजा स्तवनादि	०-२५	(५१)	कुलभूषण (सचित्र कथा)	२-००
(१८)	श्री लेखामृत संग्रह भा. ३	०-५०	(५२)	लक्ष्मी सरस्वती संवाद	०-५०
(१९)	होलिका व्याख्यान	०-२०	(५३)	श्री आचारांगं मूलं (मोटा टाइप)	१०-००
(२०)	मगल कलश कथा	०-३०	(५४)	सुनंदा रूपसेन	०-५०
(२१)	प्रभु महावीर देव	०-२५	(५५)	पारसमणि- (वार्तासंग्रह)	१ २५
(२२)	नित्यनोंध	०-२०	(५६)	जन्म पत्रिका रजिस्टर (३०० कुंडली माटे)	४-००
(२३)	वे प्रतिक्रमण सूत्रो	०-५५	(५७)	धनंजय नाममाला	१-७५
(२४)	श्री विविध पूजामृत संग्रह	३-००	(५८)	जिनेन्द्र संगीतमाला	३-५०
(२५)	महात्मा मत्स्योदर	०-३०	(५९)	अनेकार्थ संग्रह सटीक भाग १ लो	१०-००
(२६)	श्री लेखामृत संग्रह भा. ४	०-७५	(६०)	जयशंखेश्वरनाथ	१-००
(२७)	" " भा. ५	०-७५	(६१)	चैत्री पूणिमानो महामहिमा	०-६०
(२८)	" " भा. ६	०-७५	(६२)	श्रीमदन्तकृष्टशांगं श्रीमदनुत्तरोपपा- तिदशाङ्गं सटीकञ्च	४-००
(२९)	श्री अमून गहंली संग्रह	१-००	(६३)	नवस्मरणानि गौतमस्वामिरासञ्च	२-००
(३०)	श्री जिनेन्द्र पूजा संग्रह	०-५०	(६४)	श्रीमत्सूत्रकृताङ्गं मूलम्	१०-००
(३१)	श्री जिनेन्द्र पूजा पोषूष	०-५०	(६५)	श्रीमदुपासकदशाङ्गं सटीकम्	५-००
(३२)	तिथिचर्चामां स्पष्टीकरण	०-२०	(६६)	श्रीमत्स्थानाङ्गं सूत्रं मूलम्	प्रेसमां
(३३)	सामायिक चैत्यवन्दनादि सूत्रो	०-५०	(६७)	श्रीमत्समवायांग सूत्रम् "	"
(३४)	महासती सुलसा	०-५०			
(३५)	शास्त्रदर्पण [पर्व आराधना अंगे प्रमाणो]	०-४०			

॥ अहम् ॥

गणधरदेव श्रीमत्सुधर्मस्वामिनिर्मितं

॥ श्रीमत्सूत्रकृताङ्गम् ॥

॥ अथ समयाख्ये प्रथमाध्ययने प्रथमोद्देशकः ॥

बुद्धिज्जति तित्त(तिकु)ट्टिजा, बंधणं परिजाणिया । किमाह बंधणं वीरो, किंवा जाणं तित्तट्टई ? ॥१॥ चित्तमन्तमचित्तं वा, परिगिज्भ किंसा-मवि । अन्नं वा अणुजाणाइ, एवं दुवखा ण मुच्चइ ॥२॥ सयं तिवायए पाणो, अदुवाऽन्नेहिं घायए । हरांतं वाऽणुजाणाइ, वेरं वड्ढइ अप्पणो ॥३॥ जस्सि कुले समुप्पन्ने, जंहिं वा संवसे नरे । ममाइ लुप्पई बाले, अराणो अराणोहि मुच्छिए ॥४॥ वित्तं सोयरिया चे, सव्वमेयं न ताणाइ । संखाए जीविअं चेवं, कम्मणा उ तित्तट्टइ ॥५॥ एए गंथे विउक्कम्म, एगे समणमा-हणा । अयागांता विउस्सित्ता, सत्ता कामेहि माणावा ॥६॥ संति पंच मह-ब्भूया, इहमेगेसिमाहिया । पुढवी आउ तेऊ वा, वाउ आगासपंचमा ॥७॥ एए पंच महब्भूया, तेब्भो एगोत्ति आहिया । अह तेसिं विणासेणां, विणासो होइ देहिणो ॥८॥ जहा य पुढवीथूभे, एगे नाणाहि दीसइ । एवं भो ! कसिणो लोए, विन्नू नाणाहि दीसइ (वड्ढइ) ॥९॥ एवमेगेत्ति जप्पंति, मंदा आरंभणिस्सिआ । एगे किञ्चा सयं पावं, तिच्चं दुवखं (तेणां तिच्चं) नियच्छइ ॥१०॥ पत्तेअं कसिणो आया, जे बाला जे अ पंडिआ । संति पिच्चा न ते संति, नत्थि सत्तोववाइया ॥११॥ नत्थि पुराणो व पावे वा, नत्थि लोए इतो वरे । सरीरस्स विणासेणां, विणासो होइ देहिणो ॥१२॥ कुब्बं च कारयं चेव, सव्वं कुब्बं न विज्जई । एवं अकारओ अप्पा, एवं ते उ पगब्भिआ १३॥ जे ते उ वाइणो एवं, लोए तेसिं कओ सिय ! । तमाओ ते तमं जंति, मंदा आरंभ-

निस्सिया ॥१४॥ संति पंच महब्भूया, इहभेगेसि आहिया । आयच्छट्टो पुणो
 आहु, आया लोगे य सासए ॥१५॥ दुहत्रो ण विणस्संति, नो य उप्पज्जए
 असं । सव्वेऽवि सव्वहा भावा, नियत्तीभावमागया ॥१६॥ पंच खंधे वयंतेगे,
 बाला उ खणजोइणो । अणणो अणारणो गोवाहु, हेउयं च अहेउयं ॥१७॥
 पुढ्वी आउ तेऊ य, तहा वाऊ य एगत्रो । चत्तारि धाउणो रूवं, एवमा-
 हंसु आवरे ॥१८॥ अणारमावसंतावि, अरणणा वावि पव्वया । इमं दरिस-
 णमावराणा, सव्वदुक्खा विमुच्चई ॥१९॥ ते णावि संधिं णच्चा णं, न ते
 धम्मवित्रो जणा । जे ते उ वाइणो एवं, न ते ओहंतराऽऽहिया ॥२०॥ ते
 णावि संधिं णच्चा णं, न ते धम्मवित्रो जणा । जे ते उ वाइणो एवं, न
 ते संसारपारगा ॥२१॥ ते णावि संधिं णच्चा णं, न ते धम्मवित्रो जणा ।
 जे ते उ वाइणो एवं, न ते गब्भस्स पारगा ॥२२॥ ते णावि संधिं णच्चा
 णं, न ते धम्मवित्रो जणा । जे ते उ वाइणो एवं, न ते जम्मस्स पारगा
 ॥२३॥ ते णावि संधिं णच्चा णं, न ते धम्मवित्रो जणा । जे ते उ वाइणो
 एवं, न ते दुक्खस्स पारगा ॥२४॥ ते णावि संधिं णच्चा णं, न ते धम्म-
 वित्रो जणा । जे ते उ वाइणो एवं, न ते मारस्स पारगा ॥२५॥ नाणा-
 विहाइं दुक्खाइं, अणुहोति पुणो पुणो । संसारचक्कवालंमि, मच्चुवाहिजरा-
 कुले ॥२६॥ उच्चावयाणि गच्छंता, गब्भमेस्संति णंतसो । नायपुत्ते महा-
 वीरे, एवमाह जिणोत्तमे ॥२७॥ इति बेमि ॥

॥ इति प्रथमाध्ययने प्रथमोद्देशकः ॥१-१॥

॥ अथ प्रथमाध्ययने द्वितीय उद्देशकः ॥

आघायं पुण एगेसिं, उववराणा पुढो जिया । वेदयंति सुहं दुक्खं,
 अदुवा लुप्पंति णात्रो ॥१॥ न तं सयं कडं दुक्खं, कत्रो अन्नकडं च
 णं ? । सुहं वा जइवा दुक्खं, सेहियं वा असेहियं ॥२॥ सयं कडं न

अराशोहिं, वेदयंति पुढो जिया । संगइअं तं तहा तेसिं, इहमेगेसि आहिअं
 ॥३॥ एवमेयाणि जंपंता, बाला पंडिअमाणिणो । निययानिययं संतं, अया-
 णांता अचुद्धिया ॥४॥ एवमेगे उ पासत्था, ते भुज्जो विप्पगब्भिया । एवं
 उवट्टि(पवट्टि)आ संता, ण ते दुक्खविमोक्खया ॥५॥ जविणो मिगा
 जहा संता, परितारोण वज्जिया । असंकियाइं संकंति, संकिआइं असंकिणो
 ॥६॥ परियाणियाणि संकंता, पासिताणि असंकिणो । अराणाणभयसंवि-
 ग्गा, संपलित्ति तहिं तहिं ॥७॥ अह तं पवेज्ज बज्जं, अहे बज्जस्स वा वए ।
 मुच्चेज्ज पयपासाय्यो (पयपासाई), तं तुमं दे ण देहए ॥८॥ अहिअप्पाऽहि-
 यपराणाणो, विसमंतेणुवागते । स बद्धे पयपासेणां, तत्थ घायं नियच्छइ ॥९॥
 एवं तु समणा एगे, मिच्छदिट्ठी अणारिया । असंकियाइं संकंति, संकिआइं
 असंकिणो ॥१०॥ धम्मपराणावणा जा सा, तं तु संकंति मूढगा । आरंभाइं
 न संकंति, अविअत्ता अकोविया ॥११॥ सब्बप्पगं विउक्कस्सं, सब्बं णुमं
 विहूणिया । अप्पत्तिअं अकम्मंसे, एयमट्ठं मिगे चुए ॥१२॥ जे एयं नाभि-
 जाणांति, मिच्छदिट्ठी अणारिया । मिगा वा पासबद्धा ते, घायमेसंति णंतसो
 ॥१३॥ माहणा समणा एगे, सब्बे नाणां सयं वए । सब्बलोगेऽवि जे पाणा,
 न ते जाणांति किंचण ॥१४॥ मिलक्खु अमिलक्खुस्स, जहा वुत्ताणुभासए
 ण हेउं से विजाणाइ, भासिअं तऽणुभासए ॥१५॥ एमवन्नाणिया नाणां,
 वयंतावि सयं सयं । निच्छयत्थं न याणांति, मिलक्खुव्व अबोहिया ॥१६॥
 अन्नाणियाणां वीमंसा, अराणाणो ण (नारो नो व) विनियच्छइ । अप्पणो
 य परं नालं, कुनो अन्नाणुसासिउं ? ॥१७॥ वणो मूढे जहा जंतू, मूढे
 गोयाणुगामिए । दोवि एए अकोविया, तिब्बं सोयं नियच्छइ ॥१८॥ अंधो
 अंधं पहं णितो, दूरमद्धाणु गच्छइ । आवज्जे उप्पहं जंतू, अदुवा पंथाणुगामिए
 ॥१९॥ एवमेगे णियायट्ठी, धम्ममाराहगा वयं । अदुवा अहम्ममावज्जे, ण
 ते सब्बज्जुयं वए ॥२०॥ एवमेगे वियक्काहिं, नो अन्नं पज्जुवासिया ।

अप्पणो य वियक्काहिं, अयमंजूहिं दूमई ॥२१॥ एवं तकाइ साहिंता, धम्मा-
 धम्मे अक्कोविया । दुक्खं ते नाइतुट्टंति, सउणी पंजरं जहा ॥२२॥ सयं
 मयं पसंसंता, गरहंता परं वयं । जे उ तत्थ विउस्संति, संसारं ते विउ-
 स्सिया ॥२३॥ अहावरं पुरक्खायं, किरियावाइदरिसणं । कम्मचिंतापणट्टाणं
 दुक्खखंघस्स वड्डणं (संसारस्स पवड्डणं) ॥२४॥ जाणं काण्णणाउट्टी, अबुहो
 जं च हिंसति । पुट्टो संवेदइ परं, अवियत्तं खु सावज्जं ॥२५॥ संतिमे तउ
 आयाणा, जेहिं कीरइ पावगं । अभिकम्मा य पेसा य, मणसा अणुजाणिया
 ॥२६॥ एते उ तउ आयाणा, जेहिं कीरइ पावगं । एवं भावविसोहीए,
 निव्वाणमभिगच्छइ ॥२७॥ पुत्तं पिया समारब्भ, आहारेज्ज असंजए ।
 भुंजमाणो य मेहावी, कम्माणा नोवलिप्पइ ॥२८॥ मणसा जे पउस्संति,
 चित्तं तेसिं ण विज्जइ । अणवज्जमतहं तेसिं, ण ते संबुड्चारिणो ॥२९॥
 इच्चेयाहि य दिट्ठीहिं, सातागारवणिस्सिया । सरणंति मन्नमाणा, सेवंती
 पावगं जणा ॥३०॥ जहा अस्साविणिं णावं, जाइअंधो दुरूहिया । इच्छई
 (इच्छिज्जा) पारमागंतुं, अंतरा य विसीयई ॥३१॥ एवं तु समणा एगे,
 मिच्छदिट्ठी अणारिया । संसारपारकंखी ते, संसारं अणुपरियट्टंति ॥३२॥

त्तिबेमि ॥ गाथायं ॥५६॥ इति प्रथमाध्ययने द्वितीयोद्देशकः ॥१-२॥

॥ अथ प्रथमाध्ययने तृतीयोद्देशकः ॥

जं किंचि उ पूइकडं, सट्ठीमागंतुभीहियं । सहस्संतरियं भुंजे, दुपक्खं
 चैव सेवइ ॥ १ ॥ तमेव अवियाणंता, विसमंसि अक्कोविया । मच्छा वेसा-
 लिया चैव, उदगस्सअभियागमे ॥ २ ॥ उदगस्स पभावेणं, सुक्कं सिग्घं तमिति
 उ(सुक्कंमि घातमिति उ) टंकेहि य कंकेहि य, आमिसत्थेहिं ते दुट्ठी ॥ ३ ॥
 एवं तु समणा एगे, वट्टमाणासुहेसिणो । मच्छा वेसालिया चैव, घातमेस्संति
 णांतसो ॥ ४ ॥ इणमन्नं तु अन्नाणं, इहमेगेसि आहियं । देवउत्ते अयं

लोए, बंभउत्तेति आवरे ॥ ५ ॥ ईसरेण कडे लोए, पहाणाइ तहावरे ।
 जीशजीवसमाउत्ते, सुहदुक्खसमन्निए ॥ ६ ॥ सयंभुणा कडे लोए, इति बुत्तं
 महसिणा । मारेण संथुया माया, तेण लोए असासए ॥ ७ ॥ माहणा समणा
 एगे, आह अंडकडे जगे । असो तत्तमकासी य, अयाणांता मुसं वदे ॥ ८ ॥
 सएहिं परिआएहिं, लोथं बूया कडेति य । तत्त ते ण विजाणांति (नाभिजा-
 णांति) ण विणासी कयाइवि ॥ ९ ॥ अमणुन्नसमुप्पायं, दुक्खमेव विजा-
 णिया । समुप्पायमजाणांता, कहं नायति संवर ? ॥ १० ॥ सुद्धे अपावए
 आया, इहमेगेसिमाहियं । पुणो किड्ढापढोसेरां, सो तत्थ अवरज्जई ॥ ११ ॥
 इह संवुडे मुणो जाए, पच्छा होइ अपावए । वियडंबु जहा भुज्जां, नीरयं
 सरयं तहा ॥ १२ ॥ एताणुवीति मेधावी, बंभचेरेण ते वसे । पुढो पावाउया
 सव्वे, अक्खायारो सयं सयं ॥ १३ ॥ सए सए उवट्ठाणे, सिद्धिमेव न
 अन्नहा । अहां इहेव वसवत्ता, सव्वकामसमप्पिए ॥ १४ ॥ सिद्धा य ते
 अरोगा य, इहमेगेसिमाहियं । सिद्धिमेव पुरो काउं, सासए गट्ठिआ नरा
 ॥ १५ ॥ असंवुडा अणादीयं, भमिहिंति पुणो पुणो । कप्पकालमुवज्जंति,
 अणा आसुरकिव्विसिया ॥ १६ ॥

॥ इति बेमि ॥ अं० ७५ ॥ इति प्रथमाध्ययने तृतीयोद्देशकः १-३॥

॥ अथ प्रथमाध्ययने चतुर्थ उद्देशकः ॥

एते जिया भो । न सरणां, बाला पडियमाणिणो (जत्थ बालेऽवसी-
 यति) । हिच्चा गां पुव्वसंजोगं, सिया किच्चोवएसगा ॥ १ ॥ तं च भिक्खु
 परिन्नाय, वियं तेसु ण मुच्छए । अणुक्खसे अप्पलीणे, मज्जेण मुणि जावए
 ॥ २ ॥ सपरिग्गहा य सारंभा, इहमेगेसिमाहियं । अपरिग्गहा अणारंभा,
 भिक्खु तारां परिव्वए ॥ ३ ॥ कडेसु घासमेसेज्जा, विऊ दत्तेसणां चरे ।
 अगिद्धो विप्पमुक्को अ, ओमारां परिव्वज्जए ॥ ४ ॥ लोगवायं णिसामिज्जा,

इहमेगेसिमाहियं । विपरीयपन्नमंभूयं, अन्नउत्तं तयाणुयं ॥ ५ ॥ अण्णंते
 निइए लोए, सासए ण विणस्सती । अंतवं गिइए लोए, इति धीरोऽति-
 पासइ ॥ ६ ॥ अपरिमाणां वियाणाई, इहमेगेसिमाहियं । सब्वत्थ सपरिमाणां,
 इति धीरोऽतिपासई ॥ ७ ॥ जे केइ तसा पाणा, त्रिट्ठंति अदु थावरा ।
 परियाए अत्थि से अंचू, जेण ते तसथावरा ॥ ८ ॥ उरालं जगतो जोगं,
 विवज्जासं पलित्ति य । सब्वे अकंतदुक्खा य, अत्रो सब्वे अहिंसिता ॥ ९ ॥
 एयं खु नाण्णिणो सारं, जन्न हिंसइ किंचण । अहिंसासमयं चैव, एतावन्तं
 वियाणिया ॥ १० ॥ बुसिए य विगयगेही (विगयगिद्धी य) आयाणीयं
 संरक्खए (आयाणां सं (सम्म)रक्खए) । वरिआसणासेज्जासु, भत्तपाणे अ
 अंतसो ॥ ११ ॥ एतेहिं तिहिं ठाणेहिं, मंजए सततं मुणी । उक्कसं जलणं गुमं,
 मज्झत्थं च विगिंचए ॥ १२ ॥ समिए उ सया साहु, पंचसंवरसंबुडे । सिएहि
 असिए भिक्खु, आमोक्खाय परिव्वएज्जासि ॥ १३ ॥ त्तिवेमि ॥

॥ इति प्रथमाध्ययने चतुर्थोद्देशकः ॥ १-४ ॥ इति प्रथमाध्ययनम् ॥ १ ॥

॥ अथ वैतालीयाख्ये द्वितीयाध्ययने प्रथमोद्देशकः ॥

संबुज्झह किं न बुज्झह?, संबोही खलु पेच्च दुल्लहा । णो हूवणमंति
 राइत्रो, नो सुलभं पुण्णावि जीवियं ॥ १ ॥ डहरा बुद्धा य पासह गब्भत्था
 वि चयंति माणावा । सेणे जह वट्टयं हरे एवं आउखयंमि तुट्टई (जीवाण
 जीवियं) ॥ २ ॥ मायाहिं पियाहिं लुप्पइ, नो सुलहा सुगई य पेच्चत्रो ।
 एयाइं भयाइं पेहिया, आरम्भा विरमेज्ज सुव्वए सुट्टिए ॥ ३ ॥ जमिणं जगती
 पुढो जगा, कम्महिं लुप्पंति पाणिणो । सयमेव कडेहिं गाहइ, णो तस्स
 मुच्चेज्जऽपुट्टयं ॥ ४ ॥ देवा गंधर्वरक्खसा, असुरा भूमिचरा सरिसिवा । सया
 नस्सेट्ठिमाहणा, ठाणा तेऽवि चयंति दुक्खिया ॥ ५ ॥ कामेहिं ण संथवेहि
 गिद्धा (कामे हि य संथवे हि य) कम्मसहा कालेण जंतवो । ताले जह

बंधाच्चुए, एवं आउखयंमि लुट्ती ॥६॥ जे यावि बहुस्सुए सिया
 (सुई), धम्मिय माहणाभिकखुए सिया । अभिणूमकडेहिं मुच्छिए, तिव्वं ते
 कम्महेहिं किच्चती ॥७॥ अह पास विवेगमुट्टिए, अवितिन्ने इह भासई धुवं ।
 णाहिसि आरं कयो परं वेहासे कम्महेहिं किच्चती ॥८॥ जइ वि य णिगणे
 किसे चरे, जइविय भुंजिय मासमंतसो । जे इह मायाइ मिजई, आगंता गम्भाय
 मांतसो ॥९॥ पुरिसोरम पावकम्मणा, पत्तियंतं मणुयाण जीवियं । सन्ना
 इह काममुच्छिया, मोहं जंति नरा असंबुडा ॥१०॥ जययं विहराहि जोगवं
 अणुपाणा पंथा दुरुत्तरा । अणुसासणमेव पक्कमे, वीरेहिं संमं पवेइयं ॥११॥
 विरया वीरा समुट्टिया, कोहकायरियाइपीसणा । पाणे ण हणंति सब्बसो,
 पावाओ विरयाऽभिनिव्वुडा ॥१२॥ णवि ता अहमेव लुप्पए, लुप्पंती
 लोअंसि पाणिणो । एवं सहिएहिं पासए, अणिहे से पुट्ठे अहियासए
 ॥१३॥ धुणिया कुलियं व लेववं, किसए देहमणासणा इह । अविहिंसामेव
 पव्वए, अणुधम्मो मुणिया पवेदितो ॥१४॥ सउणी जह पंसुगुंडिया, विहु-
 णिय धंसयई सियं रयं । एवं दवित्तोवहाणवं, कम्मं खवइ तवस्सिमाहणे
 ॥१५॥ उट्टियमणगारमेसणां, समणां अणुठियं तवस्सिणां । डहरा बुद्धा य
 पत्थए, अवि सुस्से ण य तं लभेज्ज णो ॥१६॥ जइ कालुणियाणि कासिया,
 जइ रोयंति य पुत्तकारणा । दवियं भिक्खुं समुट्टियं, णो लब्भंति ण
 संठवित्तए ॥१७॥ जइविय कामेहिं लाविया, जइ गोज्जाहि ण बंधिउं घरं ।
 जइ जीविय नावकंखए, णो लब्भंति ण संठ(सराण)वित्तए ॥१८॥ सेहंति
 य णं ममाइणो, माय पिया य सुया य भारिया । पोसाहि ण पासओ तुमं,
 लोग परंपि जहासि पोसणो ॥१९॥ अन्ने अन्नेहिं मुच्छिया, मोहं जंति
 णारा असंबुडा । विसमं विसमेहिं गाहिया, ते पावेहिंपुणो पगब्भिया ॥२०॥
 तम्हा दवि इक्ख पंडिए, पावाओ विरतेऽभिणिव्वुडे । पणए वीरं महाविहिं,
 सिद्धिपहं गोआउयं धुवं ॥२१॥ वेयालियमग्गमागओ, मणवयसाकायेण

संबुडो । चिच्चा वित्तं च णायत्रो, आरंभं च सुसंबुडे चरे ॥२२॥

त्तिबेमि ॥ गाथाग्रं १२० ॥ इति द्वितीयाध्ययने प्रथमोद्देशकः ॥२-१॥

॥ अथ द्वितीयाध्ययने द्वितीय उद्देशकः ॥

तयसं व जहाइ से रयं, इति संखाय मुणी ण मज्जई । गोयन्नतरेण माहणे (जे विऊ) अहसेयकरी अनेसी(सि) इंसिणी ॥५॥ जो परिभवइ परं जणां, संसारे परिवत्तई महं (चिरं) । अदु इंसिणिया उ पाविया, इति संखाय मुणी ण मज्जई ॥२॥ जे यावि अणायगे सिया, जेविय पेसगपेसए सिया । जे मोणपयं उवट्टिए, णो लज्जे समयं सया(SS)यरे ॥३॥ सम अन्नयरम्मि संजमे, संसुद्धे समणे परिव्वए । सिअ (जे) आवकहा समाहिए, दविए कालमकासि पंडिए ॥४॥ दूरं अणुपस्सिया मुणी, तीतं धम्ममणागयं तहा । पुठ्ठे परुसेहिं माहणे, अवि हराणू समयंमि रीयइ (समयाहिवासए) ॥५॥ पराणसमत्ते (पराहसमत्थे) सया जए, समताधम्ममुदाहरे मुणी । सुहुमे उ सया अलूमए, णो कुब्भे (कुप्पे) णो माणि माहणे ॥६॥ बहुजणामणांमि संबुडो, सव्वट्ठेहिं णारे अणिसिए । हरए व सया अणाविले, धम्मं पाटुरकासि कासवे ॥७॥ बहवे पाणा पुढो सिया, पत्तेयं समयं समी(उवे)हिया । जो मोणपदं उवट्टिते, विरतिं तत्थ अकामि पंडिए ॥८॥ धम्मस्स य पारए मुणी, आरंभस्स य अंतए ठिए । सोयंति य णं ममाइणो, णो लब्भंति शियं परिग्गहं सोउण तयं उवट्टियं, केइ गिही विग्घेण उट्टिया । धम्ममि अणुत्तरे मुणी, तंपि जिणिज्ज इमेण पंडिए ॥९॥ इहलोगदुहावहं विऊ, परलोगे य दुहं दुहावहं । विद्धंसणधम्ममेव तं, इति विज्जं कोज्जारमावसे ? ॥१०॥ महयं पालिगोव जाणिया, जावि य वंदणपूयणा इहं । सुहुमे सल्ले दुरुद्धरे, विउमंता पयहिज्ज संथवं (पालिमंथ महं वियाणिया, जाविय वंदणपूयणा इहं । सुहुमं सल्लं दुरुद्धरं, तंपि जिणे एएण पंडिए) ॥११॥ एगे चरे ठाणामासणे,

सयणो एगो समाहिए सिया । भिक्खु उवहाणावीरिए, वइगुत्ते अज्भत्तसंबुडो
 ॥१२॥ णो पीहे ण यावपंगुणो, दारं सुन्नघरस्स संजए । पुट्ठे ण उदाहरे
 वयं, ण समुच्छे णो संथरे तणां ॥१३॥ जत्थत्थमिए अणाउत्ते, समविसमाइ
 मुणीऽहियासए । चरगा अदुवावि भेरवा, अदुवा तत्थ सरीसिवा सिया ॥१४॥
 तिरिया मणुया य दिव्वगा, उवसग्गा तिविहाऽहियासिया । लोमादीयं ण
 हारिसे, सुन्नागारगयो महामुणी ॥१५॥ णो अभिकंखेज्ज जीवियं, नोऽविय
 पूयणपत्थए सिया । अब्भत्थमुविंति भेरवा, सुन्नागारगयस्स भिक्खुणो
 ॥१६॥ उवणीयतरस्स ताइणो, भयमाणस्स विविक्कमासणां । सामाइयमाहु तस्स
 जं, जो अप्पाण भए ण दंसए ॥१७॥ उसिणोदगतत्तभोइणो, धम्मट्ठि-
 यस्स मुणिसस्स हीमतो । संसग्गि असाहु राइहिं, असमाही उ तहागयस्सवि
 ॥१८॥ अहिगरणकडस्स भिक्खुणो, वयमाणस्स पसज्ज दारुणां । अट्ठे
 परिहायती बहु, अहिगरणां न करेज्ज पंडिए ॥१९॥ सीओदग पडि दुगु-
 ङ्किणो, अपडिराणस्स लवावसण्णो । सामाइयमाहु तस्स जं, जो गिहिम-
 त्तेऽसणां उ भुंजती ॥२०॥ ण य संखयमाहु जीवियं, तहविय बालजणो
 पगम्भइ । बाले पापेहिं मिज्जती, इति संखाय मुणी ण मज्जती ॥२१॥ छंदेण
 पले इमा पया, बहुमाया मोहेण पाउडा । वियडेण पलित्ति माहणो, सीउराहं
 वयसाऽहियासए ॥२२॥ कुजए अपराजिए जहा, अस्खेहिं कुसलेहिं दीवयं ।
 कडमेव गहाय णो कलिं, नो तीयं नो चेव दावरं ॥२३॥ एवं लोगंमि ताइणा,
 बुइए जे धम्मे अणुतरे । तं गिरह हियंति उत्तमं, कडमिव सेसव्वहाय
 पंडिए ॥२४॥ उत्तर मणुयाण आहिया, गामधम्मा इइ मे अणुस्सुयं । जंसी
 विरता समुट्ठिया, कासवस्स अणुधम्मचारिणो ॥२५॥ जे एय चरंति आहियं,
 नाएणां महया महेसिणा । ते उट्ठिय ते समुट्ठिया, अन्नोन्नं सारंति धम्मओ
 ॥२६॥ मा पेह पुरा पणामए, अभिकंखे उवहिं धुणित्तए । जे दूमण तेहिं णो
 णया, ते जाणांति समाहिमाहियं ॥२७॥ णो काहिए होज्ज संजए, पासणिए

ण य संपसारण । नचा धम्मं अणुत्तरं, कयकिरिए णयावि मामए ॥२८॥ छन्नं
च पसंस णो करे, न य उक्कोस पगास माहणे । तेसिं सुविवेगमाहिए, पणया
जेहिं सुजोसिअं धुयं ॥२९॥ अणिए (अणहे) सहिए सुसंबुडे, धम्मट्ठी उवहा-
णवीरिए । विहरेज समाहिइंदिए, अत्तहिअं खु दुहेण लब्भइ ॥३०॥ ण
हि णूण पुरा अणुस्सुतं (अवितहं), अदुवा तं तह णो समुट्ठियं । मुणिएणा
सामाइआहितं, नाएणं जगसव्वदंसिणा ॥३१॥ एवं मत्ता महंतरं, धम्ममिणं
सहिया बहू जणा । गुरुणो छंदाणुवत्तगा, विरया तिन्र महोघमाहितं ॥३२॥
तिवेमि ॥ (ग.था.द्र. १५२)

॥ इति द्वितीयाध्ययने द्वितीयोद्देशकः ॥२-२॥

॥ अथ द्वितीयाध्ययने तृतीयोद्देशकः ॥

संबुडकम्मस्स भिक्खुणो, जं दुक्खं पुट्टं अबोहिए । तं संजमओऽ-
वचिज्जई, मरणं हेच वयंति पंडिया ॥ १ ॥ जे विन्नवणाहिज्जोसिया,
संतिन्नेहिं समं वियाहिया । तम्हा उड्ढंति पासहा (उड्ढं तिरियं अहे तथा),
अदक्खु कामाइ रोगवं ॥ २ ॥ अणो वणिएहिं आहियं, धारंती राईणिया
इहं । एवं परमा महव्वया, अक्खाया उ सराइभोयणा ॥ ३ ॥ जे इह साया-
णुगा नरा, अज्जोववत्राकामेहिं मुच्छिया । किवणेण समं पगब्भिया, न
वि जाणंति समाहिमाहितं ॥ ४ ॥ वाहेण जहा व विच्छए, अबले होइ
गवं पचोइए । से अंतसो अप्पथाण, नाइवहइ अबले विसीयति ॥ ५ ॥
एवं कामेसणं विऊ, अज्ज सुर पयहेज्ज संथं । कामी कामे ण कामए, लद्धे
वावि अलद्ध करहुई ॥ ६ ॥ मा पच्छ असाधुता भये, अच्चेही अणुसास
अप्पगं । अहियं च असाहु सोयती, से थणत्त परिदेवती बहूं ॥ ७ ॥ इह
जीवियमेव पासहा, तरुण एव (दुब्बल) वाससयस्स तुट्ठती । इत्तरवासे य
बुज्झह, गिद्धनरा कामेसु मुच्छिया ॥८॥ जे इह आरंभनिस्सिया, आतदंडा एगं-

तलूमगा । गंता ते पावलोगयं, चिररायं आसुरियं दिसं ॥ ९ ॥ गायत्र्यं
संखयमाहु जीवितं, तहवि य बालजणो पगम्भई । पच्छुप्पन्नेण कारियं, को
दट्ठं परलोयमागते ? ॥ १० ॥ अदक्खुव दक्खुवाहियं, (तं) सहहसु अद-
क्खुदंसणा । । हंदि हु सुनिरुद्धदंसणो, मोहणिज्जेण कडेण कम्मणा
॥ ११ ॥ दुक्खी मोहे पुणो पुणो, निव्विदेज्ज सिलोगपूयणं । एवं सहिते-
ऽहिपासए, आयत्तुलं पाणोहिं संजए ॥ १२ ॥ गारंपित्र आवसे नरे, अणु-
पुञ्चं पाणोहिं संजए । समता सव्वत्थ सुञ्चते, देवाणं गच्छे सलोगयं ॥ १३ ॥
सोच्चा भगवाणुपासणां, सच्चे तत्थ करेज्जुवकमं । सव्वत्थ विणीयमच्छरे,
उज्जं भिक्खु विसुद्धमाहरे ॥ १४ ॥ सव्वं नच्चा अहिट्ठए, धम्मट्ठी उवहाणा-
वीरिए । गुत्ते जुत्ते सदाजए, आयपरं परमायतट्ठिते ॥ १५ ॥ वित्तं प्सवो य
नाइत्थो, तं बाले सरणां ति मन्नइ । एते मम तेसुमी अहं, नो ताणां सरणां
न विज्जई ॥ १६ ॥ अग्भागमितंमि वा दुहे, अहवा उक्कमिते भवंतिए ।
एगस्स गती य आगती, विदुमंता सरणां ण मन्नई ॥ १७ ॥ सव्वे सयकम्म-
कप्पिया, अवियत्तेण दुहेण पाणोणो । हिंढंति भयाउला सदा, जाइजरा-
मरणोहिऽभिदु ता ॥ १८ ॥ इणमेव खणां वियाणिया, णो सुलभं बोहिं च
आहितं । एवं सहिएऽहियासए, (अहियासए) आह जिणे इणमेव संसगा
॥ १९ ॥ अभविंसु पुरावि भिक्खुवो, आएसावि भवंति सुञ्चता । एयाइं
गुणाइं आहु ते, कासवस्स अणुधम्मचारिणो ॥ २० ॥ तिविहेसावि पाण
मा हणे, आयहिते अणियाणा संबुडे । एवं सिद्धा अणांतसो, संपइ जे अ
अणागयावरे ॥ २१ ॥ एवं से उदाहु अणुत्तरनाणी अणुत्तरदंसी अणुत्तर-
नाणादंसणाधरे । अरहा नायपुत्ते भगवं वेसालिए वियाहिए ॥ २२ ॥
त्तिवेमि ॥ (गाथाप्रं. १७४)

॥ अथोपसर्गपरिज्ञाख्ये तृतीयाध्ययने प्रथमोद्देशकः ॥

सूरं मरणाइ अष्पाणां, जाव जेयं न पस्सती । जुज्भंतं ददधम्माणां,
 सिसुपालो व महारहं ॥१॥ पयाता सूरा रणासीसे, संगामंमि उवट्टिते ।
 माथा पुतं न याणाइ, जेणा परिविच्छए ॥२॥ एवं सेहेवि अष्पुट्ठे,
 भिक्खायरियाअकोविए । सूरं मरणाति अष्पाणां, जाव लूहं न सेवए ॥३॥
 जया हेमंतमासंमि, सीतं कुसइ सवायगं (सव्वगं) । तत्थ मंदा विसीयंति,
 रज्जहीणा व खत्तिया ॥४॥ पुट्ठे गिम्हाहितावेणां, विमणे सुपिवासिए ।
 तत्थ मंदा विसीयंति, मच्छा अष्पोदए जहा ॥५॥ सदा दत्तेसणा दुवखा,
 जायणा दुष्पणोल्लिया । कम्मत्ता दुब्भगा चेव, इच्चाहंसु पुट्ठोजणा ॥६॥
 एते सहे अचायंता, गामेसु रागरेसु वा । तत्थ मंदा विसीयंति, संगामंमिव
 भीरुया ॥७॥ अष्पेगे खुधियं भिवखुं, सुणी डंसति लूमए । तत्थ मंदा
 विसीयंति, तेउपुट्ठा व पाणिणो ॥८॥ अष्पेगे पडिभासंति, पडिपंथियमागता ॥
 पडियारगता एते, जे एते एव जीविणो ॥९॥ अष्पेगे वइ जुंजंति, नगिणा
 पिंडोलगाहमा । मुंडा कंहुविण्णट्ठंगा, उज्जल्ला असमाहिता ॥१०॥ एवं
 विष्पडिवन्नेगे, अष्पणा उ अजाणया । तमाओ ते तमं जंति, मंदा मोहेण
 पाउडा ॥११॥ पुट्ठो य दंसमसएहिं, तणफासमचाइया । न मे दिट्ठे परे
 लोए, जइ परं मरणां सिया ॥१२॥ संतत्ता केसलोएणां, बंभचेरपराइया ।
 तत्थ मंदा विसीयंति, मच्छा विट्ठा व (पविट्ठा) केयणो ॥१३॥ आयदंडसमा-
 यारे, मिच्छासंठियभावणा । हरिसप्पओसमावन्ना, केई लूसंतिऽनारिया
 ॥१४॥ अष्पेगे पलियंते सिं, चारो चोरोत्ति सुव्वयं । बंधंति भिवखुयं बाला,
 कसायवयणोहि य ॥१५॥ तत्थ दंडेण संवीते, मुट्ठिणा अदु फलेण वा ।
 नातीणां सरती बाले, इत्थी वा कुट्टगामिणी ॥१६॥ एते भो ! कसिणा
 फामा, फरुसा दुरहियासया । हत्थी वा सरसंवित्ता, कीवाऽवस गया गिहं

(तिव्वसड्ढे गया गिहं) ॥१७॥

॥ तिबेमि ॥ इति तृतीयाध्ययने प्रथमादेशकः ॥३-१॥ (गाथाग्रं० १९१)

॥ अथ तृतीयाध्ययने द्वितीयोद्देशकः ॥

अहिमे सुहुमा संग्गा, भिक्खुणं जे दुरुत्तरा । जत्थ एगे विसीयंति, ण चयंति जवित्तए ॥१॥ अप्पेगे नायत्रो (नायगा) दिस्स, रोयंति परिवारिया । पोस णो ताय ! पुट्ठोऽसि, कस्स ताय ! जहासि णो ? ॥२॥ पिया ते थेरत्रो तात !, ससा ते खुड्डिया इमा । भायरो ते सग्गा तात !, सोयरा किं जहासि णो ? ॥३॥ मायरं पियरं पोस, एं लोगो भविस्सति । एवं खुलोइयं ताय !, जे पालंति य मायरं ॥४॥ उत्तरा (उत्तमा) महुरुल्लावा, पुत्ता ते तात ! खुड्डया । भारिया ते णवा तात !, मा सा अन्नं जणं गमे ॥५॥ एहि ताय ! घरं जाओ, मा य कम्मे सहा वयं । वित्तिंयं पि ताय ! पासामो, जामु ताव सयं गिहं ॥६॥ गंतुं ताय ! पुणो गच्छे, ण तेणासमणो सिया । अकामगं परिकम्मं, को ते वारेउमरिहति ? ॥७॥ जं किंचि अण्णं तात !, तंपि सव्वं समीकतं (उत्तारितं) । हिरण्णं ववहाराइ, तंपि दाहामु ते वयं ॥८॥ इच्चेव णं सुसेहंति, कालुणीयसमुट्ठिया । विबद्धो नाइसंगेहिं, ततोऽगारं पहावइ ॥९॥ जहा रुक्खं वणो जायं, मालुया पडिबंधई । एव णं पडिबंधंति, णातत्रो असमाहिणा ॥१०॥ विबद्धो नातिसंगेहिं, हत्थीवावी नवग्गहे । पिट्ठतो परिमपंति, सुयगोव्व अदूरए ॥११॥ एते संग्गा मण्णुसाणं, पाताला व अतारिमा । कीवा जत्थ य किस्संति, नाइसंगेहिं मुच्छिया ॥१२॥ ॥१२॥ तं च भिक्खु परिन्नाय, सव्वे संग्गा महासत्ता । जीवियं नावकंखिज्जा, सोच्चा धम्ममणुत्तरं ॥१३॥ अहिमे (अहो इमे) संति आवट्ठा, कासवेणं पवेइया । बुद्धा जत्थावसपंति, सीयंति अबुहा जहिं ॥१४॥ रायाणो रायस्मच्चा य, माहणा अदुव खत्तिया । निमंतयंति भोगेहिं, भिक्खुयं साहुजीविणं

॥१५॥ हत्यस्सरहजाणोहिं, विहारगमणोहि य । भुज भोगे इमे सग्धे, महरिसी ! पूजयामु तं ॥१६॥ वत्थगधमलकारं, इत्थीत्रो सयणाणि य । भुंजाहिमाइं भोगाइं, आउसो ! पूजयामु तं ॥१७॥ जो तुमे नियमो चिराणो, भिक्खुभावंमि सुव्वया ! । अगारभावसंतस्स, सब्बो संविज्जे तहा ॥१८॥ चिरं दूइज्जमाणस्स, दोसो दाणिं कुतो तव ? । इच्चेव णं निमंतेंति, नीवारेण व सूयरं ॥१९॥ चोइया भिक्खुचरियाए, अचयंता जवित्तए । तत्थ मंदा विसीयंति, उज्जाणांसे व दुव्वला ॥२०॥ अचयंता व लूहेणां, उवहाणेण तज्जिया । तत्थ मंदा विसीयंति, उज्जाणांसि जरग्गवा ॥२१॥ एवं निमंतणं लद्धुं, मुच्चिया गिद्ध इत्थीसु । अज्झोववन्ना कामेहिं चोइज्जंता गया गिहं ॥२२॥

॥ तिबेमि ॥ इति तृतीयाध्ययने द्वितीयोद्देशकः ॥३-२॥

॥ अथ तृतीयाध्ययने तृतीयोद्देशकः ॥

जहा संगामकालंमि पिटतो भीरुवेहइ । वलयं गहरां णामं, को जाणइ पराजयं ? ॥ १ ॥ मुहुत्ताणां मुहुत्तस्स मुहुत्तो होइ तारिसो । पराजियावसप्पामो, इति भीरु उवेहई ॥ २ ॥ एवं तु समणा एगे, अबलं नच्चाण अप्पगं । अणागयं भयं दिस्स, अदि(अव)कप्पंतिमं सुयं ॥ ३ ॥ को जाणइ विऊ(या)वातं, इत्थीत्रो उदगाउ वा । चोइज्जंता पवक्खामो, ण णो अत्थि पक्कप्पियं ॥ ४ ॥ इच्चेव पडिलेहंति, वला (वलाइ) पडिनंहिणो । वितिगिच्छसमावन्ना, पंथाणं च अकोविया ॥ ५ ॥ जे उ संगामकालंमि, नाया सूरपुरंगमा । णो ते पिट्टमुवेहंति, किं परं मरणां सिया ? ॥ ६ ॥ एवं समुट्टिए भिक्खु, वोसिज्जाज्जारबंधणां । आरंभं तिरियं कट्टु, अत्तत्ताए परिव्वए ॥ ७ ॥ तमेगे परिभासंति, भिक्खुयं साहुजीविणां । जे एवं परिभासंति, अंतए ते समाहिए ॥ ८ ॥ संवद्धसमकप्पा उ, अन्नमन्नेसु मुच्चिया ।

पिंडवायं गिलाणस्स, जं सारेह दलाह य ॥ ९ ॥ एवं तुब्भे सरागत्था,
 अन्नमन्नमणुवसा । नट्टमप्पहसव्भावा, संसारस्स अपारगा ॥ १० ॥ अह
 ते परिभासेज्जा, भिअवू मोक्खविसारए । एवं तुब्भे पभामंता, दुपवखं चैव
 सेवह ॥ ११ ॥ तुब्भे भुंजह पाएसु, गिलाणो अभिहडंमि था । तं च
 बीयोदगं भोच्चा, तमुद्दिस्सादि जं कडं ॥ १२ ॥ लिच्चा तिच्चाभित्तवेणं,
 उज्झिया असमाहिया । नातिकंडूइयं सेयं, अरुयस्सावरज्भती ॥ १३ ॥
 तत्तेण अणुमिट्ठा ते, अपडिन्नेण जाणया । ण एस णियए मग्गे, अस-
 मिक्खा वती कित्ती ॥ १४ ॥ एरिसा जा वई एसा, अग्गवेणुव्व करिसिता ।
 गिहिणो अभिइडं सेयं, भुंजिउं ण उ भिक्खुणं ॥ १५ ॥ धम्मपन्नवणा जा
 सा, सारंभा ण विमोहि या । ण उ एयाहिं दिट्ठीहिं, पुव्वमासि पग्गप्पिअं
 ॥ १६ ॥ सव्वाहिं अणुजुत्तीहि, अचयंता जवित्तए । ततो वायं णिराकिच्चा,
 ते भुज्जोधि पग्गम्भिया ॥ १७ ॥ रागदोसाभिभूयप्पा, मिच्छतेरां अभिहुता ।
 आउस्से सरां जंति, टंकरा इव पव्वयं ॥ १८ ॥ बहुगुणप्पगप्पाइं, कुज्जा
 अत्तममाहि । जेणज्जने णो विरुज्जेज्जा, तेण तं तं समायरे ॥ १९ ॥ इमं
 च धम्ममादाय, कासवेण पवेइयं । कुज्जा भिक्खु गिलाणस्स, अगिलाए
 समाहिए ॥ २० ॥ संखाय पेसलं धम्मं, दिट्ठिमं परिनिव्वुडे । उवसग्गे
 नियामित्ता, आमोक्खाए परिव्वएज्जासि ॥ २१ ॥ त्तिवेमि

॥ इति तृतीयाध्ययने तृतीयोद्देशकः ॥३-३॥ (गाथाग्रं २३४)

॥ अथ तृतीयाध्ययने चतुर्थोद्देशकः ॥

आहं न महापुरिमा, पुब्बि तत्ततवोधणा । उदएण सिद्धिमावन्ना,
 तत्थ मंदो विसीयति ॥ १ ॥ अभुंजिया नमी विदेही, रामगुत्ते य भुंजिआ ।
 बाहुए उदगं भोच्चा, तहा नारायणे रिसी ॥ २ ॥ आमिले देविले चैव,
 दीवायण महारिसी । पारासरे दगं भोच्चा, बीयाणि हरियाणि य ॥ ३ ॥

एते पुत्रं महापुरिसा, आहिता इह संमता । भोत्रा बीत्रोदगं सिद्धा, इति
मेयमाणुस्सुत्रं ॥ ४ ॥ तत्थ मंदा विसीत्रंति, वाहच्छिन्ना व गद्दमा । पिट्टतो
परिसप्पंति, पिट्टसप्पी य संभमे ॥ ५ ॥ इहमेगे उ भासति (मत्रंति), सातं
सातेण विज्जती । जे तत्थ आरियं मग्गं, परमं च समाहिए (यं) ॥ ६ ॥
मा एयं अवमन्नंता, अप्पेणं लुं पहा बहं । एतस्स (उ) अमोक्खाए, अत्रो-
हारिब्ब जूरह ॥ ७ ॥ पाणाइवाते वट्टंता, मुसावादे असंजता । अदिन्ना-
दागो वट्टंता, मेहुणो य परिग्गहे ॥ ८ ॥ एवमेगे उ पासत्था, पन्नवंति
अणारिया । इत्थीवसं गया बाला, जिण्णसासणपरम्महा ॥ ९ ॥ जहा गंडं
पिलागं वा, परिपीलेज्ज मुहुत्तगं । एवं विन्नवणित्थीसु, दोसो तत्थ कत्थो
सिया ? ॥ १० ॥ जहा मंधादए नाम, थिमित्रं भुंजती दगं । एवं विन्नव-
णित्थीसु, दोसो तत्थ कत्थो सिया ? ॥ ११ ॥ जहा विहंगमा पिंगा,
थिमित्रं भुंजती दगं । एवं विन्नवणित्थीसु, दोसो तत्थ कत्थो सिया !
॥ १२ ॥ एवमेगे उ पासत्था, मिच्छादिट्ठी अणारिया । अज्जभोववन्ना
कामेहिं, पूयणा इव तरुणए ॥ १३ ॥ अण्णागयमपस्संता, पच्चुप्पन्नगवेसगा ।
ते पच्छा परितप्पंति, खीणो आउंमि जोव्वणो ॥ १४ ॥ जेहिं काले परिक्कंतं,
न पच्छा परितप्पए । ते धीरा बंधणुम्मुक्का, नादकंखंति जीवित्रं ॥ १५ ॥
जहा नई वेयरणी, दुत्तरा इह संमता । एवं लोगंसि नारीत्रो, दुरुत्तरा
अमईमया ॥ १६ ॥ जेहिं नारीण संजांगा, पूयणा पिट्टतो कता । सव्वमेयं
निराकिच्चा, ते ठिया सुसमाहिए ॥ १७ ॥ एते त्रोधं तरिस्संति, समुहं वव-
हारिणो । जत्थ पाणा विसन्नासि, किच्चंती सयकम्मणा ॥ १८ ॥ तं च भिवसू
परिणाय, सुव्वते समिते चरे । मुसावायं च वज्जिजा अदिन्नादागां च
वोसिरे ॥ १९ ॥ उट्टमहे तिरियं वा, जे केई तसथावरा । सव्वत्थ विरतिं
कुज्जा, संति निव्वाण माहियं ॥ २० ॥ इमं च धम्ममादाय, कासवेण पवेदितं ।
कुज्जा भिवसू गिलाणस्स, अगिलाए समाहिए ॥ २१ ॥ संखाय पेसलं धम्मं,

दिष्टिमं परिनिव्वुडे । उवसग्गे नियामित्ता, आमोक्खाए परिव्वएज्जासि ॥२२॥
त्तिवाम ॥ इति तृतीयाध्ययने चतुर्थो देशकः ॥३-४॥ इति तृतीयमध्ययनम् ॥३॥

॥ अथ चतुर्थे स्त्रीपरिज्ञाध्ययने प्रथमोद्देशकः ॥

जे मायरं च पियरं च, विप्पजहाय पुव्वसंजोगं । एगे सहिते चरि-
स्सामि, आरतमेहुणो विवित्तेसु (विवित्तेसि) ॥१॥ सुहुमेणं तं परिकम्म,
इन्नपएणा इत्थिओ मंदा । उव्वायंपि ताउ जाणसु (जाणांति), जहा लिस्संति
भिक्खुणो एगे ॥२॥ पासे भिसं णिसीयंति अभिक्खणं पोसवत्थं परिहंति ।
क्रायं अहेवि दंसंति, अह उद्धट्टु कक्खमणुव्वजे ॥३॥ सयणासणेहि
जोगेहि इत्थिओ एगता णिमंतंति । एयाणि चैव से जाणे, पासाणि
विरुवरूवाणि ॥४॥ नो तासु चक्खु संघेज्जा, नोविय साहसं समभिजाणे ।
णो सहियंपि विहरेज्जा, एवमप्पा सुरक्खिओ होइ ॥५॥ आसंतिय उस्सविया
भिक्खुं आयसा निमंतंति । एताणि चैव से जाणे, सदाणि विरुवरूवाणि
॥६॥ मणवधणेहि गोगेहि, कलुण विणीयमुवगसित्ताणं । अदु मंजुलाई
भासंति, आणवयंति भिन्नकहाहिं ॥७॥ सीहं जहा व कुणिमेणं, निब्भयमेग-
चरंति पासेणं । एवित्थियाउ बंधंति, संबुडं एगतियमणगारं ॥८॥ अह तत्थ
पुणो णमयंती, रहकारो व गोमि आणुपुव्वीए । बद्धे मिए व पासेणं,
फंदंते वि ण मुच्चए ताहे ॥९॥ अह सेज्जात्तप्पई पच्छा, भोच्चा पायसं व
विसमिस्सं । एवं विवे(विवा)गमादाय, संवासो नवि कप्पए दविए ॥१०॥
तम्हा उ वज्जए इत्थी, विसलित्तं व कंटगं नच्चा । ओए कुलाणि वसवत्ती,
आघाते ण सेवि णिग्गंथे ॥११॥ जे एयं उंछं अणुगिद्धा, अन्नयरा हुंति
कुसीलाणं । सुतवस्सिएवि से भिक्खु, नो विहरे सह णामित्थीसु ॥१२॥
अवि धूयराहि सुगहाहिं, धातीहिं अदुव दासीहिं । महतीहिं वा कुमारीहिं,
संथवं से न कुज्जा अणगारे ॥१३॥ अदु काइणं च सुहीणं वा, अप्पियं

दट्टु एगता होति । गिद्धा सत्ता कामेहिं, रक्खणपोसणो मणुस्सोऽसि ॥ १४ ॥ समणंपि दट्टुदासीणं (समणं दट्टु णु दासीणं) तत्थवि ताव एगे कुप्पंति । अदुवा भोयणोहिं णत्थेहिं, इत्थीदोसं संकिणो होंति ॥ १५ ॥ कुव्वंति संथवं ताहिं, पब्भट्टा समाहिजोगेहिं । तम्हा समणा ण समेंति, आय-हियाए सण्णसेज्जाओ ॥ १६ ॥ बहवे गिहाइं अवहट्टु, मिस्सी-भावं पत्थुया (पराणता) य एगे । धुवमग्गमेव पवयंति, वायावीरियं कुसीलाणं ॥ १७ ॥ सुद्धं रवति परिसाए, अह रहस्संमि दुक्कडं करेंति । जाणंति य णं तहाविहा, माइल्ले महासट्ठेय्यंति ॥ १८ ॥ सयं दुक्कडं च न वदति, आइट्टोवि पकत्थति बाले । वेयाणुवीइ मा कासी, चोइज्जंतो गिलाइ से भुज्जो ॥ १९ ॥ ओसियावि इत्थिपोसेसु, पुरिसा इत्थिवेयखेदन्ना । पराणासमन्निता वेगे, नारीणं वसं उवकसंति ॥ २० ॥ अवि हत्थपादच्छेदाए, अदुवा वद्धमंसउक्कंते । अवि तेयसाभितावणाणि, तच्छिद्यस्वारसिचणाइं च ॥ २१ ॥ अदु करणाणासच्छेदं, कंठच्छेदरां तितिवखंती । इति इत्थ पावसंतत्ता, नय विति पुणो न काहिंति ॥ २२ ॥ सुंतमेतमेवमेगेसिं, इत्थीवेदेति हु सुयक्खायं । एवंपि ता वदित्ताणं, अदुवा कम्मुणा अवकरेंति ॥ २३ ॥ अन्नं मणोण चित्तेति, वाया अन्नं च कम्मुणा अन्नं । तम्हा ण सहह भिक्खू, बहुमायाओ इत्थिओ णच्चा ॥ २४ ॥ जुवती समणं ब्रूया, विचित्तस्लंकारवत्थगाणि परिहित्ता । विरता चरिस्सहं रुक्खं (मौनं), धम्म-माइक्ख गो भयंतारो ॥ २५ ॥ अदु साविया पवाएणं, अहमंसि साहम्मिणी य सम-णाणं । जतुकुंभे जहा उज्जोई, संवासे विदू विसीएज्जा ॥ २६ ॥ जतुकुंभे जोइउवगूढे, आसुऽभितत्ते णासमुवयाइ । एवित्थियाहिं अण्णगारा, संवासेण णासमुवयंति ॥ २७ ॥ कुव्वंति पावगं कम्मं, पुट्टा वेगेवमाहिंसु । नोऽहं करेमि पावंति, अंकेसाइणी ममेसत्ति ॥ २८ ॥ बालस्स मंदयं वीयं, जं च कडं अवजाणई भुज्जो । दुगणं करेइ से पावं, पूयणकामो विसन्नेसी

॥ २६ ॥ संलोकणिज्जमणगारं, आयगयं निमंतगोणाहंसु । वत्थं च ताइ !
पायं वा, अन्नं पाणगं पडिग्गाहे ॥ ३० ॥ गीवारमेवं बुज्जेजा, णो इच्छे
अगारमागंतुं । बद्धे विसयपासेहिं, मोहमावज्जइ पुणो मदे ॥ ३१ ॥
त्तिवेमि (गाथाग्रं २८७)

॥ इति चतुर्थाध्ययने प्रथमोद्देशकः ॥ ४-१ ॥

॥ अथ चतुर्थाध्ययने द्वितीयोद्देशकः ॥

ओए सया ण रज्जेजा, भोगकामी पुणो विरज्जेजा । भोगे सम-
णाणा सुगोह, जह भुंजति भिक्खुणो एगे ॥ १ ॥ अह तं तु भेदमावन्नं,
मुच्छित्तं भिक्खुं काममतिवट्टं । पलिभिंदिया णं तो पच्छा, पादुद्धट्टु
मुद्धि पहणांति ॥ २ ॥ जइ केसिआ णं मए भिक्खू, णो विहरे सह णामि-
त्थीए । केसाणाऽविह लुं चिस्सं, नन्नत्थ मए चरिज्जासि ॥ ३ ॥ अह णं
से होई उवलद्धो, तो पेसंति तहाभूएहिं । अलाउच्छेदं पेहेहि, वग्गुफलाइं
आहराहिति ॥ ४ ॥ दारुणि सागपागाए अन्नपागाय, पज्जोओ वा भवि-
स्सती राओ । पाताणि य (पोताणि य) मे रयावेहि, एहि ता मे पिट्ठओमहे
॥ ५ ॥ वत्थाणि य मे पडिलेहेहि, अन्नं पाणं च आहराहिति । गंधं (गंधं) च
रओहरणं च, कासवगं च मे समणुजाणाहि ॥ ६ ॥ अदु अंजणि
अलंकारं, कुक्कययं (कुक्कइयं-घर्घरं) मे पयच्छाहि । लोद्धं च लोद्धकुसुमं
च, वेणुपलासियं च गुलियं च ॥ ७ ॥ कुट्टं तगरं च अगरुं, संपिट्टं
मम्मं उमिरेणां । तेल्लं मुहभिंजाए (भिसडलिजाए-भिंलिजए) वेणुफलाइं
सन्निधानाए ॥ ८ ॥ नंदीचुरणागाइं पाहराहि, छत्तोवाणाहं च जाणाहि ।
सत्थं च सूवच्छेज्जाए, आणीलं च वत्थयं रयावेहि ॥ ९ ॥ सुफाणि
च सागपागाए, आमलगाइं दगाहरणां च । तिलगकरणिमंजणमलागं,
घिसु मे विहूणयं विजाणोहि ॥ १० ॥ मंडासगं च फण्हं च,

सीहलिपासगं च आणाहि । आदंसगं च पयच्छाहि, दंतपवस्त्राजं
 पवेसाहि ॥ ११ ॥ पूयफलं तंबोलयं, सूईसुत्तगं च जाणाहि । कोसं च
 मोयमेहाए, सुपुक्खल्लगं च खारगालणां च ॥ १२ ॥ चंदालगं च करगं
 च, वच्चरं च आउसो ! खणाहि । सरपाययं च जायाए, गोरहगं च
 सामणोरार ॥ १३ ॥ घडिगं च सडिडिमयं, चेलगोलं कुमारभूयाए ।
 वासं समभियावराणां, आवसहं च जाणा भत्तं च ॥ १४ ॥ आसंदियं च
 नवसुत्तं, पाउल्लाई संकमट्टाए । अट्टु पुत्तदोहलट्टाए, आणप्पा हवंति दासा
 वा ॥ १५ ॥ जाए फले समुप्पन्ने, गेरहसु वा रां अहवा जहाहि । अहं
 पुत्तयोसिणो एगे, भारवहा हवंति उट्टा वा ॥ १६ ॥ रात्रोवि उट्टिया संता,
 दारगं च संखंति धाई वा । सुहिरामणा वि ते संता, वत्थथोवा हवंति हंसा
 वा ॥ १७ ॥ एवं बहुहिं कयपुब्बं, भोगत्थाए जेऽभियावन्ना । दासे मिड्व
 पेसे वा, पसुभूतेव से ण वा केई ॥ १८ ॥ एवं खु तासु विन्नप्पं, संथवं
 संवासं च वज्जेजा । तज्जातिआ इमे कामा, वज्जकरा य एवमवखाए ॥ १९ ॥
 एयं भयं ण सेयाय, इइ से अप्पगं निरुंभित्ता । णो इत्थि णो पसुं
 भिवखू, णो सयं पाणिणा णिलिज्जेजा ॥ २० ॥ सुविसुद्धलेसे मेहावी,
 परकिरिअं च वज्जे नाणी । मणासा वयसा कायेरां, सब्बफाससहे आणगारे
 ॥ २१ ॥ इच्चेवमाहु से वीरे, धुअरए धुअरमोहे (धुअराजमग्गे) से भिवखू ।
 तम्हा अज्जमत्थविसुद्धे, सुविमुक्के (विहरे) आमोवखाए परिव्वएजां सि
 ॥ २२ ॥ त्तिवेमि ॥ (गाथाअं ३०६)

॥ इति चतुर्थाध्ययने द्वितीयोद्देशकः ॥ ४-२॥ इति चतुर्थाध्ययनम् ४॥



॥ अथ पञ्चमे नरकविभक्त्यध्ययने प्रथमोद्देशकः ॥

पुच्छिरसः केवलियं महेसिं, क्वं भितावा णरगा पुरथा ? । अजा-
णत्रो मे मुणे ब्रुहि जाण, क्विं नु बाला नरथं उविति ? ॥१॥ एवं मए
पुठ्ठे महाणुभावे, इणमोऽव्वी कासवे आसुपन्ने । पवेदइस्सं दुहमट्टुदुग्गं,
आदीणियं दुक्कडियं (दुक्कडिणं) पुरथा ॥२॥ जे केइ बाला इह जीवियट्ठी,
पावाइं कम्माइं करंति रुइ । ते घोररूवे तमिसंय्यारे, तिव्वाभितावे नरए पडंति
॥३॥ तिव्वं तसे पाणिणो थावरे य, जे हिंसती आयसुहं पडुच्चा । जे
लूमए होइ अदत्तहारी, ण सिक्खती सेयवियस्स किंचि ॥४॥ पागब्भि
पाणे बहुणां तिवाति, अनिव्वते घातमुवेति बाले । णिहो णिसं गच्छति
अंतकाले, अहोसिरं कट्टु उवेइ दुग्गं ॥५॥ हण छिंदह भिइ णं दहेति,
सहे सुणिता परहम्मियाणं । ते नारगात्रो भयभिन्नसन्ना, कंखंति कन्नाम
दिसं वयामो ! ॥६॥ इंगालरासिं जलियं सजोतिं, तत्तोवमं भूमिमणुकमंता ।
ते डब्भराणा कलुणं थणांति, अरहस्सरा तत्थ चिरट्ठितीया ॥७॥ जइ ते
सुया वेयरणी भिदुग्गा, णिसिओ जहा खुर इव तिव्वसोया । तरंति ते
वेयरणीं भिदुग्गां, उसुचोइया सत्तिसु हम्ममाणा ॥८॥ कीलेहिं विज्जंति
असाहुकमा, नावं उविते सइविप्पहूणा । अन्ने तु सूलाहिं तिसूलियाहिं,
दीहाहिं विदुग्गा अहेकरंति ॥९॥ केसिं च बंधित्तु गले सिलाओ, उदगंसि
बोलंति महालयंसि । कलंबुयावालुय मुम्मुरे य, लोलंति पच्चंति अ तत्थ
अन्ने ॥ १० ॥ अ(आ)सूरियं नाम महाभितावं, अंधंतमं दुप्पतरं महंतं ।
उड्ढं अहेअं तिरियं दिसासु, समाहियो (समूसियां) जत्थज्जणी भियाई
॥ ११ ॥ जंसी गुहाए जलणोऽतिउट्ठे, अविजाणओ डब्भइ लुत्तपराणो ।
सया य कलुणं पुण घम्मठाणं, गाढोवणीयं अतिदुक्खधम्मं ॥ १२ ॥ चत्तारि
अगणीओ समारभित्ता, जहि कूरकम्माऽभितविति बालं । ते तत्थ चिट्ठंत-

भित्पमाणा, मच्छा व जीवंतुवजोतिपत्ता ॥ १३ ॥ संतच्छां नाम महाहि-
 तावं, ते नारया जत्थ असाहुकम्मा । हत्थेहिं पाएहि य वंधिऊणां, फलगं व
 तच्छंति कुहाडहत्था ॥ १४ ॥ रुहिरे पुणो वच्चसमुस्सिअंगे, भिन्नुत्तमंगे
 वरिवत्तयंता । पयंति गां गोरइए फुरंते, सजीवमच्छे व अयोक्वल्ले ॥ १५ ॥
 नो चेव ते तत्थ मसीभवन्ति, गा मिज्जती तिब्बभिवेयणाए । तमाणुभागं
 अणुवेदयंता, दुक्खंति दुक्खी इह दुक्खेणां ॥ १६ ॥ तहिं च ते लोलणसंपगादे,
 गाढं सुतत्तं अगणिं वयंति । न तत्थ सायं लहती भिदुग्गे, अरहिया
 (अरब्भिया) भितावा तहवी तविति ॥ १७ ॥ से सुच्चई नगरवहे व सद्दे,
 दुहोवणीयाणि पयाणि तत्थ । उदिराणकम्माण उदिराणकम्मा, पुणो पुणो ते
 सरहं दुहेति ॥ १८ ॥ पाणेहिं गां पाव विअोजयंति, तं भे पक्खामि
 जहातहेणां । दंडेहिं तत्था सरयंति बाला, सव्वेहिं दंडेहि पुराकएहिं ॥ १९ ॥
 ते हम्ममाणा गारगे पडंति, पुन्ने दुरूवस्स महाभितावे । ते तत्थ चिट्ठंति
 दुरूवभक्खी, तुट्ठंति कम्मोवगया किमोहिं ॥ २० ॥ सया कसिणां पुण
 घम्मठाणां, गाढोवणीयं अतिदुक्खधम्मं । अंदूसु पक्खिप्प विहत्तु देहं, वेहेण
 सीसं सेअभितावयंति ॥ २१ ॥ च्छिंदंति बालस्स खुरेण नवकं, उट्ठेवि
 च्छिंदंति दुवेवि करणे । जिब्भं विणिकस्स विहत्थिमित्तं, तिक्खाहिं सूला-
 हिअभितावयंति ॥ २२ ॥ ते तिप्पमाणा तलसंपुडंव, राइंदियं तत्थ थणांति
 बाला । गलंति ते सोणिअपूयमंसं, पज्जोइया खारपइच्चियंगा ॥ २३ ॥
 जइ ते सुता लोहितपूअपाई, बालागणी तेअगुणा परेणां । कुंभी महंता-
 हियपोरसीया, समूसिता लोहियपूयपुराणा ॥ २४ ॥ पक्खिप्प तासुं पययंति
 बाले, अट्टस्सरे ते कलुणां रसंते । तराहाइया ते तउतंवत्तत्तं, पज्जिज्जमाणा-
 ऽट्टतरं रसंति ॥ २५ ॥ अप्पेण अप्पं इह वंचइत्ता, भवाहमे पुव्वसते सहस्से
 । चिट्ठंति तत्था बहुकूरकम्मा, जहा कडं कम्म तहासि भारे ॥ २६ ॥
 समज्जिणित्ता कलुसं अणज्जा, इट्ठेहिं कंतेहि य विप्पहूणा । ते दुब्भिगंधे

कसिणो य फासे, कम्मोवगा कुण्णिमे आवसंति ॥ २७ ॥ तिबेमि ॥
(गाथाप्रं ३३६)

॥ इति पञ्चमध्ययने प्रथमोद्देशकः ॥ ५-१ ॥

॥ अथ पञ्चमाध्ययने द्वितीयोद्देशकः ॥

अहावरं सासयदुवखधम्मं, तं भे पवक्खामि जहात्तेहणं । बाला
जहा दुक्कडकम्मकारी, वेदंति कम्माइं पुरेकडाइं ॥ १ ॥ हत्थेहिं पाएहि य
बंधिऊणं, उदरं विकत्तंति खुरासिएहिं । गिण्हित्तु बालस्स विहत्तु देहं,
वद्धं थिरं पिट्ठतो उद्धरंति ॥ २ ॥ बाहू पक्कत्तंति (पक्कप्पत्ति) य मूलतो से,
थूलं वि ॥मं मुहे आडहंति । रहंसि जुत्तं सरयंति बालं, आरुस्स विज्जंति
तुदेण पिट्ठे ॥ ३ ॥ अयं व तत्तं जलियं सजोइ, तऊवमं भूमिमणुक्कमंता ।
ते डज्जमाणा कलुणं थणांति, उसुचोइया तत्तजुगेषु जुत्ता ॥ ४ ॥ बाला
बला भूमिमणुक्कमंता, पविज्जलं लोहपहं च तत्तं । जंसीऽभिदुग्गंसि पव-
ज्जमाणा, पेसेव दंडेहिं पुराकरंति ॥ ५ ॥ ते संपगादंसि पवज्जमाणा,
मिलाहिं हम्मंति निपातिणीहिं । संतावणी नाम चिरट्ठितीया, संतप्पती
जत्थ असाहुक्कम्मा ॥ ६ ॥ कंडूसु पक्खिप्प पयंति बालं, ततोवि दद्धा पुण
उप्पयंति । ते उड्ढकाएहिं पक्खज्जमाणा, अवरैहिं खज्जंति सण्णफएहिं ॥ ७ ॥
समूसियं नाम विधूमठाणं, जं सोयतत्ता कलुणं थणांति । अहोसिरं कट्ठु
विगत्तिऊणं, अयं व सत्थेहिं समोसवेंति ॥ ८ ॥ समूसिया तत्थ विसूणि-
यंगा, पक्खीहिं खज्जंति अत्रोमुहेहिं । संजीवणी नाम चिरट्ठितीया, जंसी
पया हम्मइ पावचेया ॥ ९ ॥ तिक्खाहिं सूलाहि निवाययंति (मितावयंति)
वसोगयं सावययं व लद्धं । ते सूलावेद्धा कलुणं थणांति, एगंतदुक्खं दुहत्थो
गिलाणा ॥ १० ॥ सया जलं नाम निहं महंतं, जंसी जलंतो अगणी अकट्ठो ।
चित्ठंति बद्धा बहुकूरकम्मा, अरहस्सरा केइ चिरट्ठितीया ॥ ११ ॥ चिया

महंतीउ समारभित्ता, बुब्भंति ते तं कलुणां रसंतं । आवट्टती तत्थ असा-
हुकम्मा, सप्पी जहा पडिं जोइमज्जे ॥ १२ ॥ सदा कसिणां पुणा घम्मयाणं
गाढोवणीयं अइदुक्खधम्मं । हत्थेहिं पाएहि य बंधिऊणां, सत्तुव्व डंडेहिं
समारभंति ॥ १३ ॥ भंजंति बालरस वहेण पुट्टी, सीसंपि भिंदंति अत्रो-
घणेहिं । ते भिन्नदेहा फलगं व तच्छा, तत्ताहिं आराहिं णियोजयंति
॥ १४ ॥ अभिजुंजिया रुह असाहुकम्मा, उसुचोइया हत्थिवहं वहंति ।
एगं दुरूहित्तु दुवे ततो वा, आरुस्स विज्भंति ककाणाओ से ॥ १५ ॥
बाला बला भूमिमाणुकमंता, पविज्जलं कंठइलं महंतं । विवद्धतप्पेहिं विव-
राणाचिते, समीरिया कोट्टबलिं करिंति ॥ १६ ॥ वेतालिए नाम महाभितावे,
एगायते पव्वयमंतलिव्खे । हम्मंति तत्था बहुकूरकम्मा, परं सहस्साणा
मुहुत्तगाणां ॥ १७ ॥ संवाहिया दुक्कडिणो थणांति, अहो य राओ परित-
प्पमाणा । एगंतकूडे नरेण महंते, कूडेण तत्था विसमे हता उ ॥ १८ ॥
भंजंति णं पुव्वमरी सरोसं, समुगरे ते मुसले गहेतुं । ते भिन्नदेशा रुहिरं
वमंता, ओमुद्धगा धरणिंतले पडंति ॥ १९ ॥ अणासिया नाम महासि-
याला, पागब्भिणो तत्थ सयायकोवा । खज्जंति तत्था बहुकूरकम्मा, अदूरगा
संकलियाहि बद्धा ॥ २० ॥ सयाजला नाम नदी भिदुग्गा, पविज्जलं
लोहविलीणतत्ता । जंसी भिदुग्गंसि पवज्जमाणा, एगायत्ताणुकमगां करेति
॥ २१ ॥ एयाइं फासाइं फुसंति बालं, निरंतरं तत्थ चिरट्टितीयं । ण हम्म-
माणस्स उ होइ ताणां, एगो सयं पच्चणुहोइ दुक्खं ॥ २२ ॥ जं जारिसं
पुव्वमकासि कम्मं, तमेव आगच्छति संपराए । एगंतदुक्खं भवमज्जणित्ता, वेदंति
दुक्खी तमणांतदुक्खं ॥ २३ ॥ एताणि सोच्चा णारगाणि धीरे, न हिंसए किंचण
सव्वलोए । एगंतदिट्ठी अपरिग्गहे उ, बुज्जिज्ज लोयस्स वसं न गच्छे ॥ २४ ॥
एवं तिरिक्खे मणुयासु(म)रेसुं, चतुरन्तणांतं तदणुव्विवागं । स सव्वमेयं
इति वेदइत्ता, कंखेज्ज कालं धुयमायरेज्ज ॥ २५ ॥ त्तिवेमि (गाथाग्रं ३६१) ।
॥ इति पञ्चमाध्ययने द्वितियोद्देशकः ॥ ५-२॥ ॥ इति पञ्चमाध्ययनम् ॥ ५ ॥

॥ अथ श्रीवीरस्तुत्याख्यं षष्ठमध्ययनम् ॥

पुच्छिस्सु गां समणा माहणा य, अगारिणो या परतित्थिआ य ।
 से केइ गोगंतहियं धम्ममाहु, अणोलिसं साहु ममिक्खयाए ॥ १ ॥ कहां च
 णाणं कह दंसणां से, सीलं कहां नायसुतस्स आसी ? । जाणासि गां
 भिक्खु जहातहेणां, अहासुतं ब्रुहि जहा णिसंतं ॥ २ ॥ खेयन्नए से कुसला-
 सुपन्ने (कुसले महेसी), अगांतनाणी य अगांतदंसी । जसंसिणी चक्खुपहे
 ठियरस, जाणाहि धम्मं च धिइं च पेहि ॥ ३ ॥ उडहं अहेयं तिरियं दिसासु,
 तसा य जे थावर जे य पाणा । से णिच्चणिच्चेहि समिक्ख पन्ने, दीवे व
 धम्मं समियं उदाहु ॥ ४ ॥ से सब्बदंसी अभिभूयनाणी, णिरामगंधे धिइमं
 ठितप्पा । अणुत्तरे सब्बजगंसि विज्जं, गंथा अतीते अभए अणाऊ ॥ ५ ॥
 से भूइपरणो अणिएअचारी, ओहंतरे धीरे अगांतचक्खु । अणुत्तरं तप्पति
 सूरिए वा, वइरोयणिंदे व तमं पगासे ॥ ६ ॥ अणुत्तरं धम्मणिणां जिणाणां,
 गोया मुणी कासव आसुपन्ने । इंदेव देवाणा महाणाभावे, सहस्सगोता दिवि
 गां विसिट्ठे ॥ ७ ॥ से पन्नाया अक्खयसागरे वा, महोदही वावि अगांतपारे ।
 । अणाइले वा अकसाइ मुक्के (भिक्खु), सक्केव देवाहिवई जुईमं ॥ ८ ॥
 से वीरिएगां पडिपुन्नवीरिए, सुदंसणो वा णगसब्बसेट्ट । सुरालए वासि(दि)-
 मुदागरे से, विरायए गोगगुणोववेए ॥ ९ ॥ सयं सहस्साणा उ जोयणागां,
 तिकंडगे पंडगवेजयते । से जोयणो णवणवते सहस्से, उद्धुस्सितो हेट्ट
 महस्समेगं ॥ १० ॥ पुट्ठे णभे चिट्ठइ भूमिवट्टिए, जं सूरिया अणुपरिव-
 ट्ठयंति । से हेमवन्ने बहुनंदणो य, जंसी रतिं वेदयंती महिंदा ॥ ११ ॥ से
 पव्वए महमहप्पगासे, विरायती कंचणामट्टवन्ने । अणुत्तरे गिरिसु य
 पव्वदुग्गे गिरीवरे से जलिएव भोमे ॥ १२ ॥ महीइ मज्झमि टिते णगिंद,
 पन्नायते सूरियसुद्धजेसे । एवं सिरीए उ म भूरिवन्ने, मणोरमे जोयइ

अचिमाली ॥ १३ ॥ सुदंसणसेव जसो गिरिस्स, पवुच्चई महतो पव्वयस्स ।
 एतोवमे समणे नायपुत्ते, जातीजसोदंसणनाणसीले ॥ १४ ॥ गिरीवरे
 वा निसहाऽऽययाणां, रुयए व सेट्ठे वलयायताणां । तत्रोवमे से जगभूइपन्ने,
 मुणीणा मज्जे तमुदाहु पन्ने ॥ १५ ॥ अणुत्तरं धम्ममुईरइत्ता, अणुत्तरं
 भाणावरं भियाइ । सुसुक्कसुवकं अपगंडसुवकं, संखिंदुएगंतवदातसुवकं
 ॥ १६ ॥ अणुत्तरग्गं परमं महेसी, असेसकम्मं स विसोहइत्ता । सिद्धिं
 गतिं (गते) साइमाणंतपत्ते, नाणेण सीलेण य दंसणेण ॥ १७ ॥ रुम्बेसु
 णाते जह सामली वा, जस्सि रति वेययती सुवन्ना । वणेसु वा णंदणमाहु
 सेट्ठं, नाणेण सीलेण य भूतिपन्ने ॥ १८ ॥ थणियं व सहाण अणुत्तरे
 उ, चंदो व ताराण महाणुभावे । गंधेसु वा चंदणमाहु सेट्ठं, एवं मुणीणां
 अपडिन्नमाहु ॥ १९ ॥ जहा सयंभू उदहीण सेट्ठे, नाणेसु वा धरणिंदमाहु
 सेट्ठे । खोत्रोदए वा रस वेजयंते, तवोवहाणे मुणिवेजयंते ॥ २० ॥
 हत्थीसु एरावणमाहु णाए, सीहो मिगाणां सलिलाण गंगा । पक्खीसु
 वा गरुले वेणुदेवो, निव्वाणवादीणिह णायपुत्ते ॥ २१ ॥ जोहेसु णाए
 जह वीससेणे, पुप्फेसु वा जह अरविंदमाहु । खत्तीण सेट्ठे जह
 दंतवक्के, इसीण सेट्ठे तह वद्धमाणे ॥ २२ ॥ दाणाण सेट्ठं अभय-
 प्पयाणां, सच्चेसु वा अणवज्जं वयंति । तवेसु वा उत्तमं बंभचेरं,
 लोगुतमे समणे नायपुत्ते ॥ २३ ॥ ठिईण सेट्ठा लवसत्तमा वा, सभा सुहम्मा
 व सभाण सेट्ठा । निव्वाणसेट्ठा जह सब्बधम्मा, ण णायपुत्ता परमत्थि नाणी
 ॥ २४ ॥ पुढोवमे धुणइ विगयगेही, न सणिणहिं कुव्वति आसुपन्ने ।
 तरिउं समुहं व महाभवोघं, अभयंकरे वीर अणंतचक्खु ॥ २५ ॥ कोहं च
 माणां च तहेव मायं, लोभं चउत्थं अज्भत्थदोसा । एआणि वंता अरहा
 महेसी, ण कुव्वई पाव ण कारवेइ ॥ २६ ॥ किरियाकिरियं वेणइयाणुवायं,
 अराणाणियाणां पडियच्च अणां । से सब्बवायं इति वेयइत्ता, उवट्टिए संजम-

दीहरायं ॥ २७ ॥ से वारिया इत्थी सराइभत्तं, उवहाणावं दुक्खखयट्टयाए ।
 लोगं विदित्ता आरं परं च, सब्बं पभू वारिय सब्बवारं ॥ २८ ॥
 सोच्चा य धम्मं अरहंतभासियं, समाहितं अट्टपदोवसुद्धं । तं सहहाणा
 (सहहंता) य जणा अणाऊ, इंदा व देवाहिव आगमिस्संति ॥ २९ ॥
 त्तिवेमि (गाथाग्रं ३१०)

॥ इति षष्ठमध्ययनम् ॥ ६ ॥

॥ अथ कुशीलपरिभाषाख्यं सप्तममध्ययनम् ॥

पुढवो य आऊ अगणी य वाऊ, तणा रुक्ख बीया य तसा य पाणा ।
 जे अंडया जे य जराउ पाणा, संसेयया जे रसयाभिहाणा ॥ १ ॥
 एयाइं कायाइं पवेदिताइं, एतेसु जाणे पडिलेह सायं । एतेण(हिं) काएणा-
 (हिं) य आयदंडे. एतेसु या विप्परियासुविंति ॥ २ ॥ जाईपहं अणुपरिव-
 ट्टमाणे, तसथावरेहिं विणिघायमेति । से जाति जातिं बहुकूरकम्मे, जं कुब्बती
 मिज्जति तेण बाले ॥ ३ ॥ अस्सि च लोए अदुवा परत्था, सयग्गसो वा
 तह अन्नहा वा । संमारमावन्न परं परं ते, बंधंति वेदंति य दुन्नियाणि
 ॥ ४ ॥ जे मायरं वा पियरं च हिच्चा, समणव्वए अगणिं समारभिज्जा ।
 अहाहु से लोए कुसीलधम्मे, भूताइं जे हिंसति आयसाते ॥ ५ ॥ उज्जा-
 लत्रो पाण निवातएज्जा, निव्वावत्रो अगणिं निवायवेज्जा । तम्हा उ मेहावि
 समिक्ख धम्मं, ण पंडिए अगणिं समारभिज्जा ॥ ६ ॥ पुढवीवि जीवा
 आऊवि जीवा, पाणा य संपाइम संपयंति । संसेयया कट्टसमस्सिया य, एते
 द्दे अगणिं समारभंते ॥ ७ ॥ हरियाणि भूताणि विलंबगाणि. आहार
 देहा य पुढो सियाई । जे छिंदती आयसुहं पडुच्च, पागब्भि पाणे बहुणां
 तिवाती ॥ ८ ॥ जातिं च बुद्धिं च विणासयंते, बीयाइं अस्संजय आयदंडे ।
 अहाहु से लोए अणज्जधम्मे, बीयाइ जे हिंसति आयसाते ॥ ९ ॥

गब्भाइं मिज्जंति बुयाबुयाणा, णारा परे पंचसिहा कुमारा । जुवाणगा
मज्झिम थेरगा (मज्झिम पोरुसा) य, चयंति ते आउखए पलीणा ॥ १० ॥
संबुज्झहा जंतवो ! माणुसत्तं, दट्ठुं भयं बालिसेणां अलंभो । एगंतदुक्खे
जरिए व लोए, सकम्मुणा विप्परियासुवेइ ॥ ११ ॥ इहेग मूढा पवयंति
मोक्खं, आहारसंपज्जावज्जोणां (आहारसंपंचयवज्जोणां, आहारओ पंचक-
वज्जोणां) । एगे य सीओदगसेवोणां, हुएणा एगे पवयंति मोक्खं ॥ १२ ॥
पाओसिणाणादिसु णत्थि मोक्खो, खारस्स लोणास्स अणासएणां । ते मज्ज-
मंसं लसणां च भोचा, अन्नत्थ वासं परिकप्पयंति ॥ १३ ॥ उदगेण जे
सिद्धिमुदाहरंति, सायं च पायं उदगं फुसंता । उदगस्स फासेणा सिया य
सिद्धी, सिज्झिसु पाणा बहवे दगंसि ॥ १४ ॥ मच्छा य कुम्मा य सिरीसिवा
य, मग्गू य उट्टा(ट्टा) दगरक्खसा य । अट्टाणमेयं कुसला वयंति, उदगेण
जे सिद्धिमुदाहरंति ॥ १५ ॥ उदयं जइ कम्ममलं हरेज्जा, एवं सुहं इच्छामि-
त्तमेव । अयं व गौयारमणुस्सरित्ता, पाणाणि चवं विणिहंति मंदा ॥ १६ ॥
पावाइं कम्माइं पकुञ्चतो हि, सिओदगं तू जइ तं हरिज्जा । सिज्झिसु एगे
दगसत्तघाती, मुसं वयंते जलसिद्धिमाहु ॥ १७ ॥ हुतेण जे सिद्धिमुदाहरंति,
सायं च पायं अगणिं फुसंता । एवं सिया सिद्धि हवेज्ज त्महा, अगणिं
फुसंताण कुकम्मिणांपि ॥ १८ ॥ अपरिक्ख दिट्ठं ण हु एव सिद्धी, एहिति
ते घायमबुज्झमाणा । भूएहिं जाणां पडिलेह सातं, विज्जं गहायं तसथा-
वरेहिं ॥ १९ ॥ थणांति लुप्पंति तसंति कम्मी, पुढो जगा परिसंखाय भि-
क्खू । त्महा विऊ विरतो आयगुत्ते, दट्ठुं तसे या पडिसंहरेज्जा ॥ २० ॥
जे धम्मलद्धं विणिहाय भुंजे, वियडेण साहट्ठु य जे सिणाइं । जे धोवती
लूसयतीव वत्थं, अहाहु से णागणियस्स दूरे ॥ २१ ॥ कम्मं परिन्नाय
दगंसि धीरे, वियडेण जीविज्ज य आदिमोक्खं । से वीयकंदाइ अभुंज-
माणो, विरते सिणाणाइसु इत्थियासु ॥ २२ ॥ जे मायरं च पियरं च हिच्चा,

गारं तदा पुत्तपसुं धणां च । कुलाइं जे धावइ साउगाइं, अहाहु से सामणियस्स दूरे ॥ २३ ॥ कुलाइं जे धावइ साउगाइं, आघाति धम्मं उदराणुगिद्धे । अहाहु से आयरियाण सयंसे, जे लावएजा असणस्स हेऊ ॥ २४ ॥ शिखम्म दीणे परभोयणांमि, मुहमंगलीए उदराणुगिद्धे । नीवारगिद्धेव महावराहे, अदूरए एहिइ घातमेव ॥ २५ ॥ अन्नस्स पाणस्सिहलोइयस्स, अणुप्पियं भासति सेवमाणे । पासत्थयं चैव कुसीलयं च, निस्सारए होइ जहा पुलाए ॥ २६ ॥ अरणातपिंडेणाहियासएजा, णो पूयणां तवसा आवहेजा । सइहिं रूवेहिं असज्जमाणां, सब्बेहिं कामेहिं विणीय गेहिं ॥ २७ ॥ सब्बाइं संगाइं अइच्च धीरे, सब्बाइं दुक्खाइं तितिक्खमाणे । अखिले अगिद्धे अणिएयचारी, अभयंकरे भिक्खु अणाविलप्पा ॥ २८ ॥ भारस्स जत्ता (जाता) मुण्णि भुंजएजा, कंखेज्ज पावस्स विवेग भिक्खु । दुक्खेणा पुट्ठे धुयमाइएजा, संगामसीसे व परं दमेजा ॥ २९ ॥ अविहम्ममाणे फलगावतट्ठी, समागमं कंखति अंतकस्स । शिधूय कम्मं ण पवंचुवेइ, अक्खक्खए वा सगडं तिबेमि ॥ ३० ॥ (गाथाग्रं ४०२)

॥ इति सप्तममध्ययनम् ॥ ७ ॥

॥ अथ अष्टमं श्रीवीर्याध्ययनम् ॥

दुहा वेयं सुयक्खायं, वीरियंति पवुच्चई । किं नु वीरस्स वीरत्तं, कहं चेयं पवुच्चई ? ॥ १ ॥ कम्ममेगे पवेदेंति, अकम्मं वावि सुव्वया । एतेहिं दोहि ठाणेहिं, जेहिं दीसति मच्चिया ॥ २ ॥ पमायं कम्ममाहंसु, अप्पमायं तहाऽवरं । तब्भावादेसत्थो वावि, बालं पंडियमेव वा ॥ ३ ॥ सत्थमेगे तु सिक्खंता (सिक्खंति), अतिवायाय पाणिणां । एगे मंते अहिज्जंति, पाणभूयविहेडिणां ॥ ४ ॥ माइणां कट्ठु माया य, कामभोगे समारभे (आरंभाय तिवट्ठइ) । हंता छेत्ता पगब्भित्ता, आयसायाणुगामिणां ॥ ५ ॥ मणासा

वयसा चैव, कायसा चैव अंतसो । आरत्रो परत्रो वावि, दुहावि य असं-
 जया ॥ ६ ॥ वेराइं कुवई वेरी, तत्रो वेरेहिं रज्जती । पावोवगा य आरंभा,
 दुक्खफासा य अंतसो ॥ ७ ॥ संपरायं णियच्छंति, अत्तदुक्कडकारिणो ।
 रागदोसस्सिया बाला, पावं कुव्वंति ते बहुं ॥ ८ ॥ एयं सकम्मवीरियं,
 बालारां तु पवेदितं । इत्तो अकम्मविरियं, पंडियाणां सुगोह मे ॥ ९ ॥
 दव्विए बंधणुम्मुकके, सव्वत्रो छिन्नबंधणे । पणोल्ल पावकं कम्मं, सल्लं
 कंतति अंतसो (सल्लं कंतइ अण्णो) ॥ १० ॥ नेयाउयं सुयक्खायं,
 उवादाय समीहए । भुज्जो भुज्जो दुहावासं, असुहत्तं तथा तथा ॥ ११ ॥
 ठाणी विविहठाणाणि, चइस्संति ण संसत्रो । अणियते अयं वासे
 (अनिइए य संवासे), णायएहिं सुहीहि य ॥ १२ ॥ एवमादाय मेहावी,
 अण्णो गिद्धिमुद्धरे । आरियं उवसंपज्जे, सव्वधम्मकोवि यं ॥ १३ ॥
 सह संमइए णच्चा, धम्मसारं सुगोत्तु वा । समुवट्टिए उ अण्णगारे (उवट्टिए
 य मेहावी), पच्चक्खायपावए ॥ १४ ॥ जं किंचुवकमं जाणो (णच्चा),
 आउक्खेवस्स अण्णो । तस्सेव अंतरा खिप्पं, सिक्खं सिवखेज्ज पंडिए
 ॥ १५ ॥ जहा कुम्मे सअंग्गाइं, सए देहे समाहरे । एवं पावाइं मेधावी,
 अज्झण्णेण समाहरे ॥ १६ ॥ साहरे हत्थपाए य, मणां पंचे(सव्वे)दियाणि
 य । पावकं च परीणांमं, गसादोमं च तारिसं ॥ १७ ॥ अ ण्ण मारां च मायं
 च, तं पंडिनाय पंडिए (अइमारां च मायं च तं परिणाय पंडिए ।), (सुयं मे
 इहमेगेसिं । एयं वीरस्स वीरियं), (आयतट्ठं सुआदाय, एवं वीरस्स वीरियं),
 सातागारवणिहुए, उवसंते णिहं चरे ॥ १८ ॥ पाणो य णाइवाएज्जा. अदिन्नपिय
 णादए । सादियं ण मुसं ब्रूया, एस धम्मे बुसीमत्रो ॥ १९ ॥ अतिकम्मंति
 कायाए, मणासा वि न पत्थए । सव्वत्रो संबुडे दंते, आयाणां सुसमाहरे
 ॥ २० ॥ कडं च कज्जमारां च, आगमिस्सं च पावगं । सव्वं तं णाणुजाणांति,
 आयगुत्ता जिइंदिया ॥ २१ ॥ जे याबुद्धा महाभागा, वीरा असमत्तदंमिणो ।

असुद्धं तेसिं परक्कंतं, सफलं होइ सव्वसो ॥२२॥ जे य बुद्धा महाभागा,
वीरा सम्मत्तदंसिणो । सुद्धं तेसिं परक्कंतं, अफलं होइ सव्वसो ॥२३॥
तेसिंपि तवो ण (इ) सुद्धो, निक्खंता जे महाकुला । जन्ने वन्ने वियाणंति,
न सिलोगं पवेज्जए ॥२४॥ अप्पपिंडासि पाणासि, अप्पं भासेज्ज सुव्वए ।
खंतेऽभिनिव्वुडे दंते, वीतगिद्धी सदा जए ॥२५॥ भाणजोगं सवाहट्टु,
कायं विउमेज्ज सव्वसो । तित्तिक्खं परमं णच्चा, आमोक्खाए परिव्वएज्जासि
॥२६॥ (गाथाग्रं० ४४६) त्तिवेमि ॥

॥ इति वीर्याख्यमष्टममध्ययनम् ॥८॥

॥ अथ धर्माख्यं नवममध्ययनम् ॥

कयरे धम्मे अक्खाए, माहणेण मतोमता । अंजु धम्मं जहातच्चं, जिणाणं
तं सुणेह मे (जणागा तं सुणेह मे) ॥१॥ माहणा खत्तिया वेस्सा, चंडाला अदु
बोक्सा । एसिया वेमिया सुद्धा, जे य आरंभणिस्सिया ॥२॥ परिग्गहनिवि-
ट्ठाणं, पावं (वेरं) तेसिं पवड्डई । आरंभसंभिया कामा, न ते दुक्खविमोयगा
॥३॥ आघायकिच्चमाहेउं, नाइत्थो विसएसिणो । अन्ने हरंति तं वित्तं, कम्पी
कम्मेहिं किच्चती ॥४॥ माया पिया राहुसा भया, भज्जा पुत्ता य ओरसा ।
नालं ते तव ताणाय, लुप्पंतस्स सकम्मुणा ॥५॥ एयमट्टं सपेहाए, परमट्टा-
णुगामियं । निम्ममो निरहंकारो, चरे भिक्खू जिणाहियं ॥ ६ ॥ चिच्चा
वित्तं च पुत्ते य, णाइत्थो य परिग्गहं । चिच्चा ण अंतगं सोयं, (चिच्चा-
णाऽऽंतगं सोयं) निरवेक्खो परिव्वए ॥ ७ ॥ पुट्ठी उ अगणी वाऊ,
तणरुक्खा सवीयगा । अंडया पोयजराऊ, रससंसेयउब्भिया ॥ ८ ॥ एतेहिं
छहिं काएहिं, तं विज्जं परिजाणिया । मणासा कायवक्केणं, णारंभी ण
परिग्गही ॥ ९ ॥ मुसावायं बहिद्धं च, उग्गहं च अजाइया । सत्थादाणाइं
लोगंसि, तं विज्जं परिजाणिया ॥ १० ॥ पलिउंचणं भयणं च, थंडिल्लु-

यणाणि या । धूणादाणां लोगंसि, तं विज्जं परिजाणिया ॥ ११ ॥
 घोयणां रयणां चैव, बत्थीकम्मं विरेयणां । वमणांजणा पलीमंथं, तं विज्जं
 परिजाणिया ॥ १२ ॥ गंधमल्लमिणाणां च, दंतपक्खालणां तथा । परिग्ग-
 हित्थिकम्मं च, तं विज्जं परिजाणिया ॥ १३ ॥ उहोसियं कीयगडं, पामिच्चं
 चैव आहडं । पूयं अणोसणिज्जं च, तं विज्जं परिजाणिया ॥ १४ ॥
 आसूणिमक्खिराणां च, गिद्धुवघायकम्मगं । उच्छोलणां च कक्कं च, तं
 विज्जं परिजाणिया ॥ १५ ॥ संपसारी कयकिरिए, पसिणायतणाणि य ।
 सागारियं च पिंडं च, तं विज्जं परिजाणिया ॥ १६ ॥ अट्टावयं न सिक्खिज्जा,
 वेहाइयं च णो वए । हत्थकम्मं विवायं च, तं विज्जं परिजाणिया ॥ १७ ॥
 पाणाहाओ य छत्तं च, णालीयं वालवीयणां । परकिरियं अन्नमन्नं च, तं
 विज्जं परिजाणिया ॥ १८ ॥ उच्चारं पासवणां, हरिएसु ण करे मुणी ।
 वियडेण वावि साहट्टु, णायमेज्जा(वमज्जे) कयाइवि ॥ १९ ॥ परमत्ते
 अन्नपाणां, ण भुंजेज्ज कयाइवि । परवत्थं अचेलोऽवि, तं विज्जं परि-
 जाणिया ॥ २० ॥ आसंदी पलियंके य, णिसिज्जं च गिहंतरे । संपुच्छणां
 सरणां वा, तं विज्जं परिजाणिया ॥ २१ ॥ जसं कित्तिं सलोयं च, जा य
 वंदणापूयणा । सव्वलोयंसि जे कामा, तं विज्जं परिजाणिया ॥ २२ ॥
 जेगोहं णिव्वहे भिक्खु, अन्नपाणां तथाविहं । अणुप्पयाणमन्नेसिं, तं विज्जं
 परिजाणिया ॥ २३ ॥ एवं उदाहु निग्गंथे, महावीरे महामुणी । अणांतना-
 णादंसी से, धम्मं देसितवं सुतं ॥ २४ ॥ भासमाणो न भासेज्जा, गोव वंफेज्ज
 मम्मयं । मातिट्टाणां विवज्जेज्जा, अणुत्तितिय वियागरे ॥ २५ ॥ तत्थिमा
 तइया भासा, जं वदित्ताऽणुत्तप्पती । जं छन्नं तं न वत्तव्वं, एसा आणा
 णियंठिया ॥ २६ ॥ होलावायं सहीवायं, गोयावायं च नो वदे । तुमं
 तुमंति अमणुन्नं, सव्वसो तं ण वत्तए ॥ २७ ॥ अकुसीले सया भिक्खु,
 गोव संसग्गियं भए । सुहरूवा तत्थुवस्मग्गा, पडिबुज्जेज्ज ते विऊ ॥ २८ ॥

नन्नत्थ अंतराएणां, परगेहे णा णिसीयए । गामकुमारियं किडुं, नातिवेलं
हसे मुणी ॥ २६ ॥ अणुस्सुत्रो (अणिसिस्सुत्रो) उरालेसु, जयमाणो परिव्वए ।
चरियाए अप्पमत्तो, पुट्टो तत्थअहियासए ॥ २७ ॥ हम्ममाणो ण कुप्पेज्ज,
बुच्चमाणो न संजले । सुमणो अहियासिज्जा, ण य कोलाहलं करे ॥ २८ ॥
लद्धे कामे ण पत्थेज्जा, विवेगे एव(स)माहिए । आयरियाइं सिवखेज्जा, बुद्धाणां
अतिए सया ॥ २९ ॥ सुस्सूसमणो उवासेज्जा, सुप्पन्नं सुतवस्सियं । वीरा जे
अत्तपन्नेसी, धितिमन्ता जिइंदिया ॥ ३० ॥ गिहे दीवमपासंता, पुरिसा-
दाणिया नरा । ते वीरा बंधणुमुक्का, नावकंखंति जीवियं ॥ ३१ ॥ अगिद्धे
सइहासेसु, आरंभेसु अणिसिस्सए । सव्वं तं समयतीतं, जमेतं लवियं बहु
॥ ३२ ॥ अइमाणं च मायं च, तं परिणाय पंडिए । गारदाणि य
सव्वारिणि, णिज्जाणां संधए मुणि ॥ ३३ ॥ (गाथाग्रं ४८२) त्तिवेमि ॥

॥ इति नवममध्ययनम् । ९ ॥

॥ अथ दशमं श्रीसमाध्याख्यमध्ययनम् ॥

आद्यं मईमं मणुवीय धम्मं, अञ्च समाहिं तमिणां सुगोह । अपडिन्न
भिक्षू उ समाहिपत्ते, अणियाणा भूतेसु परिव्वएज्जा ॥ १ ॥ उट्ठं अहे यं
तिरियं दिसासु, तमा य जे थावर जे य पाणा । हत्थेहिं पाएहिं य संज-
मिन्ता, अदिन्नमन्नेसु य णो गहेज्जा ॥ २ ॥ सुयक्खायधम्मे वितिगिच्छ-
तिरणो, लाढे चरे आयतुले पयासु । आयं न कुज्जा इह जीवियट्ठी, चयं
न कुज्जा सुतवस्सि भिक्षू ॥ ३ ॥ सव्विंदियाभिनिव्वुडे पयासु, चरे मुणी
सव्वतो विप्पमुक्के । पासाहि पाणो य पुटोवि सत्ते, दुक्खेण अट्टे परितप्प-
माणो ॥ ४ ॥ एतेसु बाले य (एवं तु बाले) पकुब्बमाणो, आवट्टती (आउ-
ट्टति) कम्मसु पावएसु । अतिआयतो कीरति पावकम्मं, निउंजमाणो उ
करेइ कम्मं ॥ ५ ॥ आदीणविचीव (आदीणभूईवि) करेति पाव, मंता उ

एगंतसमाहिमाहु । बुद्धे समाहीय रते विवेगे, पाणातिवाता विरते ठियप्पा
 (ठियच्चि) ॥६॥ सव्वं जगं तू समयाणुपेही, पियमप्पियं कस्सइ णो करेजा ।
 उट्टाय दीणो य पुणो विसन्नो, संपूयणां चैव सिलोयकामी ॥ ७ ॥ आहा-
 कडं चैव निकाममीणो, नियामचारी य विसराणमेसी । इत्थीसु सत्ते य पुढो
 य बाले, परिग्गहं चैव पकुव्वमाणो ॥ ८ ॥ वेराणुगिद्धे (आरंभसत्तो णिचयं
 करेति, इत्थो चुत्ते स इह(से दुह)मट्टदुग्गं । तम्हा उ मेधावि समिक्ख धम्मं,
 चरे मुणी सव्वउ विप्पमुक्के ॥ ९ ॥ आयं ण कुजा इह जीवियट्ठी, अस-
 ज्जमाणो य परिव्वएजा । णिसम्मभासी य विणीय गिद्धि, हिंसन्नियं वा ण
 कडं करेजा ॥ १० ॥ आहाकडं वा ण णिकामएजा, णिकामयंते य ण
 संधवेजा । धुणो उरालं अणुवेहमाणो, त्रिच्चाण सोयं अणवेक्खमाणो
 ॥ ११ ॥ एगत्तमेयं अभिपत्थएजा, एवं पोवखो न मुसंति पासं । एसप्प-
 मोवखो अमुसे वरेवि, अकोहणो सच्चरते तवस्सी ॥ १२ ॥ इत्थीसु या
 आरय मेहुणात्थो, परिग्गहं चैव अकुव्वमाणो । उच्चावएसुं विसएसु ताई,
 निस्संसयं भिक्खु समाहिपत्ते ॥ १३ ॥ अरइं रइं च अभिभूय भिक्खू,
 तणाइफासं तह सीयफासं । उराहं च दंसं चड्हियासएजा, सुब्धि व दुब्धि
 व तितिक्खएजा ॥ १४ ॥ गुत्तो वईए य समाहिपत्तो, लेसं समाहट्ट
 परिवएजा । गिहं न छाए णवि छायाएजा, संमिस्सभावं पयहे पयासु
 ॥ १५ ॥ जे केइ लोगंमि उ अकिरियआया, अन्नेण पुट्टा धुयमादिसंति ।
 आरंभसत्ता गद्धिता य लोए, धम्मं ण जारांति विमुक्खहेउं ॥ १६ ॥ पुढो
 य छंदा इह माणावा उ, किरियाकिरीयं च पुढो य वायं । जायस्स बालस्स
 पकुव्व देहं (जायाए बालस्स पगब्भणाए), पवड्ढती वेरमसंजतस्स ॥ १७ ॥
 आउक्खयं चैव अबुज्जमाणो, ममाति से साहसकारि मंदे । अहो य रात्थो
 परितप्पमाणो, अट्टेसु मूढे अजरामरेव्व ॥ १८ ॥ जहाहि वित्तं पसवो य
 सव्वं, जे बंधवा जे य पिया य मित्ता । लालप्पती सेऽवि य (गंधमुवेति)

एह मोहं, अन्ने जणा तंसि हरंति वित्तं ॥ १६ ॥ सीहं जहा खुडुमिगा
चरंता, दूरे चरंती परिसंकमाणा । एवं तु मेहावि समिक्ख धम्मं, दूरेण
पावं परिवज्जएज्जा ॥ २० ॥ संबुज्झमाणो उ गारे मतीमं, पावाउ अप्पाण
निवट्टएज्जा । हिंसप्पसूयाइं दुहाइं मत्ता, वेराणुबंधीणि महब्भयाणि (निव्वा-
णाभूए व परिव्वएज्जा) ॥ २१ ॥ मुसं न बूया मुणि अत्तगामी, णिव्वाण-
मेयं कसिगां समाह । सयं न कुज्जा न य कारवेज्जा, करंतमन्नंपि य णाणु-
जाणो ॥ २२ ॥ सुद्धे सिया जाए न दूसएज्जा, अमुच्छिण्ण य अज्जभोव-
वन्ने । धित्तिमं विमुक्के ण य पूयणट्ठी, न सिलोयगामी य परिव्वएज्जा
॥ २३ ॥ निक्खम्म गेहाउ निरावकंखी, कायं विउसेज्ज नियाणाद्धिन्ने । णो
जीवियं णो मरणाभिकंखी, चरेज्ज भिक्खू वलया विमुक्के ॥ २६ ॥
त्तिवेमि ॥ (गाथात्रं ५८०)

॥ इति दशममध्ययनम् ॥१०॥

॥ अथ एकादशं श्रीमार्गाध्ययनम् ॥

कयरे मग्गे अक्खाए, माहणोणं मईमता । जं मग्गं उज्जु पावित्ता,
ओहं तरति दुत्तरं ॥१॥ तं मग्गं गुत्तरं सुद्धं, सब्बदुक्खविमोक्खणं ।
जाणासि णं जहा भिक्खू !, तं णो बूहि महामुणी ॥२॥ जइ णो केइ
पुच्छिज्जा, देवा अदुव माणुसा । तेसिं तु कयरं मग्गं, आइक्खेज्ज ? कहाहि
णो ॥३॥ जइ वो केइ पुच्छिज्जा, देवा अदुव माणुसा । तेसिमं पडिसा-
हिज्जा, मग्गसारं सुणोह मे (तेसिं तु इमं मग्गं, आइक्खेज्ज सुणोह मे) ॥४॥
अणुपुञ्जेण महाघोरं, कासवेण पवेइयं । जमादाय इत्थो पुवं, समुहं ववहा-
रिणो ॥५॥ अतरिंसु तरंतेगे, तरिस्संति अणागया । तं सोच्चा पडिवक्खामि,
जंतवो तं सुणोह मे ॥६॥ पुढ्वीजीवा पुढो सत्ता, आउजीवा तहाऽगणी ।
वाउजीवा पुढो सत्ता, तणरुक्खा सब्बिण्णा ॥७॥ अहावरा तसा पाणा, एवं

छ्काय आहिया । एतावए (इत्ताव एव जीवकाए, नावरे विज्जती काए
 (कए) (णावरे कोइ विज्जई) ॥८॥ सव्वाहिं अणुजुत्तीहिं, मतिमं पडिलेहिया ।
 सव्वे अवकंतदुखा य, अतो सव्वे न हिंसया ॥९॥ एयं खु णाणिणो सारं,
 जं न हिंसति कंचण । अहिंसा समयं चेव, एतावंतं विजाणिया ॥१०॥
 उड्ढं अहे य तिरियं, जे केइ तसथावरा । सव्वत्थ विरतिं विज्जा, संति
 निव्वाणमाहियं ॥११॥ पभू दोसे निराकिच्चा (निरिविखत्ता), ण विरुज्जेज्ज
 केणई । मणसा वयसा चेव, कायसा चेव अंतसो ॥१२॥ संवुडे
 से महापन्ने, धीरे दत्तेसणं चरे । एसणासमिए णिच्चं, वज्जयंते अणो-
 सणं ॥१३॥ भूयाइं च समारंभ, तमुद्दिस्सा (भूयाइं समारंभ, समुद्दिस्सा)
 य जं कडं । तारिसं तु ण गिरंज्जा, अन्नपाणं सुसंजए ॥१४॥ पूर्वकम्मं
 न सेविज्जा, एस धम्मे वुसीमत्तो । जं किंचि अभिकंखेज्जा, सव्वसो तं न
 कप्पए ॥१५॥ हणंतं णाणुजाणेज्जा, आयगुत्ते जिइंदिए । ठाणाइं संति
 सद्धीणं, गामेसु नगरेसु वा ॥१६॥ तहा गिरं समारंभ, अत्थि पुराणंति
 णो वए । अहवा णत्थि पुराणंति, एवमेयं महब्भयं ॥१७॥ दाणाट्टया य जे
 पाणा, हम्मंति तसथावरा । तेसिं सारक्खणाट्टाए, तम्हा अत्थित्ति णो वए
 ॥१८॥ जेमिं तं उवकप्पंति, अन्नपाणं तहाविहं । तेसिं लाभंतरायंति, तम्हा
 णत्थित्ति णो वए ॥१९॥ जे य दाणं पसंसंति, वहमिच्छंति पाणिणं ।
 जे य णं पडिसेहंति, वित्तिच्छेयं करंति ते ॥२०॥ दुहत्तोवि ते ण भासंति,
 अत्थि वा नत्थि वा पुणो । आयं रयस्स हेच्चा णं, निव्वाणं पाउणंति
 ते ॥२१॥ निव्वाणं परमं बुद्धा, णवखत्ताण व चंदिमा । तम्हा सदा जए
 दंते, निव्वाणं संधए मुणी ॥२२॥ बुज्जमाणाण पाणाणं, किच्चंताण
 सकम्पुणा । आघाति साहु तं दीवं, पतिट्ठेसा पवुच्चई ॥२३॥ आयगुत्ते
 सया दंते, छिन्नसोए अणासवे । जे धम्मं सुद्धमक्खाति, पडिपुन्नमणोलिसं
 ॥२४॥ तमेव अविजाणंता, अबुद्धा बुद्धमाणिणो । बुद्धा मोत्ति य मन्नंता,

अंत एते समाहिए ॥२५॥ ते य बीओदगं चैव, तमुहिस्सा य जं कडं ।
 भोच्चा भाणं भियायंति, अखेयन्नाऽ[अ]समाहिया ॥२६॥ जहा टंका य
 कंका य, कुलला मग्गुका सिही । मच्छेसणं भियायंति, भाणं ते कलुसा-
 धमं ॥२७॥ एवं तु समणा एगे, मिच्छद्दिट्ठी अणारिया । विसएसणं
 भियायंति, कंका वा कलुसाहमा ॥२८॥ सुद्धं मगं विराहित्ता, इहमेगे उ
 दुम्पती । उम्मग्ग(ग्गेण)गता दुक्खं, घायमेसंति तं तथा ॥२९॥ जहा आसा-
 विणिं नावं, जाइअंधो दुरूहिया । इच्छई पारमागंतुं, अंतरा य विसीयति
 ॥३०॥ एवं तु समणा एगे, मिच्छद्दिट्ठी अणारिया । सोयं कसिणमावन्ना,
 आगंतारो महब्भयं ॥३१॥ इमं च धम्ममादाय कासवेण पवेदितं । तरे सोयं
 महाघोरं, अत्तत्ताए परिव्वए (कुज्जा भिक्खु गिलाणस्स अगिलाए समाहिए)
 ॥३२॥ विरए गामधम्मोहिं, जे केई जगई जगा । तेसिं अत्तुवमायाए, थामं
 कुव्वं परिव्वए ॥३३॥ अइमाणं च, तं परिन्नाय पांडए । सव्वमेयं णिरा-
 किच्चा, णिव्वाणं संधए मुणी ॥३४॥ संधए (सहहे) साहुधम्मं च, पावधम्मं
 णिराकरे । उवहाणवीरिए भिक्खु, कोहं माणं ण पत्थए (च वज्जए) ॥३५॥
 जे य बुद्धा अतिक्कंता, जे य बुद्धा अणागया । संति तेसिं पइट्ठाणं, भूयाणं
 जगती जहा ॥३६॥ अह णं वयमावन्नं, फासा उच्चावया फुसे । ण तेसु
 विणिहरणोज्जा, वाएण व महागिरी ॥३७॥ संबुडे से महापन्ने, धीरे बुद्धे
 दत्तेसणं चरे । निव्वुडे कालमाकंखी, एयं केवलिणो मयं ॥३८॥ तिबेमि ।
 (गाथाग्रं ५४६)

॥ इति एकादशमध्ययनम् ॥११॥



॥ अथ द्वादशं श्रीसमवसरणाध्ययनम् ॥

चत्वारि समोसरणाणिमाणि, पावाद्दुया जाइं पुढो वयंति । किरियं
 अकिरियं विणियंति तइयं, अन्नाणमाहंसु चउत्थमेव ॥१॥ अरणाणिया
 ता कुसलावि संता, असंथुया णो वितिगिच्छतिन्ना । अकोविया आहु
 अकोवियेहिं, अणाणुवीइत्तु मुसं वयंति ॥२॥ सच्चं असच्चं इति चितयंता,
 असाहु साहुत्ति उदाहरंता । जेमे जणा वेणइया अणोगे, पुट्टावि भावं
 विणइंसु णाम ॥३॥ अणोवसंखा इति ते उदाहु, अट्ठे स ओभासइ अम्ह
 एवं । लवावसंकी य अणागएहिं, णो किरियमाहंसु अकिरियवादी ॥४॥
 सम्मिस्सभावं च गिरा गहीए, से मुम्मुई होइ अणाणुवाई । इमं दुपक्खं
 इममेगक्खं, आहंसु छलायतणं च कम्मं ॥५॥ ते एवमक्खंति अबुज्ज-
 माणा, विरुवरूवाणि अकिरियवाई । जे मायइत्ता बहवे मणूसा, भमंति
 संसारमणोवदग्गं ॥६॥ णाइच्चो उएइ ण अत्थमेति, ण चंदिमा वड्ढति हायती
 वा । सलिला ण संदंति ण वंति वाया, वंभो णियतो कस्सिणे हु लोए
 ॥७॥ जहाहि अंधे सह जोतिणावि, रूवाइं णो पस्सति हीणणोत्ते । संतंपि
 ते एवमकिरियवाई, किरियं ण पस्संति निरुद्धपन्ना ॥८॥ संवच्छरं सुविणं
 लक्खणं च, निमित्तदेहं च उप्पाइयं च । अट्टुंगमेयं बहवे अहिता, लोगंसि
 जाणंति अणागताइं ॥९॥ केई निमित्ता तहिया भवंति, केसिंचि तं विष्प-
 डिएति णाणं (माणं) । ते विज्जभावं अणहिज्जमाणा, आहंसु विज्जापरिमो-
 क्खमेव (जाणामु लोगंसि वयंति मंदा) ॥१०॥ ते एवमक्खंति समिच्च लोगं, तथा
 तथा (गया)समणा माहणा य । सर्यं कर्डं णाऽन्नकर्डं च दुक्खं, आहंसु विज्जा-
 चरणां पमोक्खं ॥११॥ ते चक्खु लोगंसिह णायगा उ, मग्गाणुसासंति हितं
 पयाणं । तथा तथा सासयमाहु लोए, जंसी पया माणाव ! संपगाढा ॥१२॥
 जे रक्खमा वा जमलोइया वा, जे वा सुरा गंधव्वा य काया । आगास-

गामी य पुटोसिया जे, पुणो पुणो विप्परियासुवेंति ॥१३॥ जमाहु ओहं
 सलिलं अपारगं, जाणाहि णं भवगहणं दुमोक्खं । जंसी विसन्ना विसयं-
 गणाहिं, दुहओऽवि लोयं अणुसंचरंति ॥१४॥ न कम्मणा कम्म खवेंति
 बाला, अकम्मणा कम्म खवेंति धीरा । मेधाविणो लोभमयावतीता, संतो-
 सिणो नो पकरेंति पावं (संतोसिणो लोभमयावतीता) ॥१५॥ ते तीयउप्पन्न-
 मणागयाइं, लोगस्स जाणंति तहागयाइं । गेतारो अन्नेसि अण्णणोया,
 बुद्धा हु ते अंतकडा भवंति ॥१६॥ ते गोव कुव्वंति ण कारवंति, भूताहि-
 संकाइ दुगुंढमाणा । सया जता विप्पणमंति धीरा, विरणत्ति(गणाय) धीरा
 य हवंति (वीरा य भवंति) एगे ॥१७॥ डहरे य पाणे बुड्ढे य पाणे, ते
 आत्तओ पासइ (तुल्लए) सब्वलोए । उव्वेहती लोगमिणं महंतं, बुद्धेऽपमत्तेसु
 परिव्वएजा ॥१८॥ जे आयओ परओ वावि णच्चा, अलमप्पणो होंति
 अलं परेसिं । तं जोइभूतं च सयावसेजा, जे पाउकुजा अणुवीति धम्मं
 ॥१९॥ अत्ताण जो जाणति जो य लोगं, गइं च जो जाणइ णागइं च ।
 जो सासयं जाण असासयं च, जातिं मरणं च जणोववायं ॥२०॥ अहोऽवि
 सत्ताण विउट्टणं च, जो आसवं जाणति संवरं च । दुक्खं च जो जाणति
 निजरं च, सो भासिउमरिहइ किरियवादं ॥२१॥ सहेसु ख्वेसु असज्ज-
 माणो, गंधेसु रसेसु अदुस्समाणे । णो जीवितं णो मरणाहिकंखी, आया-
 णगुत्ते वलया विमुक्के ॥२२॥ त्तिवेमि ॥ (गाथाग्रं ५६८)

॥ इति द्वादशममध्ययनम् ॥१२॥

॥ अथ त्रयोदशं श्रीयाथातथ्याध्ययनम् ॥

आहत्तहीयं तु पवेयइस्सं, नाणप्पकारं पुरिसस्स जातं । सओ अ
 धम्मं असओ असीलं, संतिं असंतिं करिस्सामि पाउं ॥ १ ॥ अहो य राओ
 अ समुट्टिण्हिं, तहागण्हिं पडिलब्भ धम्मं । समाहिमाघातमजोसयंता,

सत्यारमेवं फरुसं वयंति ॥ २ ॥ विसोहियं ते अणुकाहयंते, जे आतभावेण
 वियागरेजा । अट्टाणिए होइ बहुगुणाणां (होंति बहुनिवेशे), जे णाणसंकाइ
 मुसं वदेजा ॥ ३ ॥ जे यावि पुट्टा पलिउंचयंति, आयाणमट्टं खलु वंच-
 यित्ता (यन्ति) । असाहुणो ते इह साहुमाणी, मायणिए एसंति अणंतघातं
 ॥ ४ ॥ जे कोहणो होइ जगट्टभासी, विओसियं जे उ उदीरणजा । अंधे व
 से दंडपहं गहाय, अविओसिए धासति पावकम्मी ॥ ५ ॥ जे विग्गहीए
 अन्नायभासी, न से समे होइ अभंभपत्ते । ओ(उ)वायकारी य हरीमणो य,
 एगंतदिट्ठी (एगंतसट्ठी) य अमाइरूवे ॥ ६ ॥ से पेसले सुहुमे पुरिसजाए,
 जच्चणिए चेव सुउज्जुयारे । बहुंपि अणुसासिए जे तहच्चा, समे हु से होइ
 अभंभपत्ते ॥ ७ ॥ जे आवि अण्णं वसुमंति मत्ता, संखाय वायं अपरिक्ख
 कुजा । तवेण वाऽहं सहिउत्ति मत्ता, अण्णं जणं पस्सति त्रिंभूयं ॥ ८ ॥
 एगंतकूडेण उ से पलेइ. ण विज्जतो मोणपयंमि गोत्ते । जे माण्णट्ठेण
 विउक्कसेजा, वसुमन्नतरेण अबुज्जमणो ॥ ९ ॥ जे माहणो स्वत्तियजायए वा,
 तहुग्गपुत्ते तह लेच्छई वा । जो पव्वईए परदत्तभाई, गोत्ते ण जे थंभति
 (थंभमि) माणवद्धे ॥ १० ॥ न तस्स जाई व कुलं व ताणां, णाण्णत्थ
 विज्जाचरणं सुचिराणं । णिवस्वम्म से मेवइगारिमग्गं(कम्मं), ण से पारए होइ
 विभोयणाए ॥ ११ ॥ णिक्किंचणो भिक्खु सुलूहजीवी, जे गारवं होइ सलो-
 गगामी । आजीवमेयं तु अबुज्जमाणो, पुणो पुणो विपरियासुवेति ॥ १२ ॥
 जे भासवं भिक्खु सुसाहुवादी, पडिहाणवं होइ विसारए य । आगाढपराणो
 सुविभावियप्पा, अन्नं जणं पन्नया परिहवेजा ॥ १३ ॥ एवं ण से होइ
 समाहिपत्ते, जे पन्नवं भिक्खु विउक्कसेजा । अहवाऽवि जे ला(लो)भमया-
 वलित्ते, अन्नं जणं खिसति बालपन्ने ॥ १४ ॥ पन्नामयं चेव तवोमयं च,
 णिन्नामए गोयमयं च भिक्खु । आजीवगं चेव चउत्थमाहु, से पंडिए उत्तम-
 भोग्गले से ॥ १५ ॥ एयाइं मयाइं विगिंच धीरा, ण ताणि सेवते सुधीर-

धम्मा । ते सब्वगोत्तावगया महेसी, उच्चं अगोत्तं च गतिं वयंति ॥ १६ ॥
 भिक्खु मुयच्चे तह(सूय)दिट्ठधम्मे, गामं च णगरं च अणुप्पविस्सा । से
 एसणां जाणमणेसणां च, अन्नस्स पाणस्स अणाणुगिद्धे ॥ १७ ॥ अरतिं
 रतिं च अभिभूय भिक्खु, बहुजणे वा तह एगचारी । एगंतमोगेण विया-
 गरेज्जा, एगस्स जंतो गतिरागती य ॥ १८ ॥ सयं समेच्चा अदुवाऽवि सोच्चा,
 भासेज्ज धम्मं हिययं पयाणां । जे गरहिया सणियाणप्पओगा, ण ताणि
 सेवंति सुधीरधम्मा ॥ १९ ॥ केसिंचि तक्काइ अबुज्झ भावं, खुइं पि गच्छेज्ज
 असहहाणे । आउस्स कालाइयारं वधाए, लद्धाणुमाणे य परेसु अट्ठे
 ॥ २० ॥ कम्मं च छंदं च विगिंच धीरे, विणइज्ज उ सब्वओ (सुब्वओ)
 पाव(आय)भावं । ख्वेहिं लुप्पंति भयावहेहिं, विज्जं गहाया तसथावरेहिं
 ॥ २१ ॥ न पूयणां चैव मित्तोयकामी, पियमप्पियं कस्सइ णो करेज्जा ।
 सब्वे अणट्ठे परिवज्जयंते, अणाउले या अकसाइ भिक्खु ॥ २२ ॥ आह-
 त्थीयं समुपेहमाणे सब्वेहिं पाणेहिं णिहाय दंडं । णो जीवियं णो मरणा-
 हिकंखी, मेहावि वलयविप्पमुक्के (परिव्वएज्जा वलयाविमुक्के) ॥ २३ ॥

त्तिबेमि ॥ (गाथाग्रं-५९१) इति त्रयोदशमध्ययनम् ॥ १३ ॥

॥ अथ ग्रन्थनामकं चतुर्दशमध्ययनम् ॥

गंथं विहाय इह सिक्खमाणो, उट्ठाय सुबंभचेरं वसेज्जा । ओवाय-
 कारी विणयं सुसिक्खे, जे छेय विप्पमायं न कुज्जा ॥१॥ जहा दियापोतम-
 पत्तजातं, सावासगा पविउं मन्नमाणां । तमचाइयं तरुणमपत्तजातं, टंकाइ
 अव्वत्तगमं हरेज्जा ॥२॥ एवं तु सेहंपि अपुट्ठधम्मं, निस्सारियं बुसिमं मन्न-
 माणा । दियस्स द्वायं व अपत्तजायं, हरिंसु णं पावधम्मा अणोगे ॥३॥
 ओसाणमिच्छे मणुए समाहिं, अणोसिए णंतकरिंति णच्चा । ओभासमाणे
 दवियस्स वित्तं, ण णिकसे बहिया आसुपन्नो ॥४॥ जे ठणओ य सयणा-

सगो य, परकमे यावि सुसाहुजुत्ते । समितीसु गुत्तीसु य आयपन्ने, वियाग-
रिते य पुढो वएज्जा ॥५॥ सदाणि सोच्चा अदु भेरवाणि, अणासवे तेसु
परिव्वएज्जा । निहं च भिक्खु न पमाय कुज्जा, क्हं कं वा वितिगिच्छतिन्ने
॥६॥ डहरेण बुढेण णुसासिए उ, रातिणिएणावि समव्वएणां । सम्मं तयं
(समं गतं) थिरतो णाभिगच्छे, णिज्जंतए वावि अपारए से ॥७॥ विउट्टितेणं
समयाणुसिट्ठे, डहरेण बुढेण उ चोइए य । अच्चुट्टियाए घडदासिए वा,
अगारिणां वा समयाणुसिट्ठे ॥८॥ ण तेसु कुज्जे ण य पव्वहेज्जा, ण यावि
किंची फरुसं वदेज्जा । तहा करिस्संति पडिस्सुणोज्जा, सेयं खु मेयं ण पमाय
कुज्जा ॥९॥ वणंसि मूढस्स जहा अमूढा, मग्गाणुसासंति हितं पयाणं ।
तेणोव (तेणावि) मज्झं इणमेव सेयं, जं मे बुहा समणुसासयंति ॥१०॥
अहातेण मूढेण अमूढगस्स, कायव्व पूया सविसेमजुत्ता । एत्थोदमं तत्थ
उदाहु वीरे, अणुगम्म अत्थं उवणोति सम्मं ॥११॥ गोता जहा अंधकारंसि
रात्थो, मग्गं ण जाणाति अपस्समाणो । से सूरिअस्स अब्भुग्गमेणां, मग्गं
वियाणाइ पगासियंसि ॥१२॥ एवं तु सेहेवि अपुट्ठधम्मे, धम्मं न जाणाइ
अबुज्झमाणो । से कोविए जिणवयणेण पच्छा, सूरुदए पासति चक्खुणेव
॥१३॥ उड्हं अहेयं तिरियं दिसासु, तसा य जे थावरा जे य पाणा ।
सया जए तेसु परिव्वएज्जा, मणप्पत्थोमं अविकंपमाणो ॥१४॥ कालेण
पुब्बे समियं पयासु, आइवखमाणो दवियस्स वित्तं । तं सोयकारी य पुढो
पवेसे, संखा इमं केवलियं समाहिं ॥१५॥ अस्सि सुठ्ठिच्चा तिविहेण तायी,
एएसु या संति निरोहमाहु । ते एवमवखंति तिलोगदंसी, ण भुज्जमेयंति
पमायसंगं ॥१६॥ निसम्म से भिक्खु समीहियट्ठं, पडिभाणवं होइ विसा-
रणे य । आयाणअट्ठी वोदाणमोणां, उवेच्च सुद्धेण उवेति मोक्खं (न उवेइ
मारं) ॥१७॥ संखाइ धम्मं च वियागरंति, बुद्धा हु ते अंतकरा भवंति । ते
पारगा दोराहवि मोयणाए, संसोधितं पराहमुदाहरंति ॥१८॥ णो छायाए

गोऽविय लूसएजा, माणं ण सेवेज पगासणं च । ण यावि पन्ने परिहास
 कुजा, ण याऽऽसियावाय वियागरेजा ॥१६॥ भूताभिसंकाइ दुगुंइमाणे,
 ण णिव्वहे मंतपदेण गोयं । ण किंचि मिच्छे मणुए पयासुं, असाहु-
 धम्माणि ण संवएजा ॥२०॥ हासं पि गो संधति पावधम्मे, ओए तहीयं
 फरुसं वियाणे । गो तुच्छए गो य विकंथइजा, अणाइले या अकसाइ
 भिक्खू ॥२१॥ संकेज याऽसंकितभाव भिक्खू, विभज्जवायं च वियागरेजा ।
 भासादुयं धम्मसमुट्टितेहिं, वियागरेजा समया सुपन्ने ॥२२॥ अणुगच्छ-
 माणे वितहं विजाणे, तहा तहा साहु अककसेणं । ण कत्थई भास विहिं-
 सइजा, निरुद्धगं वावि न दीहइजा ॥२३॥ समालवेजा पडिपुन्नभासी,
 निसामिया समियाअट्टदंसी । आणाइ सुद्धं वयणं भिउंजे, अभिसंधए
 पावविवेग भिक्खू ॥२४॥ अहाबुइयाइं सुसिक्खएजा, जइजया णातिवेलं
 वदेजा । से दिट्ठिमं दिट्ठि ण लूसएजा, से जाणई भासिउं तं समाहिं
 ॥२५॥ अलूसए गो पच्छन्नभासी, गो सुत्तमत्थं च करेज ताई । सत्था-
 रभत्ती अणुवीइ वायं, सुयं च सम्मं पडिवाययेजा(यंति) ॥२६॥ से सुद्धसुत्ते
 उवहाणवं च, धम्मं च जे विंदति तत्थ तत्थ । आदेज्जवक्के कुसले वियत्ते,
 स अरिइइ भासिउं तं समाहिं ॥ २७ ॥ तिवेमि ॥ (गाथाग्रं ५१८)

॥ इति चतुर्दशमध्ययनम् ॥ १४॥

॥ अथ आदानीयनामकं पञ्चदशमध्ययनम् ॥

जमतीतं पडुपन्नं, आगमिस्सं च णायओ । सव्वं मन्नति तं ताई,
 दंसणावरणंतए ॥ १ ॥ अंतए वितिगिच्छाए, से जाणति अणोलिसं ।
 अणोलिसस्स अक्खाया, ण से होइ तहिं तहिं ॥ २ ॥ तहिं तहिं सुय-
 क्खायं, से य सच्चे सुआहिए । सया सच्चेण संपन्ने, मित्ति भूएहि
 कएए ॥ ३ ॥ भूएहिं न विरुज्जेजा, एस धम्मे बुसीमओ । बुसिमं जगं

परिन्नाय, अस्सि जीवितभावणा ॥ ४ ॥ भावणाजोगसुद्धप्पा, जले णावा
 व आहिया । नावा व तीरसंपन्ना, सव्वदुक्खा तिउट्टइ ॥ ५ ॥ तिउट्टइ उ
 मेधावी, जाणं लोगंसि पावगं । लुट्टंति पावकम्माणि, नवं कम्ममकुव्वत्थो
 ॥ ६ ॥ अकुव्वत्थो णवं णत्थि, कम्मं नाम विजाणइ । विन्नाय से महावीरे,
 जेण जाई ण मिज्जई ॥ ७ ॥ ण मिज्जई महावीरे, जस्स नत्थि पुरेकडं ।
 वाउव्व जालमव्वेत्ति, पिया लोगंसि इत्थित्थो ॥ ८ ॥ इत्थित्थो जे ण
 सेवंति, आइमोक्खा हु ते जणा । ते जणा बंधणुम्मुक्का, नावकंखंति जीवियं
 ॥ ९ ॥ जीवितं पिट्टत्थो किच्चा, अंतं पावंति कम्मुणं । कम्मुणा संमुहीभूता,
 जे मग्गमणुसासई ॥ १० ॥ अणुसासणं पुढो पाणी, वसुमं प्रयणासु (स)
 ते । अणासए जते दंते, दढे आरयमेहुणे ॥ ११ ॥ णीवारे व ण लीएज्जा,
 छिन्नसोए अणाविले । अणाइले सया दंते, संधिं पत्ते अणोलिसं ॥ १२ ॥
 अणोलिसस्स खेयन्ने, ण विरुज्जिक्क केणइ । मणसा वयसा चव, कायसा
 चव चक्खुमं ॥ १३ ॥ से हु चक्खू मणुस्साणं, जे कंखाए य अंतए ।
 अंतएण खुरो वहती, चक्कं अंतएण लोडुती ॥ १४ ॥ अंताणि धीरा सेवंति,
 तेण अंतकरा इह । इह माणुस्सए ठाणे, धम्ममाराहिउं णारा ॥ १५ ॥
 णिड्डियट्ठा व देवा वा, उत्तरीए इयं सुयं । सुयं च मेयमेगेसिं अमणुस्सेसु
 णो तहा ॥ १६ ॥ अंतं करंति दुक्खाणं, इहमेगेसि आहियं । आघायं पुण
 एगेसिं, दुल्लभेस्यं समुस्सए ॥ १७ ॥ इत्थो विद्धंसमाणस्स, पुणो संबोहि दुल्लभा
 दुल्लहात्थो तहच्चात्थो, जे धम्मट्टं वियागरे ॥ १८ ॥ जे धम्मं सुद्धमक्खंति,
 पडिपुन्नमणोलिसं । अणोलिसस्स जं ठाणं, तस्स जम्मकहा कत्थो ? ॥ १९ ॥
 कत्थो कयाइ मेधावी, उप्पज्जंति तहागया । तहागया अप्पडिन्ना, चक्खू
 लोगस्सणुत्तरा ॥ २० ॥ अणुत्तरे य ठाणे से, कासवेण पवेदिते । जं
 किच्चा णिवुडा एगे, निट्टं पावंति पंडिया ॥ २१ ॥ पंडिए वीरियं लद्धुं,
 निग्घायाय पवत्तगं । धुणे पुव्वकडं कम्मं, णवं वाऽवि ण कुव्वती ॥ २२ ॥

ण कुव्वती महावीरे, अणुपुव्वकडं रयं । रयसा संमुहीभूता, कम्मं हेचाण जं मयं ॥२३॥ जं मयं सब्बसाहूणं, तं मयं सल्लगत्तणं । साहइत्ताण तं तिन्ना, देवा वा अभविस्सु ते ॥२४॥ अभविंस्सु पुरा वी(धी)स, आगमिस्सावि सुव्वता । दुन्निबोहस्स मग्गस्स, अतं पाउकरा तिन्ने ॥२५॥ त्तिवेमि । (गाथाग्रं ६४३)

॥ इति पञ्चदशमध्ययनम् ॥ १५ ॥

॥ अथ षोडशं श्रीगाथाध्ययनम् ॥

अहाह भगवं—एवं से दंते दविए वोसट्टकाएत्ति वच्चे माहणोत्ति वा १ समणोत्ति वा २ भिक्खूत्ति वा ३ णिग्गंथेत्ति वा ४ पडिआह—भंते ! कहं नु दंते दविए वोसट्टकाएत्ति वच्चे माहणोत्ति वा समणोत्ति वा भिक्खूत्ति वा णिग्गंथेत्ति वा ? तं नो बूहि महामुणी ! ॥ इतिविरिए सब्बपावकम्मेहिं पिज्जदोसकलह० अब्भवखाण० पेसुन्न० परपरिवाय० अरतिरति० माया-मोस० मिच्छादंसणसल्लविरए समिए सहिए सया जए णो कुज्जे णो माणी माहणोत्ति वच्चे १ ॥ एत्थवि समणे अणिस्सिए अणियाणे आदाणं च अतिवायं च मुसावायं च बहिद्धं च कोहं च माणं च मायं च लोहं च पिज्जं च दोसं च इच्चेव जत्थो जत्थो आदाणं अप्पणो प्होसहेऊ तत्थो तत्थो आदाणातो पुव्वं पडिविरते पाणइवायात्थो सिआदंते दविए वोसट्टकाए समणोत्ति वच्च २ ॥ एत्थवि भिक्खू अणुन्नए विणीए नामए दंते दविए वोसट्टकाए संविधुणीय विरूवरूवे परीसहोवसग्गे अज्मप्पजोगसुद्धादाणे उवट्टिए ठिअप्पा संखाए परदत्तभोई भिक्खूत्ति वच्चे ३ ॥ एत्थवि णिग्गंथे एगे एग-विऊ बुद्धे संछिन्नसोए सुसंजते सुसमिते सुसामाइए आयवायपत्ते विऊ दुहत्थोवि सोयपलिच्छिन्ने णो पूयासकारलाभट्ठी धम्मट्ठी धम्मविऊ णिया-गपडिवन्ने समि(म)यं चरे दंते दविए वोसट्टकाए निग्गंथेत्ति वच्चे ४ ॥ से एवमेव जाणह जमहं भयंतारो ॥ त्तिवेमि ।

॥ इति षोडशमध्ययनम् ॥ १६ ॥ प्रथमः श्रुतस्कन्धः समाप्तः ॥ १ ॥

अथ श्री सूत्रकृतांगे द्वितीयः श्रुतस्कन्धः ।

॥ अथ प्रथमं पौण्डरीकाख्याध्ययनम् ॥

सुयं मे आउसंतेणं भगवया एवमक्खायं—इह खलु पौंडरीए गाम-
ज्भयणो, तस्स णं अयमट्ठे पराणत्ते—से जहाणामए पुक्खरिणी सिया
बहुउदगा बहुसेया बहुपुक्खला लद्धट्ठा पुंडरिक्किणी पासादीया दरिसणीया
अभिरूवा पडिरूवा, तीसे णं पुक्खरिणीए तत्थ तत्थ देसे देसे तहिं तहिं
बहवे पउमवरपौंडरीया बुइया, अणुपुव्वुट्ठिया ऊसिया रुइला वराणमंता गंध-
मंता रसमंता फासमंता पासादीया दरिसणीया अभिरूवा पडिरूवा, तीसे णं
पुक्खरिणीए बहुमज्जदेसभाए एगे महं पउमवरपौंडरीए बुइए, अणुपुव्वुट्ठिए
उस्सिते रुइले वन्नमंते गंधमंते रसमंते फासमंते पासादीए जाव पडिरूवे १।
सव्वावंति च णं तीसे पुक्खरिणीए तत्थ तत्थ देसे देसे तहिं तहिं बहवे
पउमवरपौंडरीया बुइया अणुपुव्वुट्ठिया ऊसिया रुइला जाव पडिरूवा,
सव्वावंति च णं तीसे णं पुक्खरिणीए बहुमज्जदेसभाए एगं महं पउमवर-
पौंडरीए बुइए अणुपुव्वुट्ठिए जाव पडिरूवे २॥सू० १॥ अह पुरिसे पुरित्थि-
माओ दिसाओ आगम्म तं पुक्खरिणीं तीसे पुक्खरिणीए तीरे ठिच्चा पासति
तं महं एगं पउमवरपौंडरीयं अणुपुव्वुट्ठियं ऊसियं जाव पडिरूवं १। तए
णं से पुरिसे एवं वयासी—अहमंसि पुरिसे खेयन्ने वुसलेपं डिते वियत्ते
मेहावी अबाले मग्गत्ये मग्गविऊ मग्गस्स गतिपरक्कमराणू अहमेयं पउमव-
रपौंडरीयं उन्निक्खविस्सामित्ति कट्टु इति बुया (बुच्चा) से पुरिसे अभिक्कमेति
तं पुक्खरिणीं जावं जावं च णं अभिक्कमेइ तावं तावं च णं महंते उदए
महंते सेए पहीणो तीरं अपत्ते पउमवरपौंडरीयं णो हव्वाए णो पाराए,
अंतरा पोक्खरिणीए सेयंसि निसराणो पढमे पुरिसजाए ! २ ॥सू० २॥ अहावरे

दोच्चे पुरिसजाए, अह पुरिसे दक्खिणाओ दिसाओ आगम्म तं पुक्खरिणिं तीसे पुक्खरिणीए तीरे ठिच्चा पासति तं महं (महन्तं) एगं पउमवरपोंडरीयं अणुपुब्बुट्टियं पासादीयं जाव पडिरूवं १। तं च एत्थ एगं पुरिसजातं पासति पहीणतीरं अपत्तपउमवरपोंडरीयं णो हव्वाए णो पाराए अंतरा पोक्खरिणीए सेयंसि णिसन्नेसु, तए णं से पुरिसे (तं पुरिसं) एवं वयासी-अहो णं इमे (अयं) पुरिसे अखेयन्ने अकुसले अपंडिए अवियत्ते अमेहावी बाले णो मग्गत्ये णो मग्गविऊ णो मग्गस्स गतिपरक्कमराणू जन्नं एस पुरिसे, अहं खेयन्ने कुसले जाव पउमवरपोंडरीयं उन्निक्खेविस्सामि ३। णो य खलु एयं पउमवरपोंडरीयं एवं उन्निक्खेवियव्वं जहा णं एस पुरिसे मन्ने, अहमंसि पुरिसे खेयन्ने कुसले पंडिए वियत्ते मेहावी अबाले मग्गत्ये मग्गविऊ मग्गस्स गतिपरक्कमराणू अहमेयं पउमवरपोंडरीयं उन्निक्खेविस्सामित्ति-कट्टु इति बुच्चा से पुरिसे अभिक्कमे तं पुक्खरिणिं, जावं जावं च णं अभिक्कमेइ तावं तावं च णं हित्ते उदए महंते सेए पहीणे तीरं अपत्ते पउमवरपोंडरीयं णो हव्वाए णो पाराए अंतरा पोक्खरिणीए सेयंसि णिसन्ने दोच्चे पुरिसजाते ४॥ ३ ॥ अहावरे तच्चे पुरिसजाते, अह पुरिसे पच्चत्थिमाओ दिसाओ आगम्म तं पुक्खरिणिं तीसे पुक्खरिणीए तीरे ठिच्चा पासति तं एगं महं पउमवरपोंडरीयं अणुपुब्बुट्टियं जाव पडिरूवं १। ते तत्थ दोन्नि पुरिसजाते पासति पहीणे तीरं अपत्ते पउमवरपोंडरीयं णो हव्वाए णो पाराए जाव सेयंसि णिसन्ने २। तए णं से पुरिसे एवं वयासी-अहो णं इमे पुरिसा अखेयन्ना अकुसला अपंडिया अवियत्ता अमेहावी बाला णो मग्गत्या णो मग्गविऊ णो मग्गस्स गतिपरक्कमराणू जं णं एते पुरिसा एवं मन्ने-अहे एतं पउमवरपोंडरीयं उण्णिक्खेविस्सामो ३। नो य खलु एयं पउमवरपोंडरीयं एवं उन्निक्खेवेतव्वं जहा णं एए पुरिसा मन्ने, अहमंसि पुरिसे खेयन्ने कुसले पंडिए वियत्ते मेहावी अबाले मग्गत्ये मग्गविऊ

मग्गस्स गतिपरक्कमराणू अहमेयं पउमवरपोंडरीयं उन्निक्खिविस्सामित्ति कट्टु इति बुच्चा से पुरिसे अभिक्कमे तं पुक्खरिणि जावं जावं च णं अभिक्कमे तावं तावं च णं महंते उदए महंते सेए जाव अंतरा पोक्खरिणीए सेयंसि णिन्स, नेतच्चे पुरिसजाए ४॥ सूत्रं ४ ॥ अहावरे चउत्थे पुरिसजाए, अह पुरिसे उत्तरात्थो दिसात्थो आगम्म तं पुक्खरिणि, तीसे पुक्खरिणीए तीरे ठिच्चा पासति तं महं एगं पउमवरपोंडरीयं अणुपुब्बुट्टियं जाव पडिरुवं १। ते तत्थ तिन्नि पुरिसजाते पासति पहीणो तीरं अपत्ते जाव सेयंसि णिसन्ने २। तए णं से पुरिसे एवं वयासी-अहो णं इमे पुरिसा अखेयन्ना जाव णो मग्गस्स गतिपरक्कमराणू जराणं एते पुरिसा एवं मन्ने-अह्हे एतं पउमवर-पोंडरीयं उन्निक्खिविस्सामो ३। णो य खलु एयं पउमवरपोंडरीयं एवं उन्निक्खेवेयव्वं जहा णं एते पुरिसा मन्ने, अहमंसि पुरिसे खेयन्ने जाव मग्गस्स गतिपरक्कमराणू, अहमेयं पउमवरपोंडरीयं उन्निक्खिविस्सामित्ति कट्टु इति बुच्चा से पुरिसे तं पुक्खरिणि जावं जावं च णं अभिक्कमे तावं तावं च णं महंते उदए महंते सेए जाव णिसन्ने, चउत्थे पुरिसजाए ४॥ सूत्रं ५ ॥ अह भिक्खू लूहे तीरट्ठी खेयन्ने जाव गतिपरक्कमराणू अन्नतरात्थो दिसात्थो वा अणुदिसात्थो वा आगम्म तं पुक्खरिणि तीसे पुक्खरिणीए तीरे ठिच्चा पासति तं महं एगं पउमवरपोंडरीयं जाव पडिरुवं १। ते तत्थ चत्तारि पुरिसजाए पासति पहीणो तीरं अपत्ते जाव पउमवरपोंडरीयं णो हव्वाए णो पाराए अंतरा पुक्खरिणीए सेयंसि णिसन्ने २। तए णं से भिक्खू एवं वयासी-अहो णं इमे पुरिसा अखेयन्ना जाव णो मग्गस्स गतिपरक्कमराणू, जं एते पुरिसा एवं मन्ने अह्हे एयं पउमवरपोंडरीयं उन्निक्खिविस्सामो ३। णो य खलु एयं पउमवरपोंडरीयं एवं उन्निक्खेवेतव्वं जहा णं एते पुरिसा मन्ने, अहमंसि भिक्खू लूहे तीरट्ठी खेयन्ने जाव मग्गस्स गतिपरक्कमराणू, अहमेयं पउमवरपोंडरीयं उग्गिणक्खिविस्सामित्ति कट्टु इति बुच्चा से

भिवसू गो अभिक्रमे तं पुक्खरिणि तीसे पुक्खरिणीए तीरे ठिच्चा सहं
कुजा-उप्पयाहि खलु भो पउमवरपोंडरीया ! उप्पयाहि अह से उप्पतिते
पउमवरपोंडरीए ४॥ सूत्रं ६॥ किट्टिए नाए समणाउसो ! अट्ठे पुण से जाणि-
त्त्वे भवति, भंतेत्ति समणां भगवं महावीरं निग्गंथा य निग्गंथीओ य वंदंति
नमंसंति वंदेत्ता नमंसित्ता एवं वयासि-किट्टिए नाए समणाउसो ! अट्ठं पुण से
ण जाणामो समणाउसोत्ति, समणो भगवं महावीरे ते य बहवे निग्गंथे य
निग्गंथीओ य आमंतेत्ता एवं वयासी-हंत समणाउसो ! आइक्खाभि विभावेमि
किट्ठेमि पवेदेमि सअट्ठं सहेउं सनिमित्तं भुज्जो भुज्जो उवदंसेमि से वेमि ॥
॥सूत्रं ७॥ लोयं च खलु मए अप्पाहट्टु समणाउसो ! सा पुक्खरिणी बुइया,
कम्मं च खलु मए अप्पाहट्टु समणाउसो ! से उदए बुइए, कामभोगे य खलु
मए अप्पाहट्टु समणाउसो ! से सेए बुइए, जणं जाणवयं च खलु मए अप्पा-
हट्टु समणाउसो ! ते बहवे पउमवरपोंडरीया बुइया, रायाणं च खलु मए
अप्पाहट्टु समणाउसो ! से एगे महं पउमवरपोंडरीए बुइए, अन्नउत्थिया य
खलु मए अप्पाहट्टु समणाउसो ! ते चत्तारि पुरिसजाया बुइया, धम्मं च
खलु मए अप्पाहट्टु समणाउसो ! से भिवसू बुइए, धम्मतित्थं च खलु मए
अप्पाहट्टु समणाउसो ! से तीरे बुइए, धम्मकहं च खलु मए अप्पाहट्टु
समणाउसो ! से सहं बुइए, निव्वाणं च खलु मए अप्पाहट्टु समणाउसो !
से उप्पाए बुइए, एवमेयं च खलु मए अप्पाहट्टु समणाउसो ! से एवमेयं बुइयं
॥सूत्रं ८॥ इह खलु पाईणं वा पडीणं वा उदीणं वा दाहिणं वा संतेग-
तिया मणुस्सा भवंति अणुपुब्बेणं लोगं उववन्ना, तंजहा-आरिया वेगे
अणारिया वेगे उच्चागोत्ता वेगे गीयागोया वेगे कायमंता वेगे रहस्समंता
वेगे सुवन्ना वेगे दुव्वन्ना वेगे सुरूवा वेगे दुरूवा वेगे १। तेसिं च णं मणु-
याणं एगे राया भवइ, महया(महा)हिमवंत-मलय-मंदरमहिंदसारे अच्चंतविसुद्ध-
रायकुलवंसणसूते निरंतररायलक्खणाविराइयंगमंगे बहुयणावहुमाणपूइए सब्ब-

गुणमिद्धे खत्तिए मुदिए मुद्धाभिसित्ते माउपिउसुजाए द्यप्पिए सीमंकरे
सीमंधरे खेमंकरे खेमंधरे मणुस्सित्ते जणावयपिया जणावयपुरोहिए सेउकरे
केउकरे नरपवरे पुरिसपवरे पुरिससीहे पुरिसआसीविसे पुरिसवरपोंडरीए
पुरिसवरगंधहत्थी अड्ढे दित्ते वित्ते विच्छिन्नविउल-भवणासयणासणा-जाणा-
वाहणाइराणे बहुधाणबहुजातरुवरतए आयोगपयोगसंपउत्ते विच्छिड्डियपउर-
भत्तपाणे बहुदासीदास-गोमहिस-गवेलगप्पभूते पडिपुराणकोसकोट्टागाराउहागारे
बलवं दुब्बल्लपच्चामिते ओहयकंटयं निहयकंटयं मलियकंटयं उद्धियकंटयं
अकंटयं ओहयसत्तू निहयसत्तू मलियसत्तू उद्धियसत्तू निज्जियसत्तू पराइय-
सत्तू ववगयदुब्बिक्ख-मारिभयविप्पमुक्कं रायवन्नओ जहा उववाइए जाव
पसंतडिंबडमरं रज्जं पसाहेमाणो विहरति २। तस्स गां रन्नो परिसा भवइ-
उग्गा उग्गपुत्ता भोगा भोगपुत्ता इक्खागाइ इक्खागाइपुत्ता नाया नायपुत्ता
कोरव्वा कोरव्वपुत्ता भट्टा भट्टपुत्ता माहणा माहणापुत्ता लेच्छइ लेच्छइपुत्ता
पसत्थारो पसत्थपुत्ता सेणावई सेणावइपुत्ता ३। तेसिं च गां एगतीए सद्धी
भवइ कामं तं समणा वा माहणा वा मंपहारिसु गमणाए, तत्थ अन्नतरेणां
धम्मेणां पन्नत्तारो वयं इमेणां धम्मेणां पन्नवइस्सामो से एवमायाणह भयंतारो
जहा मए एस धम्मे सुयक्खाए सुपन्नत्ते भवइ, तंजहा-उड्ढं पादतला अहे
केसग्गमत्थया तिरियं तयपरियंते जीवे एस आयापज्जवे केसिणे एस जीवे
जीवति एस मए णो जीवइ, सरीरे धरमाणो धरइ विणाट्टंमि य णो धरइ,
एयंतं जीवियं भवति, आदहणाए परेहिं निज्जइ, अगणिम्मामिए सरीरे
कवोतवन्नाणि अट्ठीणि भवंति, आसंदीपंचमा पुरिसा गामं पच्चागच्छंति ४।
एवं असंते असंविज्जमाणो जेसिं तं असंते असंविज्जमाणो तेसिं तं सुयक्खायं
भवति-अन्नो भवति जीवो अन्नं सरीरं, तम्हा, ते एवं नो विपडिवे-
दंति-अयमाउसो ! आया दीहेति वा हस्सेति वा परिमंडलेति वा कट्टेति वा
तंसेति वा चउरंसेति वा आयतेति वा छलंसिएति वा अट्टंसेति वा, किराहेति

वा ग्नीलेति वा लोहियहालिहो जाव सुक्विल्लेति वा, सुब्भिगंधेति वा दुब्भि-
 गंधेति वा, तितेति वा कड्डुएति वा कसाएति वा अंबिलेति वा जाव महुरेति
 वा, कम्बडेति वा मउएति वा गुरुएति वा लहुएति वा सिएति वा उसिणेति
 वा निद्धेति वा लुक्खेति वा, ५। एवं असंते असंबिज्जमाणो जेसिं तं सुय-
 क्खायं भवति—अन्नो जीवो अन्नं सरीरं, तम्हा ते गो एवं उवलब्भंति से
 जहाणामए केइ पुरिसे कोसीओ असिं अभिनिव्वट्टित्ता गां उवदंसेज्जा अय-
 माउसो ! असी अयं कोसी, एवमेव ग्णत्थि केइ पुरिसे अभिनिव्वट्टित्ता गां
 उवदंसेइ (उवदंसेत्तारो) अयमाउसो ! आया इयं सरीरं ६। से जहाणामए केइ
 पुरिसे मुंजाओ इमियं अभिनिव्वट्टित्ता गां उवदंसेज्जा अयमाउसो ! मुंजे इयं
 इमियं, एवमेव नत्थि केइ पुरिसे उवदंसेत्तारो अयमाउसो ! आया इयं सरीरं ७।
 से जहाणामए केइ पुरिसे मंसाओ अट्ठिं अभिनिव्वट्टित्ता गां उवदंसेज्जा अय-
 माउसो । मंसे अयं अट्ठी, एवमेव नत्थि केइ पुरिसे उवदंसेत्तारो अयमाउसो !
 आया इयं सरीरं ८। से जहाणामए केइ पुरिसे करयलाओ आमलकं अभि-
 निव्वट्टित्ता गां उवदंसेज्जा अयमाउसो ! करतले अयं आमलए, एवमेव ग्णत्थि
 केइ पुरिसे उवदंसेत्तारो अयमाउसो ! आया इयं सरीरं । से जहाणामए केइ
 पुरिसे दहियो नवनीयं अभिनिव्वट्टित्ता गां उवदंसेज्जा अयमाउसो ! नवनीयं
 अयं तु दही, एवमेव ग्णत्थि केइ पुरिसे जाव सरीरं ९। से जहाणामए केइ
 पुरिसे तिलेहितो तिल्लं अभिनिव्वट्टित्ता गां उवदंसेज्जा अयमाउसो ! तेल्लं
 अयं पिन्नाए, एवमेव जाव सरीरं १०। से जहाणामए केइ पुरिसे इक्खुतो
 खोतरसं अभिनिव्वट्टित्ता गां उवदंसेज्जा अयमाउसो ! खोतरसे अयं छोए,
 एवमेव जाव सरीरं ११। से जहाणामए केइ पुरिसे अरणीतो अग्गिं अभि-
 निव्वट्टित्ता गां उवदंसेज्जा अयमाउसो ! अरणी अयं अग्गी, एवमेव जाव
 सरीरं १२। एवं असंते असंबिज्जमाणो जेसिं तं सुयक्खायं भवति, तंजहा अन्नो
 जीवो अन्नं सरीरं । तम्हा ते मिब्ब्या १३। से हंता तं हण्ह खण्ह छण्ह

ढहह पयह आलुं पह विलुं पह सहसाकारेह विपरामुसह, एतावताव जीवे गाल्थि
 परलोए, ते णो एवं विप्पडिवेदेति, तंजहा—किरियाइ वा अकिरियाइ वा सुक्-
 डेइ वा दुक्केइ वा कल्लाणेइ वा पावएइ वा साहुइ वा असाहुइ वा सिद्धीइ
 वा असिद्धीइ वा निरएइ वा अनिरएइ वा, एव ते विरूवरूवेहिं कम्मसमारं-
 भेहिं विरूवरूवाइं कामभोगाइं समारंभंति भोयणाए १४॥ एवं एगे पाग-
 ङ्गिभिया णिक्खम्म मामगं धम्मं पन्नवेति, तं सहहमाणा तं पत्तियमाणा तं
 रोएमाणा साहु सुयक्खाए समणेति वा माहणेति वा कामं खलु आउसो !
 तुमं पूययामि, तंजहा—असणेण वा पाणेण वा खाइमेण वा साइमेण वा
 वत्थेण वा पडिग्गहेण वा कंवल्लेण वा पायपुंछणेण वा तत्थेगे पूयणाए
 समाउट्टिसु तत्थेगे पूयणाए निकाइंसु १५॥ पुब्बमेव तेसिं णायं भवति—
 समणा भविस्सामो अणगारा अकिंचणा अपुत्ता (अपत्ता) अपसू परदत्तभोइणो
 भिक्खुणो पावं कम्मं णो करिस्सामो समुट्टाए ते अप्पणा अप्पडिविरया
 भवंति, सयमाइयंति अन्नेवि आदियावेति अन्नंपि आयतंतं समणुजाणंति,
 एवमेव ते इत्थिकामभोगेहिं मुच्छिया गिद्धा गट्ठिया अज्जभोववन्ना लुद्धा राग-
 दोसवसट्ठा, ते णो अप्पणां समुच्छेदेति ते णो परं समुच्छेदेति ते णो
 अरणाइं पाणाइं भूताइं जीवाइं सत्ताइं समुच्छेदेति, पहीणां पुब्बमंजोगं
 आयरियं मगं असंपत्ता इति ते णो हव्वाए णो पाराए अंतरा कामभोगेसु
 विमन्ना इति पढमे पुरिसजाए तज्जीवतच्छरीरएत्ति आहिए १६ ॥ सूत्रं ६ ॥
 अहावरे दोच्चे पुरिसजाए पंचमहब्भूतिएत्ति आहिज्जइ, इह खलु पाइणां
 वा (६) संतेगतिया मणुस्सा, भवंति अणुपुब्बेणां लोयं उववन्ना, तंजहा—
 आरिया वेगे अणारिया वेगे एवं जाव दुरूवा वेगे, तेसिं च णं महं
 एगे राया भवइ महया० एवं चेव णिरवसेमं जाव सेणावइपुत्ता, तेसिं च णं
 एगतिए सट्ठी भवति कामं तं समणा य माहणा य पहारिंसु गमणाए, तत्थ
 अन्नयरेणां धम्मेणां पन्नत्तारो वयं इमेणां धम्मेणां पन्नवइस्सामो से एवमायाणह

भयंतारो । जहा मए एस धम्मे सुअक्खाए (जाव) सुपन्नत्ते भवति १॥ इह खलु पंच महब्भूता, जेहिं नो विज्जइ किरियाति वा अकिरियाति वा, सुक्कडेति वा दुक्कडेति वा, कल्लाणेति वा पावएति वा, साहुति वा असाहुति वा, सिद्धीति वा असिद्धीति वा, जाव णिरएति वा, अणिरएति वा, अवि अंतसो तण्णमायमवि २॥ तं च पिहुइसेणं पुटोभूतसमवातं जाणेज्जा, तंजहा-पुटवी एगे महब्भूते आऊ दुच्चे महब्भूते तेऊ तच्चे महब्भूते वाऊ चउत्थे महब्भूते आगासे पंचमे महब्भूते, इच्चेते पंच महब्भूया अण्णिम्मिया अण्णिम्माविता अकडा णो कित्तिमा णो कडगा अणाइया अण्हणा अवंभा अपुरोहिता सतंता सासता आयद्धट्ठा, पुण एगे एवमाहु-सतो णत्थि विणासो असतो णत्थि संभवो ३॥ एतावताव जीवकाए, एतावताव अत्थिकाए, एतावताव सव्वलोए, एतं मुहं लोगस्स करणयाए, अवियंतसो तण्णमायमवि ४॥ से किणं किणावेमाणे हणं अपमाणे पयं पयावेमाणे अवि अंतसो पुरिसमवि कीणित्ता घायइत्ता एत्थंपि जाणाहि णत्थित्थदोमो, ते णो एवं विप्पडिवेदेति, तंजहा-किरियाइ वा जावणिरएइ वा, एवं ते विरूवरूवेहिं कम्मसमारंभेहिं विरूवरूवाइं कामभोगाइं समारंभंति भायणाए, एवमेव ते अणारिया विप्पडिवन्ना तं सद्वहमाणा तं पत्तियमाणा जाव इति, ते णो हव्वाए णो पाराए, अंतरा कामभोगेसु जाव विमरणा, दोच्चे पुरिसजाए पंचमहब्भूतिएत्ति आहिए ५॥ सूत्रं १०॥ अहावरे तच्चे पुरिसजाए ईसरकारणिए इति आहिज्जइ, इह खलु पादीणां वा (६) संतेगतिया मणुस्सा भवंति अणुपुच्चेणां लोयं उववन्ना, तं०-आरिया वेगे जाव तेसिं च णां महंते एगे राथा भवइ जाव सेणावइपुत्ता, तेसिं च णां एगतीए सद्धी भवइ, कामं तं समणा य माहणा य पहारिंसु गमणाए जाव जहा मए एस धम्मे सुअक्खाए सुपन्नत्ते भवइ १॥ इह खलु धम्मा पुरिसादिया पुरिसोत्तरिया पुरिसप्पणीया पुरिमसंभूया पुरिसपज्जोतिता पुरिसअभिसमरणागया पुरिसमेव अभिभूय त्रिट्ठंति, से जहाणामए गंडे

सिया सरीरे जाए सरीरे संबुड्ढे सरीरे अभिसमराणागए सरीरमेव अभिभूय चिट्ठति, एवमेव धम्मा पुरिसादिया जाव पुरिसमेव अभिभूय चिट्ठंति २ । से जहाणामए अरई सिया सरीरे जाया सरीरे संबुड्ढा सरीरे अभिसमराणागया सरीरमेव अभिभूय चिट्ठति, एवमेव धम्मावि पुरिसादिया जाव पुरिसमेव अभिभूय चिट्ठंति ३ । से जहाणामए वम्मिए सिया पुढविजाए पुढविसंबुड्ढे पुढविअभिसमराणागए पुढविमेव अभिभूय चिट्ठइ । एवमेव धम्मावि पुरिसादिया जाव पुरिसमेव अभिभूय चिट्ठंति ४ । से जहाणामए रुक्खे सिया पुढविजाए पुढविसंबुड्ढे पुढविअभिसमराणागए पुढविमेव अभिभूय चिट्ठति, एवमेव धम्मावि पुरिसादिया जाव पुरिसमेव अभिभूय चिट्ठंति ५ । से जहाणामए पुक्खरिणी सिया पुढविजाया जाव पुढविमेव अभिभूय चिट्ठति, एवमेव धम्मावि पुरिसादिया जाव पुरिसमेव अभिभूय चिट्ठंति ६ । से जहाणामए उदगपुवखले सिया उदगजाए जाव उदगमेव अभिभूय चिट्ठति, एवमेव धम्मावि पुरिसादिया जाव पुरिसमेव अभिभूय चिट्ठंति ७ । से जहाणामए उदगबुब्बुए सिया उदगजाए जाव उदगमेव अभिभूय चिट्ठति, एवमेव धम्मावि पुरिसादिया जाव पुरिसमेव अभिभूय चिट्ठंति ८ ॥ जंपिय इमं समणाणां णिग्गंथाणां उद्दिट्ठं पणीयं वियंजियं दुवालसंगं गणिपिडयं, तंजहा-आयारो सूयगडो जाव दिट्ठिवातो, सव्वमेवं मिच्छा, ण एयं तहियं, ण एयं आहातहियं, इमं सच्चं इमं तहियं इमं आहातहियं, ते एवं सन्नं कूब्बंति, ते एवं सन्नं संठंति, ते एवं सन्नं सोवड्ढवयंति, तमेवं ते तज्जाइयं दुक्खं णातिउट्ठंति सउणी पंजरं जहा ९ ॥ ते णो एवं विष्णुड्ढिदेंति, तंजहा-किरिया इ वा जाव अणिए इ वा, एवामेव ते विरूवरूवेहिं कम्मसमारंभेहिं विरूवरूवाइं कामभोगाइं समारंभंति भोयणाए, एवामेव ते अणारिया विष्णुड्ढिवन्ना एवं सहहमाणा जाव इति ते णो हव्वाए णो पाराए, अंतरा कामभोगेसु विसराणेत्ति, तच्चे पुरिसजाए

ईसरकारणिएत्ति आहिए १० ॥सूत्रं ११॥ अहावरे चउत्थे पुरिसजाए णिय-
तिवाइएत्ति आहिज्जइ, इह खलु पाईणं वा (६) तहेव जाव सेणावइपुत्ता वा, तेसिं
च णं एगतीए सट्ठी भवइ, कामं तं समणा य माहणा य संपहारिंसु गमणाए
जाव मए एस धम्मे सुअक्खाए सुपन्नत्ते भवइ १ ॥ इह खलु दुवे पुरिसा भवंति-
एगे पुरिसे किरियमाइक्खइ एगे पुरिसे णोकिरियमाइक्खइ, जे य पुरिसे किरि-
यमाइक्खइ जे य पुरिसे णोकिरियमाइक्खइ दोवि ते पुरिसा तुल्ला एगट्ठा, कार-
णावन्ना २ ॥ बाले पुण एवं विप्पडिवेदेंति कारणमावन्ने अहमंसि दुक्खामि
वा सोयामि वा जूरामि वा तिप्पामि वा पीडामि वा परितप्पामि वा अहमेय-
मकासि परो वा जं दुक्खइ वा सोयइ वा जूरइ वा तिप्पइ वा पीडइ वा परि-
त्पइ वा परो एवमकासि, एवं से बाले सकारणं वा परकारणं वा एवं विप्प-
डिवेदेंति कारणमावन्ने ३ ॥ मेहावी पुण एवं विप्पडिवेदेंति कारणमावन्ने-अह-
मंसि दुक्खामि वा सोयामि वा जूरामि वा तिप्पामि वा पीडामि वा परितप्पामि
ना, णो अहं एवमकासि, परो वा जं दुक्खइ वा जाव परितप्पइ वा णो
परा एवमकासि, एवं से मेहावी सकारणं वा परकारणं वा एवं विप्पडिवेदेंति
कारणमावन्ने, ४ ॥ से वेमि पाईणं वा (६) जे तसथावरा पाणा ते एवं
संघायमागच्छंति ते एवं विपरियासमावज्जंति ते एवं विवेगमागच्छंति ते
एवं विहाणमगच्छंति ते एवं संगतियंति उवेहाए, णो एवं विप्पडिवेदेंति, तं
जहा-किरियाति वा जाव (णिरएति वा) अणिरएति वा, एवं ते विरूवरू-
वेहिं कम्मसमारंभेहिं विरूवरूवाइं कामभोगाइं समारभंति भोयणाए ५ ॥
एवमेव ते अणारिया विप्पडिवन्ना तं सइहमाणा जाव इति ते णो हव्वाए
णो पाराए अंतरा कामभोगेसु विसरणा ६ । चउत्थे पुरिसजाए णियइ-
वाइएत्ति आहिए, ॥ इच्चेते चत्तारि पुरिसजाया णाणापन्ना णाणाच्छंदा
णाणासीला णाणादिट्ठी णाणारुई णाणारंभा णाणाअज्भवसाणसंजुत्ता
पहीणपुव्वसंजोगा आरियं मग्गं असंपत्ता इति ते णो हव्वाए णो पाराए

अंतरा कामभोगेषु विसरणा = ॥ सूत्रं १२ ॥ सेबेभि पाईणं वा (६) संतेगतिया मणुस्सा भवन्ति, तंजहा-आरिया वेगे अणारिया वेगे उच्चागोया वेगे गीया-गोया वेगे, कायमंता वेगे, रहस्समंता वेगे, सुवन्ना वेगे, दुवन्ना वेगे, सुरूवा वेगे । दुरूवा वेगे १ । तेसिं च णं जणाणावयाइं खेत्तवत्थूणि परिग्गहियाइं भवन्ति, तं० अण्यरा वा भुज्जयरा वा, तहण्णगारेहिं कूलेहिं आगम्म अभिभूय एगे भिक्खायरियाए समुट्ठिता सतो वावि एगे णायत्थो य (अणायत्थो) य उवगरणं च विण्णजहाय भिक्खारियाए समुट्ठिता असतो वावि एगे णायत्थो (अणायत्थो) य उवगरणं च विण्णजहाय भिक्खायरियाए समुट्ठिता, [जे ते सतां वा असतो वा णायत्थो य अणायत्थो य उवगरणं च विण्णजहाय भिक्खाय-रियाए समुट्ठिता] २ । पुव्वमेव तेहिं णायं भवइ, तंजहा-इह खलु पुरिसे अन्नमन्नं ममट्ठाए एवं विण्णडिवेदेति, तं जहा-खेत्तं मे वत्थू मे हिरराणां मे सुवन्नं मे धणां मे धराणां मे कंसं मे दूसं मे विपुलधणा-कणागरयणा-मणि-मोत्तिय-संखसिलप्पवाल-रत्तरयणासंतसारसावतेयं मे सहा मे रूवा मे गंधा मे रसा मे फासा मे, एते खलु मे कामभोगा अहमवि एतेसिं-३ ॥ से मेहावी पुव्वामेव अण्यणो एवं समभिजाणोज्जा, तंजहा-इह खलु मम अन्नयरे दुक्खे रोयातंके समुण्णजेज्जा अणिट्ठे अकंते अण्णिए असुभे अमणुन्ने अमणामे दुक्खे णो सुहे से हंता भयंतारो ! कामभोगाइं मम अन्नयरं दुक्खं रोया-तंके परियाइयह अणिट्ठुं अकंतं अण्णियं असुभं अमणुन्नं अमणामं दुक्खं णो सुहं, ताइहं दुक्खामि वा सोयामि वा जूरामि वा तिप्पामि वा पीडामि वा परितप्पामि वा इमात्थो मे अणायरात्थो दुक्खात्थो रोगातंकात्थो पडि-मोयह अणिट्ठुत्थो अकंतात्थो अण्णियात्थो असुभात्थो अमणुन्नात्थो अमणा-मात्थो दुक्खात्थो णो सुहात्थो, एवामेव णो लद्धपुव्वं भवइ ४ । इह खलु कामभोगा णो ताणाए वा णो सरणाए वा, पुरिसे वा एगता पुव्विं काम-भोगे विण्णजहति, कामभोगा वा एगता पुव्विं पुरिसं विण्णजहंति, अन्ने

खलु कामभोगा अन्नो अहमंसि, से किमंग पुण वयं अन्नमन्नेहिं कामभोगेहिं मुच्छामो ?, इति संखाए णं वयं च कामभोगेहिं विप्पजहिस्सामो ५। से मेहावी जाणोज्जा बहिरंगमेतं, इणमेव उवणीयतराणं, तंजहा-माया मे पिता मे भाया मे भगिणी मे भज्जा मे पुत्ता मे धूता मे पेसा मे नत्ता मे सुगहा मे सुही मे पिया मे सहा मे सयणासंगंथसंथुया मे, एते खलु मम णायत्रो अहमवि एतेसिं, एवं से मेहावी पुब्बामेव अप्पणा एवं समभिजाणोज्जा ६। इह खलु मम अन्नयरे दुक्खे रोयातंके समुपज्जेज्जा अणिट्ठे जाव दुक्खे णो सुहे, से हंता भयंतारो ! णायत्रो इमं मम अन्नयरं दुक्खं रोयातंके परियाइयह अणिट्ठं जाव णो सुहं ७। ताऽहं दुक्खामि वा सोयामि वा जाव परित्पामि वा, इमात्रो मे अन्नयरातो दुक्खात्रो रोयातंकात्रो परिमोएह अणिट्ठात्रो जाव णो सुहात्रो, एवमेव णो लद्धपुब्बं भवइ, तेसिं वावि भयंताराणं मम णाययाणं अन्नयरे दुक्खे रोयातंके समुपज्जेज्जा अणिट्ठे जाव णो सुहे, से हंता अहमेतेसिं भयंताराणं णाययाणं इमं अन्नयरं दुक्खं रोयातंके परियाइयामि अणिट्ठं जाव णो सुहं ८। मा मे दुक्खंतु वा जाव मा मे परित्पंतु वा, इमात्रो णं अणायरात्रो दुक्खातो रोयातंकात्रो परिमोएमि अणिट्ठात्रो जाव णो सुहात्रो, एवमेव णो लद्धपुब्बं भवइ, अन्नस्स दुक्खं अन्नो न परियाइयति अन्नेण कडं अन्नो नो पडिसंवेदेति पत्तेयं जायति पत्तेयं मरइ पत्तेयं चयइ पत्तेयं उववज्जइ पत्तेयं भंभा पत्तेयं सन्ना पत्तेयं मन्ना एवं विन्नु वेदणा ९। इइ खलु णातिसंजोगा णा ताणाए वा णो सरणाए वा, पुरिसे वा एगता पुब्बिं णातिसंजोए विप्पजहति, णातिसंजोगा वा एगता पुब्बिं पुरिसं विप्पजहंति, अन्ने खलु णातिसंजोगा अन्नो अहमंसि, से किमंग पुण वयं अन्नमन्नेहिं णातिसंजोगेहिं मुच्छामो ?, इति संखाए णं वयं णातिसंजोगं विप्पजहिस्सामो १०। से मेहावी जाणोज्जा बहिरंगमेयं, इणमेव उवणीयतराणं, तंजहा-हत्था मे पाया मे वाहा मे ऊरू मे उदरं मे

सीसं मे सीलं मे आऊ मे बलं मे वराणो मे तथा मे छाया मे सोयं मे चक्खु मे घाणं मे जिब्भा मे फासा मे ममाइज्जइ, वयाउ पडिजूरइ, तंजहा-आउओ बलाओ वराणाओ तथाओ छायाओ सोयाओ जाव फासाओ, सुसंधितो संधी विसंधीभवइ, वलियतरंगे गाए भवइ, किगहा केसा पल्लिथा भवंति, तंजहा-जंपि य इमं सरीरगं उरालं आहारोवइयं एयंपि य अणुपु-व्वेणं विप्पजहियव्वं भविस्सति ११। एयं संखाए से भिक्खु भिक्खायरियाए समुट्टिए दुहओ लोमं जाणेज्जा, तंजहा-जीवा चेव अजीवा चेव, तसा चेव थावरा चेव १२ ॥ सूत्रम् १३ ॥

इह खलु गारत्था सारंभा सपरिग्गहा, संतेगतिया समणा माहणावि सारंभा सपरिग्गहा, जे इमे तसा थावरा पाणा ते सयं समारंभति अन्नेणावि समारंभवेति अराणंपि समारभंतं समणुजाणंति १॥ इह खलु गारत्था सारंभा सपरिग्गहा, संतेगतिया समणा माहणावि सारंभा सपरिग्गहा, जे इमे कामभोगा सचित्ता वा अचित्ता वा ते सयं परिगिरहंति अन्नेणावि परिगिरहावेति अन्नंपि परिगिरहंतं समणुजाणंति २ ॥ इह खलु गारत्था सारंभा सपरिग्गहा, संतेगतिया समणा माहणावि सारंभा सपरिग्गहा, अहं खलु अणारंभे अपरिग्गहे, जे खलु गारत्था सारंभा सपरिग्गहा, संतेगतिया समणा माहणावि सारंभा सपरिग्गहा, एतेसिं चेव निस्साए बंभचेरवासं वसिस्सामो, कस्स गां तं हेउं ?, जहा पुव्वं तहा अवरं जहा अवरं तहा पुव्वं, अंजू एते अणुवरया अणुवट्टिया पुणारवि तारिसगा चेव ३ ॥ जे खलु गारत्था सारंभा सपरिग्गहा, संतेगतिया समणा माहणावि सारंभा सपरिग्गहा, दुहतो पावाइं कुव्वंति इति संखाए दोहिवि अंतहिं अदिस्समाणो इति भिक्खु रीएज्जा ४ ॥ से बेमि पाईणं वा ६ जाव एवं से परिगणायकम्मे, एवं से ववेयकम्मे, एवं से विअंतरकारए भवतीति मक्खायं ५ ॥ सूत्रं १४ ॥

तत्थ खलु भगवता ह्यजीवनिकाय हेऊ पराणात्ता, तंजहा-पुट्वाकाए जाव तसकाए, से जहाणामए मम अस्सायं दंडेण वा अट्टीण वा मुट्टीण वा लेलूण वा कवालेण वा आउट्टिज्जमाणास्स वा हम्ममाणास्स वा तज्जिज्जमाणास्स वा ताडिज्जमाणास्स वा परियाविज्जमाणास्स वा किलामिज्जमाणास्स वा उह्विज्जमाणास्स वा जाव लोमुक्खणाणमायमवि हिंसाकारगं दुक्खं भयं पडिसंवेदेमि १ । इच्चेवं जाण सव्वे जीवा सव्वे भूता सव्वे पाणा सव्वे सत्ता दंडेण वा जाव कवालेण वा आउट्टिज्जमाणा वा हम्ममाणा वा तज्जिज्जमाणा वा ताडिज्जमाणा वा परियाविज्जमाणा वा किलामिज्जमाणा वा उह्विज्जमाणा वा जाव लोमुक्खणाणमायमवि हिंसाकारगं दुक्खं भयं पडिसंवेदेंति, एवं नच्चा सव्वे पाणा जाव सत्ता ण हंतव्वा ण अज्जावेयव्वा ण परिघेतव्वा ण परितावेयव्वा ण उह्वेयव्वा २ ॥ से बेमि जे य अतीता जे य पडुप्पन्ना जे य आगमिस्सा अरिहंता भगवंतो सव्वे ते एवमाइक्खंति एवं भासंति एवं पराणवेंति एवं परूवेंति-सव्वे पाणा जाव सत्ता ण हंतव्वा ण अज्जावेयवा ण परिघेतव्वा ण परितावेयव्वा ण उह्वेयव्वा एस धम्मं धुवे णीतिए सासए ममिच्च लोगं खेयन्नेहिं पवेदिए, एवं से भिक्खु विरते पाणातिवायातो जाव विरते परिग्गहातो णो दंतपक्खालणोणं दंते पक्खालेज्जा णो अंजणं णो वमणं णो धूवणो णो तं परिआविएज्जा ३ ॥ से भिक्खु अकिरिए अलूमए अकोहे अमाणो अमाए अलोहे उवसंते परिनिव्वुडे णो आसंसं पुरतो करेज्जा इमेण मे दिट्ठेण वा सुएण वा मएण वा विन्नाएण वा इमेण वा सुचरियतवनियमबंधेरवासेण इमेण वा जायामायावत्तिएणं धम्मं इओ चुए पेच्चा देवे सिया कामभोगाण वसवत्ती सिद्धे वा अदुक्खमसुभे एत्थवि सिया एत्थवि णो सिया ४ ॥ से भिक्खु सहेहिं अमुच्छिए रूवेहिं अमुच्छिए गंधेहिं अमुच्छिए रसेहिं अमुच्छिए फासेहिं अमुच्छिए विरए कोहाओ माणाओ मायाओ लोभाओ पेज्जाओ

दोसात्रो कलहात्रो अन्वक्खाणात्रो पेसुत्रात्रो परपरिवायात्रो अरइरईत्रो
 मायामोसात्रो मिच्छादंसणसल्लात्रो इति से महतो आयाणात्रो उवसंते उव-
 ट्टिए पडिविरते से भिक्खू ५ ॥ जे इमे तसथावरा पाणा भवन्ति ते णो
 सयं समारंभइ णो वज्जणोहिं समारंभवेति अन्ने समारभंतेवि न समण-
 जाणांति इति से महतो आयाणात्रो उवसंते उवट्टिए पडिविरते से भिक्खू
 ६ ॥ जे इमे कामभोगा सचित्ता वा अचित्ता वा ते णो सयं परिगिराहति
 णो अन्नेणं परिगिराहावेति अन्नं परिगिराहंतंपि ण समणजाणांति इति से
 महतो आयाणात्रो उवसंते उवट्टिए पडिविरते से भिक्खू ७ ॥ जंपिय इमं
 संपराइयं कम्मं कज्जइ, णो तं सयं करेति णो अराणां कारवेति अन्नंपि
 करेत्तं ण समणजाणइ इति, से महतो आयाणात्रो उवसंते उवट्टिए पडि-
 विरते ८ ॥ से भिक्खू जाणेज्जा असणां वा ४ अस्सि पडियाए एगं
 साहम्मियं समुद्दिस्स पाणाइं भूताइं जीवाइं सत्ताइं समारंभ समुद्दिस्स कीतं
 पामिच्चं अच्छिज्जं अणिसट्ठं अभिहडं आहट्ठुद्देसियं तं चेतियं सिया
 तंजहा अप्पणो पुत्ताइणट्ठाए जाव आएमाए पुट्ठो पहेणाए सामासाए पाय-
 रासाए संणिहिसंणिचत्रो किज्जइ, इहएतेसिं माणवाणां भोयणाए (अह पुण
 एवं जाणेज्जा विज्जति तेसिं परकमे जस्सट्ठाए चेइयं सित्रा तंजहा—अप्पणो
 पुत्ताणं धूयाणं सुरहाणं धाईणं णातीणं राईणं दासाणं दासीणं कम्मकराणं
 कम्मकरीणं आएसाणं पुट्ठोपहेणाए सामासाए पातरासाए सन्निहीसन्निचए
 किज्जइ इहमेगेसिं माणवाणां भोयणाए) णो सयं भुंजइ णो अराणेणं भुंजा-
 वेति अन्नंपि भुंजंतं ण समणजाणइ इति, से महतो आयाणात्रो उवसंते
 उवट्टिए पडिविरते ९ ॥ तत्थ भिक्खू परकडं परणिट्ठितमुग्गमुप्पायणोसणा-
 सुद्धं सत्थाइयं सत्थपरिणामियं अविहिंसियं एसियं वेसियं सामुदाणियं पत्तमसाणं
 कारणाट्ठा पमाणजुत्तं अक्खोवंजणवणलेवणभूयं संजमजायामायावत्तियं बिलमिव
 पन्नगभूतेणं अप्पाणेणं आहारं आहारेज्जा अन्नं अन्नकाले पाणं पाणकाले

वत्थं वत्थकाले लेणं लेणकाले सयणं सयणकाले १०॥ से भिक्खु मायन्ने
 अन्नयरं दिसं अणुदिसं वा पडिवन्ने धम्मं आइक्खे विभए किट्टे उवट्टिएसु
 वा अणुवट्टिएसु वा सुस्सुसमाणेसु पवेदए, संतिविरतिं उवसमं निव्वाणं सोय-
 वियं अज्जवियं महवियं लाघवियं अणतिवातियं सव्वेसिं पाणाणं सव्वेसिं भूताणं
 जाव सत्ताणं अणुवाइं किट्टए धम्मं ११॥ से भिक्खु धम्मं किट्टमाणे णो अन्नस्स
 हेउं धम्ममाइक्खेज्जा, णो पाणास्स हेउं धम्ममाइक्खेज्जा, णो वत्थस्स हेउं
 धम्ममाइक्खेज्जा, णो लेणस्स हेउं धम्ममाइक्खेज्जा, णो सयणस्स हेउं धम्म-
 माइक्खेज्जा, णो अन्नेसिं विरूवरूवाणं कामभोगाणं हेउं धम्ममाइक्खेज्जा,
 अगिलाए धम्ममाइक्खेज्जा, नन्नत्थ कम्मनिज्जरट्टाए धम्ममाइक्खेज्जा १२॥ इह
 खलु तस्स भिक्खुस्स अंतिए धम्मं सोच्चा णिसम्म उट्टाणेणं उट्टाय
 वीरा अस्सि धम्मे समुट्टिया जे तस्स भिक्खुस्स अंतिए धम्मं सोच्चा णिसम्म
 सम्मं उट्टाणेणं उट्टाय वीरा अस्सि धम्मे समुट्टिया ते एवं सव्वोवगता ते एवं
 सव्वोवर(ग)ता ते एवं सव्वोवसंता ते एवं सव्वत्ताए परिनिव्वुडत्तिबेमि १३॥
 एवं से भिक्खु धम्मट्ठी धम्मविऊ णियागपडिवरणे से जहेयं बुतियं अदुवा
 पत्ते पउमवरपोंडरीयं अदुवा अपत्ते पउमवरपोंडरीयं, एवं से भिक्खु परिणाय-
 यकम्मे परिणायसंगे परिणायगेहवासे उवसंते समिए सहिए सया जए,
 सेवं वयणिज्जे, (वत्तव्वे) तंजहा-समणेति वा माहणेति वा खंतेति वा
 दंतेति वा गुत्तेति वा मुत्तेति वा इसीति वा मुणीति वा कतीति वा विअति वा
 भिक्खुति वा लूहेति वा तीरट्ठीति वा चरणकरणपारविउत्तिबेमि १४ ॥सूत्र-१५॥

॥ इति प्रथममध्ययनम् ॥ श्रुतस्कंधः २ः अ०१ ॥



॥ अथ द्वितीयं क्रियास्थानाख्याध्ययनम् ॥

सुयं मे आउसंतेणं भगवया एवमक्खायं-इह खलु किरियाठागो
 णामज्झयणो पराणत्ते, तस्स णं अयमट्ठे-इह खलु संजूहेणं दुवे ठागो एवमा-
 हिज्जंति, तंजहा-धम्मे चेव अधम्मे चेव उदसंते चेव अणुवसंते चेव १॥
 तत्थ णं जे से पढमस्स ठाणस्स अहम्मपक्खस्स विभंगे तस्स णं अयमट्ठे
 पराणत्ते, इह खलु पाईणं वा ६ संतेगतिया मणुस्सा भवंति, तंजहा-आरिया
 वेगे अणारिया वेगे उच्चागोया वेगे णीयागोया वेगे कायमंता वेगे रहस्समंता
 वेगे सुवराणा वेगे दुब्बराणा वेगे सुख्वा वेगे दुरूवा वेगे २॥ तेसिं च णं
 इमं एतारूवं दंडसमादाणं संपेहाए तंजहा-णोरइएसु वा तिरिक्खजोणिएसु
 वा मणुस्सेसु वा देवेसु वा जे यावन्ने तहप्पगारा पाणा विन्नु वेयणं वेयंति
 ३॥ तेसिं पि य णं इमाइं तेरस किरियाठाणाइं भवंतीति एवमक्खायं, तं-
 जहा-अट्ठादंडे १ अणट्ठादंडे २ हिंसादंडे ३ अकम्हादंडे ४ दिट्ठीविपरिया-
 सियादंडे ५ मोसवत्तिए ६ अदिन्नादाणवत्तिए ७ अज्झत्थवत्तिए ८ माणव-
 त्तिए ९ मित्तदोसवत्तिए १० मायावत्तिए ११ लोभवत्तिए १२ इरियावहिए
 १३ ॥सूत्रं १६॥

पढमे दंडसमादाणो अट्ठादंडवत्तिएत्ति आहिज्जइ, से जहाणामए केइ
 पुरिसे आयहेउं वा णाइहेउं वा अगारहेउं वा परिवारहेउं वा मित्तहेउं वा
 णागहेउं वा भूतहेउं वा जक्खहेउं वा तं दंडं तसथावरेहिं पाणोहिं सयमेव
 णिसिरिति अराणोणवि णिसिरावेति अराणपि णिसिरंतं समणुजाणइ, एवं
 खलु तस्स तप्पत्तियं सावज्जंति आहिज्जाइ, पढमे दंडसमादाणो अट्ठादंडव-
 त्तिएत्ति आहिए ॥ सूत्रं १७॥

अहावरे दोच्चे दंडसमादाणो अणट्ठादंडवत्तिएत्ति आहिज्जइ, से जहा-
 णामए केइ पुरिसे जे इमे तसा पाणा भवंति ते णो अच्चाए णो-अजिणाए

गो मंसाए गो सोणियाए एवं हिययाए पित्ताए वसाए पिच्छाए पुच्छाए
 वालाए सिंगाए विसाणाए दंताए दाढाए गहाए गहारुणिए अट्टीए अट्टिमं-
 जाए गो हिंसिसु मेत्ति गो हिंसंति मेत्ति गो हिंसिस्संति मेत्ति गो पुत्तपो-
 सणाए गो पसुपोसण्याए गो अगारपरिवूहणाताए गो समणमाहणावत्तणाहेउं
 गो तस्स सरीरगस्स किंचि विपरियादित्ता भवंति, से हंता छेत्ता भेत्ता लुं प-
 इत्ता विलुं पइत्ता उद्वइत्ता उज्झिउं बाले वेरस्स आभागी भवति, अणट्टादंडे
 १॥ से जहाणामए केइ पुरिसे जे इमे थावरा पाणा भवंति, तंजहा-इक्कडा इ
 वा कडिणा इ वा जंतुगा इ वा परगा इ वा मोक्खा इ वा तणा इ वा कुसा इ वा
 कुच्छगा इ वा पव्वगा इ वा पलाला इ वा, ते गो पुत्तपोसणाए गो पसुपोस-
 णाए गो अगारपडिवूहणायाए गो समणमाहणापोसण्याए गो तस्स सरीर-
 गस्स किंचि विपरियाइत्ता भवंति, से हंता छेत्ता भेत्ता लुं पइत्ता विलुं पइत्ता उद्व-
 इत्ता उज्झिउं बाले वेरस्स आभागी भवति, अणट्टादंडे २॥ से जहाणामए
 केइ पुरिसे कच्छंसि वा दहंसि वा उदगंसि वा दवियंसि वा वलयंसि वा
 गूमंसि वा गहणंसि वा गहणविदुग्गंसि वा वणंसि वा वणविदुग्गंसि वा
 पव्वयंसि वा पव्वयविदुग्गंसि वा तणाइं ऊसविय ऊसविय सयमेव अगणिकायं
 णिसिरति अरणोणावि अगणिकायं णिसिरावेति अरणंपि अगणिकायं
 णिसिरितं समणुजाणइ अणट्टादंडे, एवं खलु तस्स तप्पत्तियं सावज्जन्ति आहि-
 ज्जइ, दोच्चे दंडसमादाणे अणट्टादंडवत्तिएत्ति आहिए ३॥ सूत्रम् १८ ॥

अहावरे तच्चे दंडसमादाणे हिंसादंडवत्तिएत्ति आहिज्जइ, से जहा-
 णामए केइ पुरिसे ममं वा ममिं वा अन्नं वा अन्नि वा हिंसिसु वा हिंसइ
 वा हिंसिस्सइ वा तं दंडं तसथावरेहिं पाणेहिं सयमेव णिसिरति अरणोणावि
 णिसिरावेति अन्नपि णिसिरितं समणुजाणइ हिंसादंडे, एवं खलु तस्स
 तप्पत्तियं सावज्जन्ति आहिज्जइ, तच्चे दंडसमादाणे हिंसादंडवत्तिएत्ति
 आहिए ॥ सूत्रम् १९ ॥

अहावरे चउत्थे दंडसमादागो अकस्मात् दराडवत्तिएत्ति आहिज्जइ, से जहाणामए केइ पुरिसे कच्छंसि वा जाव वण(पव्वय)विदुग्गंसि वा मियवत्तिए मियसंकप्पे मियपणिहागो मियवहाए गंता एए मियत्तिकाउं अन्नयरस्स मियस्स वहाए उसुं आयामेत्ता गां णिसिरेज्जा, स मियं वहिस्सामित्ति कट्टु तित्तिरं वा वट्टुगं वा चडगं वा लावगं वा कवोयगं वा कविं वा कविंजलं वा विंधित्ता भवइ, इह खलु से अन्नस्स अट्टाए अराणां फुसति अकम्हादंडे १॥ से जहाणामए केइ पुरिसे सालीणि वा वीहीणि वा कोइवाणि वा कंगूणि वा परगाणि वा रालाणि वा णिलिज्जमाणो अन्नयरस्स तणास्स वहाए सत्थं णिसिरेज्जा, से सामगं (मयणागं मुगुणागं) तणागं कुमुदुगं वीही-ऊसियं कलेसुयं तणां छिंदिस्सामित्ति कट्टु सालिं वा वीहिं वा कोइवं वा कंगुं वा परगं वा रालयं वा छिंदित्ता भवइ, इति खलु से अन्नस्स अट्टाए अन्नं फुसति अकम्हादंडे, एवं खलु तस्स तप्पत्तियं सावज्जं आहिज्जइ, चउत्थे दंडसमादागो अकम्हादंडवत्तिए आहिए २॥ सूत्रम् २० ॥

अहावरे पंचमे दंडसमादागो दिट्ठिविपरियासियादंडवत्तिएत्ति आहि-ज्जइ, से जहाणामए केइ पुरिस माईहिं वा पिईहिं वा भाईहिं वा भगिणीहिं वा भज्जाहिं वा पुत्तेहिं वा धूताहिं वा सुगहाहिं वा सद्धिं संवसमाणो मित्तं अमित्तमेव मन्नमाणो मित्ते हयपुव्वे भवइ दिट्ठिविपरियासियादंडे ॥ से जहा-णामए केइ पुरिसे गामघायंसि वा णगरघायंसि वा खेड० कव्वड० मडंब-घायंसि वा दोणमुहघायंसि वा पट्टणाघायंसि वा आसमघायंसि वा सन्निवे-सघायंसि वा निग्गमघायंसि वा रायहाणिघायंसि वा अतेणां तेणामिति मन्न-माणो अतेणो हयपुव्वे भवइ दिट्ठिविपरियासियादंडे, एवं खलु तस्स तप्पत्तियं सावज्जंति आहिज्जइ, पंचमे दंडसमादागो दिट्ठिविपरियासियादंडवत्तिएत्ति आहिए ॥ सूत्रम् २१ ॥

अहावरे छट्ठे किरियट्टाणे मोसावत्तिएत्ति आहिज्जइ, से जहाणामए केइ पुरिसे आयहेउं वा गाइहेउं वा अगारहेउं वा परिवारहेउं वा सयमेव मुसं वयति अरणोणवि मुसं वाएइ मुसं वयंतंपि अरणं समणुजाणइ, एवं खलु तस्स तप्पत्तियं सावज्जंति आहिज्जइ, छट्ठे किरियट्टाणे मोसावत्तिएत्ति आहिए ॥ सूत्रम् २२ ॥

अहावरे सत्तमे किरियट्टाणे अदिन्नादाणवत्तिएत्ति आहिज्जइ, से जहाणामए केइ पुरिसे आयहेउं वा जाव परिवारहेउं वा सयमेव अदिन्नं आदियइ अन्नेणवि अदिन्नं आदियावेति अदिन्नं आदियंतं अन्नं समणुजाणइ, एवं खलु तस्स तप्पत्तियं सावज्जंति आहिज्जइ, सत्तमे किरियट्टाणे अदिन्नादाणवत्तिएत्ति आहिए ॥ सूत्रम् २३ ॥

अहावरे अट्टमे किरियट्टाणे अज्झत्थवत्तिएत्ति आहिज्जइ, से जहाणामए केइ पुरिसे णत्थि णं केइ किंचि विसंवादेति सयमेव हीणे दीणे दुट्ठे दुम्मणे ओहयमसंकप्पे चिंतासोगरसंपविट्ठे करतलपल्हत्थमुहे अट्टज्झाणावगए भूमिगयदिट्ठिए भियाइ, तस्स णं अज्झत्थया असंसइया चत्तारि ठाणा एवमहिज्जइ (ज्जंति) तंजहा—कोहे माणे माया लोहे, अज्झत्थमेव कोहमाणमायालोहे, एवं खलु तस्स तप्पत्तियं सावज्जंति आहिज्जइ, अट्टमे किरियट्टाणे अज्झत्थवत्तिएत्ति आहिए ॥ सूत्रम् २४ ॥

अहावरे णवमे किरियट्टाणे माणवत्तिएत्ति आहिज्जइ, से जहाणामए केइ पुरिसे जातिमएण वा कुलमएण वा बलमएण वा रूवमएण वा तवमएण वा सुयमएण वा लाभमएण वा इस्सरियमएण वा पन्नामएण वा अन्नतरेण वा मयट्टाणोणं मत्ते समाणे परं हीलेति निंदेति खिंसति गरहति परिभवइ अवमराणेति, इत्तरिए अयं, अहमंसि पुण विसिट्ठजाइकुलबलाइगुणोववेए, एवं अप्पाणं समुक्कसे, देहच्चुए कम्मवित्तिए अवसे पयाइ, तंजहा—गब्भाओ गब्भं ४ जम्माओ जम्भं माराओ मारं णरगाओ णरगं चंडे थद्धे चवले

मणी यावि भवइ, एवं खलु तस्स तप्पत्तियं सावज्जंति आहिज्जइ, णवमे किरियाठगो माणवत्तिएत्ति आहिए ॥सूत्रम् २५॥

अहावरे दसमे किरियट्ठागो मित्तदोसवत्तिएत्ति आहिज्जइ, से जहाणामए केइ पुरिसे माईहिं वा पितीहिं वा भाईहिं वा भइणीहिं वा भज्जाहिं वा धूयाहिं वा पुत्तेहिं वा सुरहाहिं वा सद्धिं संवसमाणे तेसिं अन्नयरंसि अहालहुगंसि अवरहंसि सयमेव गरुयं दंडं निवत्तेति, तंजहा—सीओदगवियडंसि वा कायं उच्छोलित्ता भवति, उसिणोदगवियडेण वा कायं ओसिंचित्ता भवति, अगणिकारणं कायं उवडहित्ता भवति, जोत्तेण वा वेत्तेण वा गोत्तेण वा तथाइ वा [कराणोण वा छियाए वा] लयाए वा अन्नयरेण वा दवरणण पासाइं उहालित्ता भवति, दंडेण वा अट्टीण वा मुट्टीण वा लेलूण वा कवालेण वा कायं आउट्टित्ता भवति, तहप्पगारे पुरिसजाए संवसमाणे दुम्मणा भवति, पवसमाणे सुमणा भवति, तहप्पगारे पुरिसजाए दंडपासी दंडगुरुए दंडपुरक्कडे अहिए इमंसि लोगंसि अहिए परंसि लोगंसि संजलगो कोहगो पिट्टिमंसि यावि भवति, एवं खलु तस्स तप्पत्तियं सावज्जंति आहिज्जति, दसमे किरियट्ठागो मित्तदोसवत्तिएत्ति आहिए ॥सूत्रम् २६॥

अहावरे एकारसमे किरियट्ठागो मायावत्तिएत्ति आहिज्जइ, जे इमे भवंति—गूढायारा तमोकसिया उलुगपतलहुया पव्वयगुरुया ते आयरियावि संता अणारियाओ भासाओवि पउज्जंति, अन्नहामंतं अप्पाणं अन्नहा मन्नंति, अन्नं पुट्ठा अन्नं वागरंति, अन्नं आइक्खियव्वं अन्नं आइक्खंति १ ॥ से जहाणामए केइ पुरिसे अंतोसल्ले तं सल्लं णो सयं णिहरति णो अन्नेण णिहरावेति णो पडिविद्धंसेइ, एवमेव निराहवेइ, अविउट्टमाणे अंतोअंतो रियइ २ । एवमेव माई मायं कट्टु णो आलोएइ णो पडिक्कमेइ णो णिदइ णो गरहइ णो विउट्टइ णो विसोहेइ णो अकरणाए अब्भुट्ठेइ णो अहारिहं तवोकम्मं पायच्छित्तं पडिवज्जइ, माई अस्सि लोए पचाथाइ माइ

परंसि लोए पुणो पुणो पचायाइ निंदइ गरहइ पसंसइ णिच्चरइ नियट्टइ
णिमिरियं दंडं छाएति, माई असमाहडसुहलेस्से यावि भवइ, एवं खलु तस्स
तप्पत्तियं सावज्जति आहिज्जइ, एकारसमे किरियट्टाणो मायावत्तिएत्ति
आहिए ३ ॥ सूत्रं २७ ॥

अहावरे बारसमे किरियट्टाणो लोभवत्तिएत्ति आहिज्जइ, जे इमे
भवन्ति, तंजहा-आरन्निया आवसहिया गामंतिया कणहुईरहस्सिया णो
बहुसंजया णो बहुपडिविरया सब्बपाणभूतजीवसत्तेहिं ते अप्पणो सच्चामोसाई
एवं विउंजंति, अहं ण हंतव्वो अन्ने हंतव्वा अहं ण अज्जावेयव्वो अन्ने
अज्जावेयव्वा अहं ण परिघेतव्वो अन्ने परिघेतव्वा अहं ण परितावेयव्वो
अन्ने परितावेयव्वा अहं ण उद्वेयव्वो अन्ने उद्वेयव्वा १ । एवमेव ते
इत्थिकामेहिं मुच्छिया गिद्धा गढिया गरहिया अज्जभोववन्ना जाव वासाइं
चउपंचमाइं छद्दसमाइं अप्पयरो वा भुज्जयरो वा भुंजित्तु भोगभोगाइं काल-
मासे कालं किञ्चा अन्नयरोसु आसुरिएसु किब्बिसिएसु ठाणोसु उववत्तारो
भवन्ति २ । ततो विप्पमुच्चमाणो भुज्जो भुज्जो एलमूयत्ताएतमूयत्ताए जाइमूयत्ताए
पचायन्ति, एवं खलु तस्स तप्पत्तियं सावज्जंति आहिज्जइ, दुवालसमे किरिय-
ट्टाणो लोभवत्तिएत्ति आहिए ३ ॥ इच्चेयाइं दुवालस किरियट्टाणाइं दविणां
समणोण वा माहणेण वा सम्मं सुपरिजाण्णिव्वाइं भवन्ति ४ ॥ सूत्रं २८ ॥

अहावरे तेरसमे किरियट्टाणो इरियावहिएत्ति आहिज्जइ, इह खलु
अत्तत्ताए संबुडस्स अण्णारस्स ईरियासमियस्स भासासमियस्स एसणासमि-
यस्स आयाणभंडमत्तणिक्खेवणासमियस्स उच्चारपासमाणखेलसिंघाणजल्लपारि-
ट्टावणियासमियस्स मणसमियस्स वयसमियस्स कायसमियस्स मणगुत्तस्स वय-
गुत्तस्स कायगुत्तस्स गुत्तस्स गुत्तिंदियस्स गुत्तवंभयारिस्स आउत्तं गच्छमाणस्स
आउत्तं चिट्टमाणस्स आउत्तं णिसीयमाणस्स आउत्तं तुयट्टमाणस्स आउत्तं
भुंजमाणस्स आउत्तं भासमाणस्स आउत्तं वत्थं पडिगगहं कंबलं पायपुंछणां

गिराहमाणस्स वा णिक्खिदमाणस्स वा जाव चक्खुपम्हणिवायमवि अत्थि विमाथा सुट्टुमा किरिया ईरियावहिया नाम कज्जइ १ । सा पढमसमए बद्धा पुट्टा वितीयममए वेइया तइयसमए णिज्जिरणा सा बद्धा पुट्टा उदीरिया वेइया णिज्जिरणा सेयकाले अकम्मे यावि भवति, एवं खलु तस्स तप्पत्तियं साव-ज्जंति आहिज्जइ, तेरसमे किरियट्टाणे ईरियावहिएत्ति आहिज्जइ २ ॥ से बेमि जे य अतीता जे य पडुपन्ना जे य आगमिस्सा अरिहंता भगवंता सव्वे ते एयाइं चेव तेरस किरियट्टाणाइं भासिंसु वा भासेंति वा भासिस्संति वा पन्नविंसुं वा पन्नविंति वा पन्नविस्संति वा, एवं चेव तेरसमं किरियट्टाणां सेविंसु वा सेवंति वा सेविस्संति वा ३॥ सूत्रं २१॥

अदुत्तरं च णं पुरिसविजयं विभंगमाइक्खिस्सामि, इह खलु णाणाप-
 राणाणं णाणाच्छंदाणं णाणासीलाणं णाणादिट्ठीणं णाणारूईणं णाणारंभाणं
 णाणाज्भवसाणसंजुत्ताणं णाणाविहपावसुयज्भयणं एवं भवइ, तंजहा—भोमं
 उप्पायं सुविणं अंतलिकखं अंगं सरं लक्खणं वंजणं इत्थिलक्खणं पुरिस-
 लक्खणं हयलक्खणं गयलक्खणं गोणलक्खणं मिट्ठलक्खणं कुक्कडलक्खणं
 तित्तिरलक्खणं वट्टगलक्खणं लावयलक्खणं चक्कलक्खणं छत्तलक्खणं
 चम्मलक्खणं दंडलक्खणं असिलक्खणं मणिलक्खणं कागिणिलक्खणं सुभ-
 गाकरं दुब्भगाकरं गब्भकरं मोहणकरं आहव्वणिं पागसासणिं दव्वहोमं खत्तिय-
 विज्जं चंद्रचरियं सूरचरियं सुक्कचरियं बहस्सइचरियं उक्कापायं दिसादाहं मिय-
 चक्कं वायसपरिमंडलं पंसुबुट्ठिं केसबुट्ठिं मंसबुट्ठिं रुहिरबुट्ठिं वेतालं अद्ध-
 वेतालं ओसोवणिं तालुगघाडणिं सोवाणिं सोवरिं दामिलिं कालिणिं गोरिं
 गंधारिं ओवतणिं उप्पयणिं जंभणिं थंभणिं लेसणिं आमयकरणिं विसल्ल-
 करणिं पक्कमणिं अंतद्धाणिं आयमिणिं, एवमाइआओ विजाओ अन्नस्स हेउं
 पउंजंति, पाणस्स हेउं पउंजंति वत्थस्स हेउं पउंजंति लेणस्स हेउं पउंजंति
 सयणस्स हेउं पउंजंति । अन्नेसिं वा विरूवरूवाणां कामभोगाणां हेउं पउंजंति,

तिरिच्छं ते विज्जं सेवेति, ते अणारिया विप्पडिवन्ना कालमासे कालं किञ्चा
अन्नयराइं आसुरियाइं किच्चिसियाइं ठाणाइं उववत्तारो भवंति, ततोऽवि
विप्पमुच्चमाणा भुज्जो एल्लमूयताए तमअंधाए पच्चयंति ॥सूत्रं ३०॥

से एगइत्थो आयहेउं वा णायहेउं वा सयणहेउं वा अणारहेउं वा
परिवारहेउं वा नायगं वा सहवासियं वा णिस्साए अदुवा अणुगामिए १
अदुवा उवचरेए २ अदुवा पडिपहिए ३ अदुवा संधिच्छेदए ४ अदुवा गंठि-
च्छेदए ५ अदुवा उरब्भिए ६ अदुवा सोवरिए ७ अदुवा वागुरिए ८ अदुवा
साउणिए ९ अदुवा मच्छिए १० अदुवा गोघायए ११ अदुवा गोवालए
१२ अदुवा सोवणिए (सेयणए) १३ अदुवा सोवणियंतिए १४-१ ॥ से एग-
इत्थो अणुगामियभावं पडिसंधाय तमेव अणुगामियाणुगामियं हंता छेत्ता
भेत्ता लुंपइत्ता विलुंपइत्ता उद्वइत्ता आहारं आहारेति, इति से महया पावेहिं
कम्मेहिं अत्ताणं उवखाइत्ता भवइ २॥ से एगइत्थो उवचरयभावं पडिसंधाय
तमेव उवचरियं हंता छेत्ता भेत्ता लुंपइत्ता विलुंपइत्ता उद्वइत्ता आहारं
आहारेति, इति से महया पावेहिं कम्मेहिं अत्ताणं उवखाइत्ता भवइ ३॥
से एगइत्थो पाडिपहियभावं पडिसंधाय तमेव पाडिपहे ठिच्चा हंता छेत्ता भेत्ता
लुंपइत्ता विलुंपइत्ता उद्वइत्ता आहारं आहारेति, इति से महया पावेहिं
कम्मेहिं अत्ताणं उवखाइत्ता भवइ ४॥ से एगइत्थो सधिच्छेदगभावं पडिसं-
धाय तमेव संधिं छेत्ता भेत्ता जाव इति से महया पावेहिं कम्मेहिं अत्ताणं
उवखाइत्ता भवइ ५॥ से एगइत्थो गंठिच्छेदगभावं पडिसंधाय तमेव गंठिं छेत्ता
भेत्ता जाव इति से महया पावेहिं कम्मेहिं अत्ताणं उवखाइत्ता भवइ ६॥ से
एगइत्थो उरब्भियभावं पडिसंधाय उरब्भं वा अणुत्तरं वा तसं पाणं हंता
जाव उवखाइत्ता भवइ । एसो अभिलावो सच्चत्थ ७॥ से एगइत्थो सोयरि-
यभावं पडिसंधाय महिसं वा अणुत्तरं वा तसं पाणं जाव उवखाइत्ता भवइ
८॥ से एगइत्थो वागुरियभावं पडिसंधाय मियं वा अणुत्तरं वा तसं पाणं

हंता जाव उक्खाइत्ता भवइ १॥ से एगइत्रो सउणियभावं पडिसंधाय सउणिं वा अरण्णतरं वा तसं पाणं हंता जाव उक्खाइत्ता भवइ १०॥ से एगइत्रो मच्छियभावं पडिसंधाय मच्छं वा अरण्णतरं वा तसं पाणं हंता जाव उक्खाइत्ता भवइ ११॥ से एगइत्रो गोघायभावं पडिसंधाय तमेव गोणं वा अरण्णयरं वा तसं पाणं हंता जाव उक्खाइत्ता भवइ १२॥ से एगइत्रो गोवालभावं पडिसंधाय तमेव गोवालं (गोणं) वा परिजविय परिजविय हंता जाव उक्खाइत्ता भवइ १३॥ से एगइत्रो सोवणियभावं पडिसंधाय तमेव सुणं वा अन्नयरं वा तसं पाणं हंता जाव उक्खाइत्ता भवइ १४॥ से एगइत्रो सोवणियंतियभावं पडिसंधाय तमेव मणुस्सं वा अन्नयरं वा तसं पाणं हंता जाव आहारं आहारेति, इति से महया पावेहिं कम्मेहिं अत्ताणं उक्खाइत्ता भवइ १५॥ सूत्रं ३१ ॥

से एगइत्रो परिसामज्जात्रो उट्टित्ता अहमेयं हणामित्ति कट्टु तित्तिरं वा वट्टुगं वा लावगं वा कवोयगं वा कविंजलं वा अन्नयरं वा तसं पाणं हंता जाव उक्खाइत्ता भवइ १ ॥ से एगइत्रो केणइ आयाणोणं विरुद्धे समाणे अदुवा खलदाणोणं अदुवा सुराथालएणं गाहावतीण वा गाहावइपुत्ताण वा सयमेव अगणिकाएणं सस्साइं भामेइ अन्नेणवि अगणिकाएणं सस्साइं भामावेइ अगणिकाएणं सस्साइं भामंतंपि अन्नं समणुजाणइ इति से महया पावकमेहिं अत्ताणं उक्खाइत्ता भवइ २ ॥ से एगइत्रो केणइ आयाणोणं विरुद्धे समाणे अदुवा खलदाणोणं अदुवा सुराथालएणं गाहावतीण वा गाहावइपुत्ताण वा उट्टाण वा गोसाण वा घोडगाण वा गइभाण वा सयमेव घूरात्रो कप्पेति अन्नेणवि कप्पावेति कप्पंतंपि अन्नं समणुजाणइ इति से महया जाव भवइ ३ ॥ से एगइत्रो केणइ आयाणोणं विरुद्धे समाणे अदुवा खलदाणोणं अदुवा सुराथालएणं गाहावतीण वा गाहावइपुत्ताण वा उट्टसालात्रो वा गोणसालात्रो वा घोडगसालात्रो वा गइभसालात्रो

वा कंटकबोंदियाए पडिपेहिता सयमेव अगणिकाएणां भामेइ अन्नेणवि
 भामावेइ भामंतंपि अन्नं समणुजाणइ इति से महया जाव भवइ ४ ॥ से
 एगइत्रो केणइ आयाणेणं विरुद्धे समाणे अदुवा खलदाणेणं अदुवा सुरा-
 थालेणं गाहावतीण वा गाहावइपुत्ताण वा कुंडलं वा मणिं वा मोत्तियं
 वा सयमेव अवहरइ अन्नेणवि अवहरावइ अवहरंतंपि अन्नं समणुजाणइ
 इति से महया जाव भवइ ५ ॥ से एगइत्रो केणइवि आदाणेणं विरुद्धे
 समाणे अदुवा खलदाणेणं अदुवा सुराथालेणं समणाण वा माहणाण वा
 छत्तगं वा दंडगं वा भंडगं वा मत्तगं वा लट्ठिं वा भिसिगं वा चेलगं वा
 चिलिमिलिगं वा चम्मयं वा छेयणं वा चम्मकोसियं वा सयमेव अवहरति
 जाव समणुजाणइ इति से महया जाव उवक्खाइत्ता भवइ ६ ॥ से एगइत्रो
 णो वितिगिंछइ तं०—गाहावतीण वा गाहावइपुत्ताण वा सयमेव अगणि-
 काएणां ओसहीत्रो भामेइ जाव अन्नंपि भामंतं समणुजाणइ इति से महया
 जाव उवक्खाइत्ता भवति ७ ॥ से एगइत्रो णो वितिगिंछइ, तं०—गाहावतीण
 वा गाहावइपुत्ताण वा उट्टाण वा गोणाण वा घोडगाण वा गहभाण वा सय-
 मेव वूरात्रो कप्पेइ अन्नेणवि कप्पावेति अन्नंपि कप्पंतं समणुजाणइ ८ ॥ से
 एगइत्रो णो वितिगिंछइ तं०—गाहावतीण वा गाहावइपुत्ताण वा अट्टसालात्रो
 वा जाव गहभसालात्रो वा कंटकबोंदियाहिं पडिपेहिता सयमेव अगणिकाएणां
 भामेइ जाव समणुजाणइ ९ ॥ से एगइत्रो णो वितिगिंछइ, तं०—गाहावतीण
 वा गाहावइपुत्ताण वा जाव मोत्तियं वा सयमेव अवहरइ जाव समणुजाणइ १०
 ॥ से एगइत्रो णो वितिगिंछइ तं०—समणाण वा माहणाण वा छत्तगं
 वा दंडगं वा जाव चम्मच्छेदणं वा सयमेव अवहरइ जाव समणुजाणइ
 इति से महया जाव उवक्खाइत्ता भवइ ११ ॥ से एगइत्रो समणं वा माहणं
 वा दिस्सा णाणाविहेहिं पावकम्मेहिं अत्ताणं उवक्खाइत्ता भवइ, अदुवा णं
 अच्छराए आफालित्ता भवइ, अदुवा णं फरुसं वदित्ता भवइ, कालेणवि से

अणुपविट्टस्स असणां वा पाणां वा जाव णो द्वावेत्ता भवइ १२ ॥ जे इमे भवन्ति वोनमंता भारक्कंता अलसगा वसलगा किदणगा समणगा पव्वयंति ते इणमेव जीवितं थिज्जीवितं संपडिबूहेति, नाइ ते परलोगस्स अट्टाए किंचिवि सिलीसंति, ते दुक्खंति ते सोयंति ते जूरंति ते तिप्पंति ते पिट्ठंति ते परितप्पंति ते दुक्खणजूरणसोयणतिप्पणपिट्ठणपरितिप्पणवहवंधणपरिकिलेसाओ अप्पडिविरया भवंति, ते महया आरंभेणां ते महया समारंभेणां ते महया आरंभसमारंभेणां विरूवरूवेहिं पावकम्मकिच्चेहिं उरालाइं माणुस्सगाइं भोगभोगाइं भुंजित्तारो भवंति, तंजहा-अन्नं अन्नकाले पाणां पाणाकाले वत्थं वत्थकाले लेणां लेणकाले सयणां सयणकाले सपुव्वावरं च णं राहाए कयवलिकम्मे कयकोउयमंगलपायच्छित्ते सिरसा राहाए कंठेमालाकडे आविद्धमणिसुवन्ने कप्पियमालामळली पडिबद्धसरीरे वग्गारियसोणिसुत्तगमल्लदामकलावे अहतवत्थपरिहिए चंदणोक्खित्तगायसरीरे महतिमहालियाए कूडागारसालाए महतिमहालयंसि सीहासणांसि इत्थीगुम्मसंपरिवुडे सव्वराइएणां जोइणा भियायमाणेणां महयाहयनट्टगीयवाइयतंतीतलतालतुडियघणमुङ्गपड्डपवाइयरेणां उरालाइं मणुस्सगाइं भोगभोगाइं भुंजमाणो विहरइ १३ । तस्स णं एगमवि आणवेमाणस्स जाव चत्तारि पंच जणा अबुत्ता चेव अब्भुट्ठंति, भण्ह देवाणुप्पिया ! किं करेमो ? किं आहरेमो ? किं उवणेमो ? किं आचिट्ठामो ! किं भे हिय इच्छियं ? किं भे आसगस्स सयइ ? १४ ॥ तमेव पासित्ता अणारिया एवं वयंति-देवे खलु अयं पुरिसे, देवमिणाए खलु अयं पुरिसे, अन्नेवि य णं उवजीवंति, तमेव पासित्ता आरिया वयंति-अभिवक्कंतकूरकम्मे खलु अयं पुरिसे अतिधुन्ने अइयायरक्खे दाहिणागामिए नेरइए करहपक्खिए आगमिस्साणां दुल्लहवोहियाए यावि भविस्सइ १५ ॥ इच्चेयस्स ठाणस्स उट्टिया वेगे अभिगिज्झंति अणुट्टिया वेगे अभिगिज्झंति अभिज्झंभाउरा अभिगिज्झंति, एस ठाणे

अणारिए अकेवले अप्पडिपुन्ने अणयाउए असंसुद्धे अमल्लगतणे असि-
द्धिमग्गे अमुत्तिमग्गे अनिब्बाणमग्गे अणिज्जाणमग्गे असव्वदुक्खपहीणमग्गे
एगंतमिच्छे असाहु एस खलु पढमस्स ठाणस्स अधम्मपक्खस्स विभंगे एवमा-
हिए १६ ॥सूत्रं ३२॥

अहावरे दोच्चस्स ट्ठाणस्स धम्मपक्खस्स विभंगं एवमाहिज्जइ, इह खलु
पाईणां वा पडीणां वा उदीणां वा दाहिणां वा संतेगइया मणुस्सा भवंति,
तंजहा—आयरिया वेगे अणारिया वेगे उच्चागोया वेगे णीयागोया वेगे काय-
मंता वेगे रहस्समंता वेगे सुवन्ना वेगे दुवन्ना वेगे सुरूवा वेगे दुरूवा वेगे,
तेसिं च णं खेतत्थूणि परिग्गहियाइं भवंति, एसो आलावगो जहा पोंड-
रीए तहा णोत्तवो, तेणेव अभिलावेण जाव सव्वोवसंता सव्वत्ताए परिनि-
व्वुडेत्तिवेमि ॥ एस ठाणे आरिए केवले जाव सव्वदुक्खपहीणमग्गे एगंत-
सम्मे साहु, दोच्चस्स ठाणस्स धम्मपक्खस्स विभंगे एवमाहिए ॥सूत्रं ३३॥

अहावरे तच्चस्स ट्ठाणस्स मिस्सगस्स विभंगे एवमाहिज्जइ, जे इमे
भवन्ति आरणिगाया आवसहिया गामणियंतिया कराहुईरहस्सिता जाव ते
तथो विप्पमुच्चमाणा भुज्जो एलमूयत्ता एतमूत्ताए पच्चायंति, एस ठाणे अणारिए
अकेवले जाव असव्वदुक्खपहीणमग्गे एगंतमिच्छे असाहु, एस खलु तच्चस्स
ठाणस्स मिस्सगस्स विभंगे एवमाहिए ॥सूत्रं ३४॥

अहावरे पढमस्स ठाणस्स अधम्मपक्खस्स विभंगे एवमाहिज्जइ—इह
खलु पाईणां वा ४ संतेगतिया मणुस्सा भवंति—गिहत्था महिच्छा महारंभा
महापरिग्गहा अधम्मिया अधम्माणुणा अधम्मिट्ठा अधम्मक्खाई अधम्मपाय-
जीविणो अधम्मपविलोई अधम्मपलज्जा अधम्मसीलसमुदायारा अधम्मेषां
चेव वित्तिं कप्पेमाणा विहरंति १ ॥ हण छिंद भिंद विगत्तगा लोहियपाणी
चंडा रुदा खुदा साहस्सिया उक्कुंचणवंचणमायाणियडिकूडकवडसाइसंपत्रो-
गवहुला दुस्मीला दुव्वया दुप्पडियाणंदा असाहु, सव्वाथो पाणाइवायाथो

अप्पडिविरया जावजीवाए जाव सव्वाओ परिग्गहाओ अप्पडिविरया जाव-
जीवाए, सव्वाओ कोहाओ जाव मिच्छादंसणसल्लाओ अप्पडिविरया,
सव्वाओ गहाणुम्महणवराणगगंधविलेवणसइफरिसरसरूवगंधमल्लालंकाराओ
अप्पडिविरया जावजीवाए, सव्वाओ सगडरहजाणजुग्गगिल्लिथिल्लिसिया-
संदमाणियासयणासणजाणवाहणभोगभोयणपवित्थरविहीओ अप्पडिविरया
जावजीवाए, सव्वाओ कयविक्रयमासद्धमासरूवगसंववहाराओ अप्पडिविरया
जावजीवाए, सव्वाओ कयविक्रयमासद्धमासरूवगसंववहाराओ अप्पडिविरया
जावजीवाए, सव्वाओ हिरराणसुवराणधणधराणमणिमोत्तियसंखसिलप्पवाला-
ओ अप्पडिविरया जावजीवाए, सव्वाओ कूडतुलकूडमाणाओ अप्पडिविरया
जावजीवाए, सव्वाओ आरंभसमारंभाओ अप्पडिविरया जावजीवाए,
सव्वाओ कारणाकारावणाओ अप्पडिविरया जावजीवाए, सव्वाओ पयाणपया-
वणाओ अप्पडिविरया जावजीवाए, सव्वाओ कुट्टणपिट्टणतज्जणाताडणावह-
बंधपरिकिलेसाओ अप्पडिविरया जावजीवाए, २ ॥ जे आवरणो तहप्पगारा
सावज्जा अबोहिया कम्मंता परपाणपरियावणाकरा जे अणारिएहिं कज्जंति
ततो अप्पडिविरया जावजीवाए, से जहाणामए केइ पुरिसे कलममसूरतिल-
मुग्गमासनिष्पावकुलत्थयालिसंदगपलिमंथगमादिएहिं अयते कूरे मिच्छादंडं
पउंजंति ३ । एवमेव तहप्पगारे पुरिसजाए तित्तिरवट्टगलावगकवोतक-
विंजलमियमहिसवराहगाहगोहकुम्मसिरिसिवमादिएहिं अयते कूरे मिच्छा-
दंडं पउंजंति ४ । जावि य से बाहिरिया परिसा भवइ, तंजहा-दासे इ वा
पेसे इ वा भयए इ वा भाइल्ले इ वा कम्मकरए इ वा भोगपुरिसे इ वा
तेसिंपि य णं अन्नयरंसि वा अहालहुगंसि अवरहांसि सयमेव गरुयं दंडं
निवत्तेइ, तंजहा-इमं दंडेह इमं मुंडेह इमं तज्जेह इमं तालेह इमं अदुयबंधणं
करेह इमं नियलबंधणं करेह इमं हड्डिबंधणं करेह इमं चारगबंधणं करेह
इमं नियलजुयलसंकोइयमोडियं करेह इमं हत्थच्चिन्नयं करेह इमं पायच्चिन्नयं

करेह इमं कन्नद्धिगाण्यं करेह इमं नक्त्रोदुमीसमुहद्धिन्नयं करेह वेयगच्छहियं
 अंगच्छहियं पक्खाफोडियं करेह इमं गायणुप्पाडियं करेह इमं दंसणुप्पाडियं
 वसणुप्पाडियं जिब्भुप्पाडियं ओलंबियं करेह घसियं करेह घोलियं करेह
 सूलाइयं करेह सूलाभिन्नयं करेह खारवत्तियं करेह वज्जवत्तियं करेह
 सीहपुच्छियगं करेह वसभपुच्छियगं करेह दवग्गि(कडग्गि)दड्डयगं कागणिमं-
 सखावियगं भत्तपाणनिरुद्धगं इमं जावज्जीवं वहबंधणां करेह इमं अन्नयरेणां
 असुभेणां कुमारेणां मारेह ५॥ जावि य से अन्भितरिया परिसा भवइ,
 तंजहा-माया इ वा पिया इ वा भाया इ वा भगिणी इ वा भज्जा इ वा पुत्ता इ वा
 धूता इ वा सुराहा इ वा, तेसिंपि य णां अन्नयरंसि अहालहुगंसि अवरहंसि
 सयमेव गरुयं दंडं णिवत्तेइ, सीओदगवियडंसि उच्छोलित्ता भवइ जहा
 मित्तदोसवत्तिए जाव अहिए परंसि लोगंसि, ते दुक्खंति सोयंति जूरंति तिप्पंति
 पिट्टंति परितप्पंति ते दुक्खणापोयणाजूरणातिप्पणापिट्टणापरितप्पणावहबंधणापरि-
 किलेसाओ अपडिविरया भवंति ६॥ एवमेव ते इत्थिकामंहिं मुच्छिया गिद्धा
 गदिया अज्जोववन्ना जाव वामाइं चउपंचमाइं छइसमाइं वा अप्पतरो वा
 भुज्जतरो वा कालं भुंजित्तु भोगभोगाइं पविसुइत्ता वेरायतणाइं संचिणित्ता
 बहूइं पावाइं कम्माइं उस्सन्नाइं संभारकडेणा कम्मणा से जहाणामए अयगोले
 इ वा सेलगोले इ वा उदगंसि पक्खित्ते समाणे उदगतलमइवइत्ता अहे धर-
 णितलपइट्टाणे भवइ ७ । एवमेव तहप्पगारे पुरिसजाते वज्जबहुले धूतबहुले
 पंकवहुले वेरबहुले अप्पत्तियवहुले दंभवहुले णियडिबहुले साइवहुले अयसबहुले
 उस्सन्नतसपाणवाती कालमासे कालं किच्चा धरणितलमइवइत्ता अहे णारगत-
 लपइट्टाणे भवइ ८॥ सूत्रं ३५॥ ते णां णारगा अंतो वट्टा बाहिं चउरंसा अहे
 खुरप्पसंठाणासंठिया णिच्चंधतमसा (णिच्चंधकारतमसा) ववगयगहचंदसूरन-
 क्वत्तजोइसप्पहा मेदवसामंसरुहिरपूयपडलचिक्खिल्लित्ताणुलेवणातला असुई
 वीसा परमदुब्धिगंधा कराहा अगणिवन्नाभा कक्खडफासा दुरहियासा असुभा

णारगा असुभा णारएसु वेयणात्रो १॥ णो चैव णारएसु नेरइया णिहायंति
 वा पयलायंति वा सुइं वा रतिं वा धितिं वा मतिं वा उवलभंते, ते णं
 तत्थ उज्जलं विउलं पगाढं कडुयं कक्कसं चंडं दुक्खं दुग्गं तिब्बं दुरहियासं
 णोरइया वेयणां पच्चणुभवमाणा विहरंति २ ॥ सूत्रं ३६॥ से जहाणामए
 रुक्खे सिया पव्वयग्गे जाए मूले छिन्ने अग्गे गरुए जत्रो णिराणां
 जत्रो विसमं जत्रो दुग्गं तत्रो पवडति, एवामेव तहप्पगारे पुरिसजाए
 गब्भातो गब्भं जम्मातो जम्मं मारात्रो मारं णारगात्रो णारगं दुक्खात्रो
 दुक्खं दाहिणगामिए णोरइए करहपक्खिए आगमिस्साणां दुल्लभबोहिए यावि
 भवइ १॥ एस ठाणे अणारिए अकेवले जाव असव्वदुक्खपहीणमग्गे एगंत-
 मिच्छे असाहू पढमस्स ठाणस्स अधम्मपक्खस्स विभंगे एवमाहिए २॥
 सूत्रं ३७॥ अहावरे दोच्चस्स ठाणस्स धम्मपक्खस्स विभंगे एवमाहिज्जइ-इह
 खलु पाइणां वा ४ संतेगतिया मणुस्सा भवंति, तंजहा-अणारंभा अपरि-
 ग्गहा धम्मिया धम्माणुया धम्मिट्ठा जाव धम्मेणां चैव वित्तिं कप्पेमाणा
 विहरंति, सुसीला सुव्वया सुप्पडियाणांदा सुसाहू सव्वतां पाणातिवायात्रो
 पडिविरया जावजीवाए जाव जे यावन्ने तहप्पगारा सावज्जा अबोहिया
 कम्मंता परपाणपरियावणकरा कज्जंति ततो विपडिविरता जावजीवाए १ ॥
 से जहाणामए अणगारा भगवंतो ईरियासमिया भासासमिया एसणासमिया
 आयाणभंडमत्तणिक्खेवणासमिया उच्चारपासवणखेलसिंघाणजल्लपारिट्ठावणि-
 याममिया मणसमिया वयसमिया कायसमिया मणगुत्ता वयगुत्ता कायगुत्ता
 गुत्ता गुत्तिंदिया गुत्तवंभयारी अकोहा अमाणा अमाया अलोभा संता पसंता
 उवसंता परिणिव्वुडा अणासवा अगंथा छिन्नमोया विरुवलेवा कंसपाइ
 व मुक्कतोया संखो इव णिरंजणा जीव इव अपडिहयगती गगणातलंपिव
 निरालंबणा वाउरिव अपडिबद्धा सारदसलिलं व सुद्धहियया पुक्खरपत्तं व
 निरुवलेवा कुम्भो इव गुत्तिंदिया विहग इव विप्पमुक्का खग्गिंसियाणां व

सुद्धहियया पुक्खरपत्तं व निरुवलेवा कुम्भो इव गुत्तिदिया विहग इव विप्प-
मुक्का खग्गिविसाणां व एगजाया भारंडपक्खीव अप्पमत्ता कुंजरो इव
सोंडीरा वसभो इव जातत्थामा सीहो इव दुद्धरिसा मंदरो इव अप्पकंपा
सागरो इव गभीरा चंदो इव सोमलेसा सूरु इव दित्ततेया जच्चकंचणां
(कणां) व जातरूवा वसुंधरा इव सब्बकासविसहा सुहुयहुयासणो विव
तेपसा जलंता ॥ णत्थि णं तेसिं भगवंताणां कत्थपि पडिबंधे भवइ, से पडि-
बंधे चउव्विहे पराणत्ते, तंजहा-अंडए इ वा पोयए इ वा उग्गहे इ वा पग्गहे
इ वा जन्नं जन्नं दिसं इच्छंति तन्नं तन्नं दिसं अपडिबद्धा सुइ-
भूया लहुभूया अप्पग्गंथा संजमेणां तवसा अप्पाणां भावेमाणा विहरंति ॥
तेसिं णं भगवंताणां इमा एतारूवा जायामायावित्ती होत्था, तंजहा-चउत्थे
भत्ते छट्ठे भत्ते अट्टमे भत्ते दसमे भत्ते दुवालसमे भत्ते चउदसमे भत्ते अद्धमा-
सिए भत्ते मासिए भत्ते दोमासिए तिमासिए चाउम्मासिए पंचमासिए छम्मा-
सिए अदुत्तरं च णं उक्खित्तचरगा णिक्खित्तचरया उक्खित्तणिक्खित्तचरगा
अंतचरगा पंतचरगा लूहचरगा समुदाणचरगा संसट्टचरगा असंसट्टचरगा
तज्जातसंसट्टचरगा दिट्टलाभिया अदिट्टलाभिया पुट्ठलाभिया अपुट्ठलाभिया
भिकखलाभिया अभिकखलाभिया अन्नायचरगा उवनिहिया संखादत्तिया
परिमितपिंडवाइया सुद्धेसणिया अंताहारा पंताहारा अरसाहारा विरसाहारा
लूहाहारा तुच्छाहारा अंतजीवी पंतजीवी आयंबिलिया पुरिमड्डिया निव्वि-
गइया अमज्जमंसासिणो णो णियामरसभोई ठाणाइया पडिमाठाणाइया उक्क-
डुआसणिया णेसज्जिया वीरासणिया दंडायतिया लगंडसाइणो अप्पा-
उडा अगत्तया अकंडुया अणिट्टुहा एवं जहोववाइए धुतकेसमंसुरोमनहा
सब्बगायपडिकम्मविप्पमुक्का चिट्ठंति २॥ ते णं एतेणां विहारेणां विहरमाणा
बहूइं वासाइं सामन्नपरियागं पाउणांति २ बहुबहु आवाहंसि उप्पन्नंसि वा
अणुप्पन्नंसि वा बहूइं भत्ताइं पच्चक्खन्ति पच्चक्खाइत्ता बहूइं भत्ताइं अणसणाए

छेदिति अणसणाए छेदित्ता जस्सट्ठाए कीरति नग्गभावे मुंडभावे अणहा-
 णाभावे अदंतवणागे अरुत्तए अणोवाहणाए भूमिसेज्जा फलगसेज्जा कट्ठसेज्जा
 केसलोए बंभचेरवासे परघरपवेसे लद्धावलद्धे माणावमाणणाओ हील-
 णाओ निंदणाओ खिसणाओ गरहणाओ तज्जणाओ तालणाओ उच्चावया
 गामकंठगा वागीसं परीसहोवसग्गा अहियासिज्जंति तमट्ठं आराहंति,
 तमट्ठं आराहित्ता चरमेहिं उस्सासनिस्सासेहिं अणांतं अणुत्तरं निव्वाघातं
 निरावरणं कसिणां पडिपुराणं केवलवरणाणदंसणां समुप्पाडेंति, समुप्पाडित्ता
 ततो पच्छा मिज्झंति बुज्झंति मुच्चंति परिणिव्वायंति सव्वदुक्खाणां अंतं
 करेंति ३॥ एगच्चाए पुण एगे भयंतारो भवंति, अवरं पुण पुच्चकम्मावसेसेरां
 कालमासे कालं किच्चा अन्नयरेसु देवलोएसु देवत्ताए उववत्तारो भवंति,
 तंजहा-महड्डिएसु महज्जुतिएसु महापरक्कमेसु महाजसेसु महाबलेसु महाणु-
 भावेसु महासुक्खेसु ते रां तत्थ देवा भवंति महड्डिया महज्जुतिया जाव
 महासुक्खा हारविराइयवच्छा कडगतुडियथंभियभुया अंगयकुंडलमट्ठगंडय-
 लकन्नपीढधारी विचित्तहत्थाभरणा विचित्तमालामउलिमउडा कल्लाणागंधपव-
 रवत्थपरिहिया कल्लाणागपवरमल्लाणुलेवणाधरा भासुरबोंदी पलंबवणमालधरा
 दिव्वेरां रूवेरां दिव्वेरां वन्नेरां दिव्वेरां गंधेरां दिव्वेरां फासेरां दिव्वेरां
 संघाएरां दिव्वेरां संठाणेरां दिव्वाए इड्डीए दिव्वाए जुत्तीए दिव्वाए पभाए
 दिव्वाए छायाए दिव्वाए अच्चाए दिव्वेरां तेएरां दिव्वाए लेसाए दस दिसाओ
 उज्जोवेमाणा पभासेमाणा गइकल्लाणा ठिइकल्लाणा आगमेसिभइथा यावि भवंति,
 एस ठाणो आथरिए जाव सव्वदुक्खपहीणामग्गे एगंतसम्मे सुसाहू । दोच्चस्स
 ठाणस्स धम्मपक्खस्स विभंगे एवमाहिए ४ ॥ सूत्रं ३८॥ अहावरे तच्चस्स ठाण-
 स्स मीसगस्स विभंगे एवमाहिज्जइ-इह खलु पाईणां वा ४ संतेगतिया मणुस्सा
 भवंति, तंजहा—अप्पिच्छा अप्पारंभा अप्पपरिग्गहा धम्मिया धम्माणुया
 जाव धम्मेणां चैव वित्ति कप्पेमाणा विहरंति सुसीला सुव्वया सुपडियाणांदा साहू

एगच्चात्रो पाणाइवायात्रो पडिविरता जावजीवाए एगच्चात्रो अप्पडिविरया
जाव जे यावराणे तहप्पगारा सावज्जा अबोहिया कम्मंता परपाणपरितावणा-
करा कज्जंति ततोवि एगच्चात्रो अप्पडिविरया १॥ से जहाणामए समणो-
वासगा भवंति अभिगयजीवाजीवा उवलद्धपुराणपावा आसवसंवरवेयणाणि-
ज्जराकिरियाहिगराणबंधमोक्खकुसला असहेज्ज(ज्जा)देवासुरनागसुवराणाजवखर-
क्खसकिंन्नरकिंपुरिसगरुलंगंधव्वमहोरगाइएहिं देवगणोहिं निग्गंथात्रो पावय-
णात्रो अणइक्कमणिज्जा इणमेव निग्गंथे पावयणे णिस्संकिया णिवकंखिया
निव्वितिगिच्छा लद्धट्टा गहियट्टा पुच्छियट्टा विणिच्छियट्टा अभिगयट्टा
अट्टिमिजपेम्माणुरागरत्ता अयमाउसो । निग्गंथे पावयणे अट्ठे अयं परमट्ठे
सेसे अणट्ठे उसियफलिहा अवंगुयदुवारा अचियत्तंतेउरपरघरपवेमा चाउद्द-
सट्टमुद्धिट्टुपुणिणामासिणीसु पडिपुन्नं पोसहं सम्मं अणुपालेमाणा समणे
निग्गंथे फासुएसणिज्जेणं असणपाणाखाइमसाइमेणं वत्थपडिग्गहकंबलपाय-
पुंछणोणं ओसहभेसज्जेणं पीठफलगसेज्जासंथारणं पडिलाभेमाणा बहूहिं
सीलव्वयगुणवेरमाणपच्चक्खाणपोसहोववासेहिं अहापरिग्गहिणहिं तवोकम्मैहिं
अप्पाणं भावेमाणा विहरंति २॥ ते णं एयारूवेणं विहारेणं विहरमाणा
बहूइं वासाइं समणोवासगपरियागं पाउणांति पाउणित्ता आवाहंसि उप्पन्नंसि
वा अणुप्पन्नंसि वा बहूइं भत्ताइं पच्चक्खायंति बहूइं भत्ताइं पच्चक्खाएत्ता बहूइं
भत्ताइं अणसणाए छेदेन्ति बहूइं भत्ताइं अणसणाए छेइत्ता आलोइयपडि-
क्कंता समाहिपत्ता कालमासे कालं किच्चा अन्नयरेसु देवलोएसु देवत्ताए
उवत्तारो भवंति, तंजहा—महड्डिएसु महज्जुइएसु जाव महासुक्खेसु
सेसं तहेव जाव एम ठणो आयरिए जाव एगंतसम्मे साहू । तच्चस्स
ठाणस्स मिसगस्स विभंगे एवं आहिए ३ ॥ अविरइं पडुच्च बाले
आहिज्जइ, विरइं पडुच्च पंडिए आहिज्जइ, विरयाविरइं पडुच्च बालपंडिए
आहिज्जइ, तत्थ णं जा सा सब्वतो अविरइं एस ठणो आरंभट्टाणो

अणारिए जाव असव्वदुक्खप्पहीणमग्गे एगंतमिच्छे असाहू, तत्थ णं जा सा सव्वतो विरई एस ठाणे अणारंभट्टाणे आरिए जाव सव्वदुक्खप्पहीणमग्गे एगंतसम्मे साहू, तत्थ णं जा सा सव्वत्थो विरयाविरई एस ठाणे अणारंभट्टाणे एस ठाणे आरिए जाव सव्वदुक्खप्पहीणमग्गे एगंतसम्मे साहू ४॥ सूत्रं ३६ ॥ एवमेव समणुगम्ममाणा इमेहिं चैव दोहिं ठाणेहिं समोअरंति, तंजहा—धम्मे चैव अधम्मे चैव उवसंते चैव अणुवसंते चैव, तत्थ णं जे से पढमस्स अणस्स अधम्मपक्खस्स विभंगे एवमाहिए, तत्थ णं इमाइं तिन्नि तेवट्टाइं पावाडुयसयाइं भवंतीति मक्खायं(याइं), तंजहा—किरियावाइंणं अकिरियावाइंणं अन्नाणियवाइंणं वेणइयवाइंणं, तेऽवि परिनिव्वाणमाहंसु, तेऽवि मोक्खमाहंसु तेऽवि लवंति, सावगा ! तेऽवि लवंति सावइत्तारो ॥ सूत्रम् ४० ॥ ते सव्वे पावाउया आदिकरा धम्माणं णाणापन्ना णाणाच्छंदा णाणासीला णाणादिट्ठी णाणारुई णाणारंभा णाणाज्भवसाणसंजुत्ता एगं महं मंडलिबंधं किच्चा सव्वे एगत्थो चिट्ठंति १॥ पुरिसे य सागणियाणं इंगालाणं पाइं बहुपडिपुन्नं अत्थोमएणं संडासएणं गहाय ते सव्वे पावाउए आइगरे धम्माणं णाणापन्ने जाव णाणाज्भवसाणसंजुत्ते एवं वयासी—हंभो पावाउया ! आइगरा धम्माणं णाणापन्ना जाव णाणाअज्भवसाणसंजुत्ता ! इमं ताव तुब्भे सागणियाणं इंगालाणं पाइं बहुपडिपुन्नं गहाय मुहुत्तयं मुहुत्तगं पाणिणा धरेह, णो बहुसंडासगं संसारियं कुज्जा णो बहुअग्गिथंभणियं कुज्जा णो बहु साहम्मियवेयावडियं कुज्जा णो बहुपरधम्मियवेयावडियं कुज्जा उज्जुया णियागपडिवन्ना अमायं कुव्वमाणा पाणि पसारेह, इति वुच्चा से पुरिसे तेसिं पावाडुयाणं तं सागणियाणं इंगालाणं पाइं बहुपडिपुन्नं अत्थोमएणं संडासएणं गहाय पाणिसु णिसिरति २। तए णं ते पावाडुया आइगरा धम्माणं णाणापन्ना जाव णाणाज्भवसाणसंजुत्ता पाणि पडिसाहरंति, तए णं से पुरिसे ते सव्वे पावाउए आदिगरे धम्माणं

जाव णाणाञ्भवसाणसंजुत्ते एवं वयासी-हंभो पावादुया ! आइगरा धम्माणं
 णाणापन्ना जाव णाणाञ्भवसाणसंजुत्ता ! कम्हा णं तुब्भे पाणिं पडिसाहरह ?,
 पाणिं नो डहिज्जा, दड्ढे किं भविस्सइ ?, दुक्खं दुक्खंति मन्नमाणा पडिसा-
 हरह, एस तुला एस पमाणो एस समासरणो, पत्तेयं तुला पत्तेयं पमाणो
 पत्तेयं समोसरणो ३। तत्थ णं जे ते समणा माइणा एवमात्तिक्खंति जाव
 परूवेति-सव्वे पाणा जाव सव्वे सत्ता हंतव्वा अज्जावेयव्वा परिघेतव्वा परि-
 तावेयव्वा किलामेतव्वा उद्वेत्तव्वा, ते आगंतुत्थेयाए ते आगंतुभेयाए जाव ते
 आगंतुजाइजराभरणजोणिजम्मणसंसारपुण्णवगव्वभासभवपवंचकलंकलीभा-
 गिणो भविस्संति ४। ते बहूणां दंडणाणां बहूणां मुंडणाणां तज्जणाणां तालणाणां
 अंडुबंधणाणां जाव घोळणाणां माइभरणणां पिइभरणणां भाइभरणणां भगि-
 णीभरणणां भज्जापुत्तधूतसुगहामरणणां दारिहाणां दोहग्गाणां अप्पियमंवा-
 मारां पियविप्पत्रोगाणां बहूणां दुक्खदोम्मणास्सारां आभागिणो भविस्संति,
 अणादियं च णां अणवयग्गं दीहमद्धं चाउरंतसंसारकंतरं भुज्जो भुज्जो
 अणुपरियट्ठिस्संति, ते णो सिब्धिस्संति णो बुब्धिस्संति जाव णो सव्व-
 दुक्खाणां अंतं करिस्संति, एस तुला एस पमाणो एस समोसरणो पत्तेयं
 तुला पत्तेयं पमाणो पत्तेयं समोसरणो ५ ॥ तत्थ णं जे ते समणा माइणा
 एवमाइक्खंति जाव परूवेति-सव्वे पाणा सव्वे भूया सव्वे जीवा सव्वे सत्ता
 ण हंतव्वा णा अज्जावेयव्वा णा परिघेतव्वा णा उद्वेयव्वा ते णो आगंतु-
 त्थेयाए ते णो आगंतुभेयाए जाव जाइजराभरणजोणिजम्मणसंसारपुण्णव-
 वगव्वभासभवपवंचकलंकलीभागिणो भविस्संति, ते णो बहूणां दंडणाणां
 जाव णो बहूणां मुंडणाणां जाव बहूणां दुक्खदोम्मणास्सारां णो भागिणो
 भविस्संति, अणादियं च णां अणवयग्गं दीहमद्धं चाउरंतसंसारकंतरं भुज्जो
 भुज्जो णो अणुपरियट्ठिस्संति, ते सिब्धिस्संति जाव सव्वदुक्खाणां अंतं
 करिस्संति ६ ॥ सूत्रं ४१॥ इच्चेतेहिं वारसहिं किरियाअणेहिं वट्टमाणा

जीवा णो सिञ्जिंसु णो बुञ्जिंसु णो मुच्चिंसु णो परिणिव्वाइंसु जाव णो
 सव्वदुक्खाणं अंतं करेसु वा णो करेति वा णो करिस्संति वा १॥ एयसि
 चेव तेरसमे किरियाठाणे वट्टमाणा जीवा सिञ्जिंसु बुञ्जिंसु मुच्चिंसु परिणि-
 व्वाइंसु जाव सव्वदुक्खाणं अंतं करेसु वा करंति वा करिस्संति वा २॥ एवं
 से भिम्बु आयट्ठी आयहिते आयगुत्ते आयजोगे आयपरकमे आयरक्खिए
 आया गुकंपए आयनिक्केडए आयाणमेव पडिसाहरेज्जासि तिबेमि ३॥
 ॥ सूत्रं ४२ ॥

॥ इति द्वितीयमध्ययनम् ॥ श्रु०२-अ०२ ॥

॥ अथ द्वितीयश्रुतस्कन्धे तृतीयमाहारपरिज्ञाध्ययनम् ॥

सुयं मे आउसंतेणं भगवया एवमक्खायं-इह खलु आहारपरिणा-
 नामज्झयणे, तस्स णं अयमट्ठे-इह खलु पाईणं वा ४ सव्वतो सव्वावंति च
 णं लोगंसि चत्तारि बीयकाया एवमाहिज्जंति, तंजहा-अग्गबीया मूलबीया
 पोखीया खंधवीया, (वणस्सइकाइयाणं पंचविहा बीजवक्कंती एवमाहिज्जइ,
 तंजहा-अग्गमूलपोरुक्खंधवीयरुहा छट्ठावि एगेदिया समुच्छिमा बीया
 जायंते) तेसिं च णं अहावीएणं अहावगासेणं इहेगतिया सत्ता पुढ्वी-
 जोणिया पुढ्वीसंभवा पुढ्वीवुक्कमा तज्जोणिया तस्संभवा तदुक्कमा कम्मो-
 वगा कम्मणियाणेणं तत्थवुक्कमा णाणाविहजोणियासु पुढ्वीसु रुक्खत्ताए
 विउट्ठंति १ ॥ ते जीवा तेसिं णाणाविहजोणियाणं पुढ्वीणं सिणेहमाहा-
 रेंति, ते जीवा आहारेंति पुढ्वीसरीरं आउसरीरं तेउसरीरं वाउसरीरं वण-
 स्सइसरीरं २ ॥ णाणाविहाणं तसथावराणं पाणाणं सरारं अचित्तं कुब्बंति
 परिविद्धत्थं तं सरीरं पुव्वाहारियं तथाहारियं विपरिणायं सारुवियकडं संतं
 ३ ॥ अवरेऽवि य णं तेसिं पुढ्विजोणियाणं रुक्खाणं सरीरा णाणावराणा
 णाणागंधा णाणारसा णाणाफासा णाणासंठाणसंठिया णाणाविहसरीरपुग्गल-

विउच्चिता ते जीवा कम्मोववन्नगा भवंतित्तिमक्खायं ४ ॥सूत्रं ४३॥ अहा-
वरं पुरक्खायं इहेगतिया सत्ता रुक्खजोगिया रुक्खसंभवा रुक्खवुक्कमा तज्जो-
णिया तस्संभवा तदुवक्कमा कम्मोवगा कम्मनियारोणां तत्थवुक्कमा पुढ्वी-
जोगिण्हिं रुक्खेहि रुक्खत्ताए विउट्टंति, ते जीवा तेसिं पुढ्वीजोगियाणां
रुक्खाणां सिणोहमाहारेंति, ते जीवा आहारेंति पुढ्वीसरीरं आउतेउवाउवणा-
स्सइसरीरं णाणाविहाणां तसथावराणां पाणाणां सरीरं अचित्तं कुब्बंति
परिविद्धत्थं तं सरीरं पुब्बाहारियं तथाहारियं विपरिणामियं सारुविकडं
संतं अवरेंवि य गां तेसिं रुक्खजोगियाणां रुक्खाणां सरीरा णाणावराणा
णाणागंधा णाणारसा णाणाफासा णाणासंठाणसंठिया णाणाविहसरीर-
पुग्गलविउच्चिया ते जीवा कम्मोववन्नगा भवंतीत्तिमक्खायं ॥सूत्रं ४४॥
अहावरं पुरक्खायं इहेगतिया सत्ता रुक्खजोगिया रुक्खसंभवा रुक्खवुक्कमा
तज्जोगिया तस्संभवा तदुवक्कमा कम्मोवगा कम्मणियारोणां तत्थवुक्कमा
रुक्खजोगिएसु रुक्खत्ताए विउट्टंति, ते जीवा तेसिं रुक्खजोगियाणां
रुक्खाणां सिणोहमाहारेंति, ते जीवा आहारेंति पुढ्वीसरीरं आउतेउवाउवणा-
स्सइसरीरं तसथावराणां पाणाणां सरीरं अचित्तं कुब्बंति, परिविद्धत्थं तं
सरीरं पुब्बाहारियं तथाहारियं विपरिणामियं सारुविकडं संतं अवरेंवि य
गां तेसिं रुक्खजोगियाणां रुक्खाणां सरीरा णाणावन्ना जाव ते जीवा
कम्मोववन्नगा भवंतीत्तिमक्खायं ॥सूत्रं ४५॥ अहायरं पुरक्खायं इहेगइया
सत्ता रुक्खजोगिया रुक्खसंभवा रुक्खवुक्कमा तज्जोगिया तस्संभवा तदुवक्कमा
कम्मोवगा कम्मनियारोणां तत्थवुक्कमा रुक्खजोगिएसु रुक्खेसु मूलत्ताए कंद-
त्ताए खंधत्ताए तयत्ताए सालत्ताए पवालत्ताए पत्तत्ताए पुप्फत्ताए फलत्ताए
बीयत्ताए विउट्टंति, ते जीवा तेसिं रुक्खजोगियाणां रुक्खाणां सिणोहमाहा-
रेंति, ते जीवा आहारेंति पुढ्वीसरीरं आउतेउवाउवणास्सइसरीरं णाणा-
विहाणां तसथावराणां पाणाणां सरीरं अचित्तं कुब्बंति परिविद्धत्थं तं

सरीरं जाव सारूविकडं संतं, अवरेश्वि य गां तेसिं रुक्खजोगियाणां मूलाणां कंदाणां खंधाणां तयाणां सालाणां पवालाणां जाव बीयाणां सरीराणाणावराणाणाणां जाव गाणाविहसरीरपुग्गलविउब्बिया ते जीवा कम्मोववन्नगा भवंतितीमक्खायं ॥सूत्रं ४६॥ अहावरं पुरक्खायं इहेगतिया सत्ता रुक्खजोगिया रुक्खसंभवा रुक्खवुक्कमा तज्जोगिया तस्संभवा तदुवक्कमा कम्मोववन्नगा कम्मनियाणां तत्थवुक्कमा रुक्खजोगिएहिं रुक्खेहिं अज्जारोहत्ताए विउट्टंति, ते जीवा तेसिं रुक्खजोगियाणां रुक्खाणां सिणोहमाहारंति, ते जीवा आहारंति पुढ्वीसरीरं जाव सारूविकडं संतं, अवरेश्वि य गां तेसिं रुक्खजोगियाणां अज्जारुहाणां सरीराणाणावन्ना जावमक्खायं ॥सूत्रं ४७॥ अहावरं पुरक्खायं इहेगतिया सत्ता अज्जारोहजोगिया अज्जारोहसंभवा जाव कम्मनियाणां तत्थवुक्कमा रुक्खजोगिएसु अज्जारोहेसु अज्जारोहत्ताए विउट्टंति, ते जीवा तेसिं रुक्खजोगियाणां अज्जारोहाणां सिणोहमाहारंति, ते जीवा पुढ्वीसरीरं जाव सारूविकडं संतं, अवरेश्वि य गां तेसिं अज्जारोहजोगियाणां अज्जारोहाणां सरीराणाणावन्ना जावमक्खायं ॥सूत्रं ४८॥ अहावरं पुरक्खायं इहेगतिया सत्ता अज्जारोहजोगिया अज्जारोहसंभवा जाव कम्मनियाणां तत्थवुक्कमा अज्जारोहजोगिएसु (अज्जारोहेसु) अज्जारोहत्ताए विउट्टंति, ते जीवा तेसिं अज्जारोहजोगियाणां अज्जारोहाणां सिणोहमाहारंति, ते जीवा आहारंति पुढ्विसरीरं आउसरीरं जाव सारूविकडं संतं, अवरेश्वि य गां तेसिं अज्जारोहजोगियाणां अज्जारोहाणां सरीराणाणावन्ना जावमक्खायं ॥सूत्रं ४९॥ अहावरं पुरक्खायं इहेगतिया सत्ता अज्जारोहजोगिया अज्जारोहसंभवा जाव कम्मनियाणां तत्थवुक्कमा अज्जारोहजोगिएसु अज्जारोहेसु मूलत्ताए जाव बीयत्ताए विउट्टंति ते जीवा तेसिं अज्जारोहजोगियाणां अज्जारोहाणां सिणोहमाहारंति जाव अवरेश्वि य गां तेसिं अज्जारोहजोगियाणां मूलाणां

जाव बीयाणां सरीरा णाणावन्ना जावमवखायं ॥सूत्रं ५०॥ अहावरं पुरवखायं
इहेगत्तिया सत्ता पुढविजोणिया पुढविसंभवा जाव णाणाविहजोणियासु पुढ-
वांसु तणात्ताए विउट्टंति, ते जीवा तेसिं णाणाविहजोणियाणां पुढवीणां सिणो-
हमाहारेंति जाव ते जीवा कम्मोववन्ना भवंतीतिमक्खायं ॥सूत्रं ५१॥ एवं पुढ-
विजोणिएसु तणोसु तणात्ताए विउट्टंति जावमवखायं ॥सूत्रं ५२॥ एवं तणा-
जोणिएसु तणोसु तणात्ताए विउट्टंति, तणाजोणियं तणासरीरं च आहारेंति
जावमक्खायं १ ॥ एवं तणाजोणिएसु तणोसु मूलत्ताए जाव बीयत्ताए
विउट्टंति ते जीवा जाव एवमक्खायं २ ॥ एवं ओसहीणावि चत्तारि
आलावगा ३ ॥ एवं हरियाणावि चत्तारि आलावगा ४ ॥सूत्रं ५३॥ अहा-
वरं पुरक्खायं इहेगत्तिया सत्ता पुढविजोणिया पुढविसंभवा जाव कम्मनिया-
णोणां तत्थवुक्कमा णाणाविहजोणियासु पुढवीसु आयत्ताए वायत्ताए कायत्ताए
कूहात्ताए कंदुकत्ताए उव्वेहणियत्ताए निव्वेहणियत्ताए सच्छत्ताए छत्तग-
त्ताए वासाणियत्ताए कूरत्ताए विउट्टंति, ते जीवा तेसिं णाणाविहजोणियाणां
पुढवीणां सिणोहमाहारेंति, तेवि जीवा आहारेंति पुढविसरीरं जाव संतं,
अवरेऽवि य णां तेसिं पुढविजोणियाणां आयत्ताणां जाव कूराणां सरीरा
णाणावराणा जावमवखायं, एगो चैव आलावगो सेसा तिणिण णत्थि
१ ॥ अहावरं पुरक्खायं इहेगत्तिया सत्ता उदगजोणिया उदगसंभवा
जाव कम्मनियाणोणां तत्थवुक्कमा णाणाविहजोणिएसु उदएसु रुक्खत्ताए
विउट्टंति, ते जीवा तेसिं णाणाविहजोणियाणां उदगाणां सिणोहमाहारेंति,
ते जीवा आहारेंति पुढविसरीरं जाव संतं, अवरेऽवि य णां तेसिं उदगजो-
णियाणां रुक्खाणां सरीरा णाणावराणा जावमवखायं २। जहा पुढविजोणि-
याणां रुक्खाणां चत्तारि गमा अज्झारुहाणावि तहेव, तणाणां ओसहीणां
हरियाणां चत्तारि आलावगा भाणियव्वा एक्केक्के ३॥ अहावरं पुरक्खायं
इहेगत्तिया सत्ता उदगजोणिया उदगसंभवा जाव कम्मणियाणोणां तत्थवुक्कमा

णाणाविहजोणिएसु उदएसु उदगत्ताए अवगत्ताए पणगत्ताए सेवालत्ताए
 कलंबुगत्ताए हडत्ताए कसेरुगत्ताए कच्छभाणियत्ताए उप्पलत्ताए पउमत्ताए कुमु-
 यत्ताए नलिणत्ताए सुभगत्ताए सोगंधियत्ताए प्रौंडरियमहापौंडरियत्ताए सय-
 पत्ताए सहस्सपत्ताए एवं कल्हारकोंकणयत्ताए अरविंदत्ताए तामरसत्ताए
 भिसभिसमुणालपुक्खलत्ताए पुक्खलच्छिभगत्ताए विउटंति, ते जीवा तेसिं
 णाणाविहजोणियाणां उदगाणां सिणोहमाहारेंति, ते जीवा आहारेंति पुट्ठी-
 सरीरं जाव संतं, अवरेऽवि य रांतेसिं उदगजोणियाणां उदगाणां जाव पुक्ख-
 लच्छिभगाणां सरीरा णाणावराणां जावमक्खायं, एगो चैव आलावगो १॥
 सूत्रं ५४ ॥ अहावरं पुरक्खायं इहेगतिया सत्ता तेसिं चैव पुट्ठीजोणिएहिं
 रुक्खेहिं रुक्खजोणिएहिं रुक्खेहिं रुक्खजोणिएहिं मूलेहिं जाव बीएहिं रुक्ख-
 जोणिएहिं अज्झारोहेहिं अज्झारोहजोणिएहिं अज्झारुहेहिं अज्झारोह-
 जोणिएहिं मूलेहिं जाव बीएहिं पुट्ठिविजोणिएहिं तणोहिं तणजोणिएहिं तणोहिं
 तणजोणिएहिं मूलेहिं जाव बीएहिं एवं ओसहीहिवि तिन्नि आलावगा १। एवं
 हरिएहिवि तिन्नि आलावगा २। पुट्ठिविजोणिएहिवि आएहिं काएहिं जाव
 कूरेहिं उदगजोणिएहिं रुक्खेहिं रुक्खजोणिएहिं रुक्खेहिं रुक्खजोणिएहिं मूलेहिं
 जाव बीएहिं एवं अज्झारुहेहिवि तिगिण ३। तणोहिंपि तिगिण आलावगा ४।
 ओसहीहिंपि तिगिण ५। हरिएहिंपि तिगिण ६। उदगजोणिएहिं उदएहिं अव-
 एहिं जाव पुक्खलच्छिभएहिं तसपाणत्ताए विउटंति ६॥ ते जीवा तेसिं पुट्ठी-
 जोणियाणां उदगजोणियाणां रुक्खजोणियाणां अज्झारोहजोणियाणां तण-
 जोणियाणां ओसहीजोणियाणां हरियजोणियाणां रुक्खाणां अज्झारुहाणां
 तणाणां ओसहीणां हरियाणां मूलाणां जाव बीयाणां आयाणां कायाणां जाव
 कुरवा(कूरा)णां उदगाणां अवगाणां जाव पुक्खलच्छिभगाणां सिणोहमा-
 हारेंति ७। ते जीवा आहारेंति पुट्ठीसरीरं जाव संतं ८। अवरेऽवि य रां
 तेसिं रुक्खजोणियाणां अज्झारोहजोणियाणां तणजोणियाणां ओसहिजो-

यासां हरियंजोणियासां मूलजोणियासां कंदजोणियासां जाव बीयजोणियासां
 आयजोणियासां कायजोणियासां जाव कूरजोणियासां उदगजोणियासां
 अत्रगजोणियासां जाव पुक्खलच्छिभगजोणियासां तसपाणासां सरीरा
 णाणावराणां जावमक्खायं ६॥ सूत्रं ५५ ॥ अहावरं पुरक्खायं णाणावि-
 हारां मणुस्सासां तंजहा—कम्मभूमगासां अकम्मभूमगासां अंतरदीवगासां
 आरियासां मिलक्खुयाणां, तेसिं च सां अहावीणां अहावगासेसां इत्थीए
 पुरिसस्स य कम्मकडाए जोणिए एत्थ सां महुणवत्तियाए [व] णामं संजोगे
 समुपज्जइ, ते दुहयोवि सिणोहं संचिणांति १। तत्थ सां जीवा इत्थित्ताए
 पुरिसत्ताए णपुंसगत्ताए विउट्ठंति, ते जीवा माओउयं पिउसुक्कं तं तदुभयं
 संसट्ठं कलुसं किञ्चिसं तं पढमत्ताए आहारमाहारेंति, ततो पच्छा जं से
 माया णाणाविहयो रसविहीओ आहारमाहारेंति ततो एगदेसेसां ओयमा-
 हारेंति, आणुपुब्बेण बुद्धा पलिपागमणुपवन्ना ततो कायातो अभिनिवट्टमाणा
 इत्थि वेगया जणयंति पुरिसं वेगया जणयंति णपुंसगं वेगया जणयंति २।
 ते जीवा डहरा समाणा माउक्खीरं सपिं आहारेंति, आणुपुब्बेसां बुद्धा
 ओयसां कुम्मासं तसथावरे य पाणे. ते जीवा आहारेंति पुढविसरीरं जाव
 सारूविकडं संतं, अवरेऽवि य सां तेसिं णाणाविहारां मणुस्सगासां कम्मभू-
 मगासां अकम्मभूमगासां अंतरदीवगासां आरियासां मिलक्खूसां सरीरा
 णाणावराणां भवतीतिमक्खायं ३॥ सूत्रं ५६ ॥ अहावरं पुरक्खायं णाणा-
 विहारां जलचरासां पंचिदियतिरिक्खजोणियासां, तंजहा—मच्छासां जाव
 सुंसुमारासां, तेसिं च सां अहावीणां अहावगासेसां इत्थीए पुरिसस्स य
 कम्मकडा तहेव जाव ततो एगदेसेसां ओयमाहारेंति, आणुपुब्बेसां बुद्धा
 पलिपागमणुपवन्ना ततो कायाओ अभिनिवट्टमाणा अंडं वेगया जणयंति
 पोयं वेगया जणयंति से अंडे उब्भिज्जमाणे इत्थि वेगया जणयंति पुरिसं
 वेगया जणयंति नपुंसगं वेगया जणयंति ते जीवा डहरा समाणा आउसि-

गोहमाहारैति आणुपुञ्जेषां बुद्ध्या वणस्मइकायं तसथावरे य पाणो, ते जीवा
 आहारैति पुद्बिसरीरं जाव संतं, आवरेऽवि य गां तेसिं णाणाविहाणां
 जलचरपंचिंदियतिरिक्खजोणियाणां मच्छाणां सुंसुमाराणां सरीरा णाणा-
 वराणा जावमक्खायं १॥ अहावरं पुरक्खायं णाणाविहाणां चउण्यथलयर-
 पंचिंदियतिरिक्खजोणियाणां, तंजहा-एगखुराणां दुखुराणां गंडीपदाणां सणफ-
 याणां, तेसिं च गां अहावीराणां अहावगासेणां इत्थिपुरिसस्स य कम्म जाव मेहुणा-
 वत्तिण णामं संजोगे समुप्पज्जइ, ते दुहयो सिणोहं संचिणांति, तत्थ गां जीवा
 इत्थित्ताए पुरिसत्ताए जाव विउट्टंति, ते जीवा माओउयं पिउसुक्कं एवं
 जहा मणुस्साणां इत्थिपि वेगया जणयंति पुरिसंपि नपुंसगंपि, ते जीवा
 डहरा समाणा माउक्खीरं सपिं आहारैति आणुपुञ्जेषां बुद्ध्या वणस्मइकायं
 तसथावरे य पाणो, ते जीवा आहारैति पुद्बिसरीरं जाव संतं, आवरेऽवि य
 गां तेसिं णाणाविहाणां चउण्यथलयरपंचिंदियतिरिक्खजोणियाणां एगखुराणां
 जाव सणफयाणां सरीरा णाणावराणा जावमक्खायं २। अहावरं पुरक्खायं
 णाणाविहाणां उरपरिसण्णथलयरपंचिंदियतिरिक्खजोणियाणां, तंजहा-अहीणां
 अयगराणां आसालियाणां महोरगाणां, तेसिं च गां अहावीराणां अहावगासेणां
 इत्थिए पुरिस जाव एत्थ गां मेहुणा० एवं तं चैव, नाणात्तं अंडं वेगइया
 जणयंति पोयं वेगइया जणयंति, से अंडे उब्भिज्जमाणो इत्थि वेगइया
 जणयंति पुरिसंपि णपुंसगंपि, ते जीवा डहरा समाणा वाउकायमाहारैति
 आणुपुञ्जेषां बुद्ध्या वणस्मइकायं तसथावरपाणो, ते जीवा आहारैति पुद्-
 बिसरीरं जाव संतं, आवरेऽवि य गां तेसिं णाणाविहाणां उरपरिसण्णथलयर-
 पंचिंदियतिरिक्ख० अहीणां जाव महोरगाणां सरीरा णाणावराणा णाणा-
 गंधा जावमक्खायं ३ ॥ अहावरं पुरक्खायं णाणाविहाणां भुयपरिसण्णथल-
 यरपंचिंदियतिरिक्खजोणियाणां, तंजहा-गोहाणां नउलाणां सीहाणां सरडाणां
 मल्लाणां सरवाणां खराणां धरकोइत्तियाणां विस्संभराणां, मुग्गगाणां मंगुसाणां

पयलाइयाणां बिरालियाणां जोहाणां चउप्पाइयाणां, तेसिं च गां अहावीएणां
 अहावगासेणां इत्थीए पुरिसस्म य जहा उरपरिसप्पाणां तहा भाणियब्बं
 जाव सारूविकडं संतं, अवरेऽवि य गां तेसिं गाणाविहाणां भुयपरिसप्पंपंचि-
 दियथलयरतिरिक्खाणां तं० गोहाणां जावमक्खायं ४ ॥ अहावरं पुरक्खायं
 गाणाविहाणां खहचरपंचिदियतिरिक्खजोणियाणां तंजहा-चम्मपक्खीणां लोम-
 पक्खीणां समुग्गपक्खीणां विततपक्खीणां तेसिं च गां अहावीएणां अहावगा-
 सेणां इत्थीए जहा उरपरिसप्पाणां, नाणात्तं ते जीवा डहरा समाणा माउगात्त-
 सिणोहमाहारेंति आणापुब्बेणां बुद्धा वणास्सतिकायं तसथावरे य पाणे, ते
 जीवा आहारेंति पुढविसरीरं जाव संतं, अवरेऽविय गां तेसिं गाणाविहाणां
 खहचरपंचिदियतिरिक्खजोणियाणां चम्मपक्खीणां जावमक्खायं ५ ॥सूत्रं
 ५७॥ अहावरं पुरक्खायं इहेगतिया सत्ता गाणाविहजोणिया गाणाविह-
 संभवा गाणाविहवुक्कमा तज्जोणिया तस्संभवा तदुवक्कमा कम्मोवगा कम्मणि-
 याणेणां तत्थवुक्कमा गाणाविहाणां तसथावराणां पोग्गलाणां सरीरेसु वा
 सच्चित्तेसु वा अच्चित्तेसु वा अणुसूयत्ताए विउट्टंति, ते जीवा तेसिं गाणा-
 विहाणां तसथावराणां पाणाणां सिणोहमाहारेंति, ते जीवा आहारेंति पुढ-
 विसरीरं जाव संतं, अवरेऽवि य गां तेसिं तसथावरजोणियाणां अणुसूय-
 गाणां सरीरा गाणावराणां जावमक्खायं ॥ एवं दुरूवसंभवत्ताए ॥ एवं
 खुरदुग्गत्ताए ॥सूत्रं ५८॥ अहावरं पुरक्खायं इहेगतिया सत्ता गाणाविह-
 जोणिया जाव कम्मणियाणेणां तत्थवुक्कमा गाणाविहाणां तसथावराणां
 पाणाणां सरीरेसु सच्चित्तेसु वा अच्चित्तेसु वा तं सरीरं वायसंमिद्धं वा
 वायसंगहियं वा वायपरिग्गहियं उट्टुवाएसु उट्टुभागी भवति अहेवाएसु
 अहेभागी भवति तिरियवाएसु तिरियभागी भवति, तंजहा-ओसा हिमए
 महिया करए हरतणुए सुद्धोदए, ते जीवा तेसिं गाणाविहाणां तस-
 थावराणां पाणाणां सिणोहमाहारेंति, ते जीवा आहारिंति पुढविसरीरं

जाव संतं, अवरेऽवि य गां तेसिं तसथावरजोगियाणां ओसाणं जाव सुद्धोदगाणां सरीरा गाणावराणा जावमक्खायं १ ॥ अहावरं पुरक्खायं इहेगतिया सत्ता उदगजोगिया उदगसंभवा जाव कम्मणियाणोणां तत्थवुक्कमा तसथावरजोगिएसु उदएसु उदगत्ताए विउट्ठंति, ते जीवा तेसिं तसथावर-जोगियाणां उदगाणां सिणोहमाहारेंति, ते जीवा आहारेंति पुढविसरीरं जाव संतं, अवरेऽवि य गां तेसिं तसथावरजोगियाणां उदगाणां सरीरा गाणा-वराणा जावमक्खायं २ ॥ अहावरं पुरक्खायं इहेगतिया सत्ता उदगजोगि-याणां जाव कम्मनियाणोणा तत्थवुक्कमा उदगजोगिएसु उदएसु उदगत्ताए विउट्ठंति, ते जीवा तेसिं उदगजोगियाणां उदगाणां सिणोहमाहारेंति, ते जीवा आहारेंति पुढविसरीरं जाव संतं, अवरेऽवि य गां तेसिं उदग-जोगियाणां उदगाणां सरीरा गाणावन्ना जावमक्खायं ३ ॥ अहावरं पुरक्खायं इहेगतिया सत्ता उदगजोगियाणां जाव कम्मनियाणोणां तत्थवुक्कमा उदग-जोगिएसु उदएसु तसपाणात्ताए विउट्ठंति, ते जीवा तेसिं उदगजोगियाणां उदगाणां सिणोहमाहारेंति, ते जीवा आहारेंति पुढविसरीरं जाव संतं, अवरेऽवि य गां तेसिं उदगजोगियाणां तसपाणाणां सरीरा गाणावराणा जावमक्खायं ४ ॥सूत्रं ५१॥ अहावरं पुरक्खायं इहेगतिया सत्ता गाणाविहजोगिया जाव कम्म-नियाणोणां तत्थवुक्कमा गाणाविहाणां तसथावराणां पाणाणां सरीरेसु सचित्तेसु वा अचित्तेसु वा अगणिकायत्ताए विउट्ठंति, ते जीवा तेसिं गाणाविहाणां तस-थावराणां पाणाणां सिणोहमाहारेंति, ते जीवा आहारेंति पुढविसरीरं जाव संतं, अवरेऽवि य गां तेसिं तसथावरजोगियाणां अगणीणां सरीरा गाणावराणा जावमक्खायं, सेसा तिन्नि आलावगा जहा उदगाणां १ ॥ अहावरं पुरक्खायं इहेगतिया सत्ता गाणाविहजोगियाणा जाव कम्मनियाणोणा तत्थवुक्कमा गाणा-विहाणां तसथावराणां पाणाणां सरीरेसु सचित्तेसु वा अचित्तेसु वा वाउक्कायत्ताए विउट्ठंति, जहा अगणीणां तहा भाणियन्वा, चत्तारि गमा २ ॥सूत्रं ६०॥

अहावरं पुरक्खायं इहेगतिया सत्ता णाणाविहजोणिया जाव कम्मनियारोणं
 तत्थवुक्कमा णाणाविहाणं तसथावराणं पाणाणं सरीरेसु वा सचित्तेसु वा अचि-
 त्तेसु वा पुढवित्ताए सक्करत्ताए वालुयत्ताए इमाओ गाहाओ अणुगंतव्वाओ-
 'पुढवी य सक्करा वालुया य उवले सिला य लोणूसे । अय तउय तंव सीसग
 रूप सुवराणे य वइरे य ॥१॥ हरियाले हिंगुलए मणोसिला सासगंजणपवाले ।
 अब्भपडलब्भवालुय बायरकाए मणिविहाणा ॥ २ ॥ गोमेज्जए य रुयए अंके
 फलिहे य लोहियक्खे य । मरगयमसारगल्ले भुयमोयग इंदणीले य ॥ ३ ॥
 चंदण गेरुय हंसगब्भ पुलए सोगंधिए य बोद्धव्वे । चंदप्पभ वेरुलिए जलकंते
 सूरकंते य ॥ ४ ॥ एयाओ एएसु भाणियव्वाओ गाहाओ जाव सूरकंत-
 त्ताए विउट्टंति, ते जीवा तेसिं णाणाविहाणं तसथावराणं पाणाणं सिणोह-
 माहारेंति, ते जीवा आहारेंति पुढवीसरीरं जाव संतं, अवरेऽवि य णं तेसिं
 तसथावरजोणियाणं पुढवीणं जाव सूरकंताणं सरीरा णाणावराणा जावम-
 क्खायं, सेसा तिगिणा आलावगा जहा उदगाणं ॥ सूत्रं ६१ ॥ अहावरं
 पुरक्खायं सव्वे पाणा सव्वे भूता सव्वे जीवा सव्वे सत्ता णाणाविहजोणिया
 णाणाविहसंभवा णाणाविहवुक्कमा सरीरजोणिया सरीरसंभवा सरीरवुक्कमा
 सरीराहारा कम्मोवगा कम्मनियारणा कम्मगतीया कम्मठिइया कम्मणा चेव
 विप्परियासमुवेंति ॥ से एवमायाणह से एवमायाणित्ता आहारगुत्ते सहिए
 समिए सया जए त्तिवेमि ॥ सूत्रं ६२ ॥

॥ इति तृतीयमध्ययनम् ॥ श्रु० २ । अ० ३॥



॥ अथ द्वितीयश्रुतस्कन्धे चतुर्थं प्रत्याख्यानाध्ययनम् ॥

सुयं मे आउसंतेणं भगवया एवमस्वायं-इह खलु पञ्चस्वाणकिरिया-
णामज्भयणो, तस्स णं अयमट्ठे पण्णत्ते-आया अपञ्चस्वाणी यावि भवति,
आया अकिरियाकुसले यावि भवति, आया मिच्छासंठिए यावि भवति, आया
एगंतदंडे यावि भवति, आया एगंतबाले यावि भवति, आया एगंतसुत्ते
यावि भवति, आया अवियारमणवयणकायवक्के यावि भवति, आया अप्प-
डिहयअपञ्चस्वायपावकम्मे यावि भवति, एस खलु भगवता अस्वाए असं-
जते अविरते अप्पडिहयपञ्चस्वायपावकम्मे सकिरिए असंबुडे एगंतदंडे एगंत-
बाले एगंतसुत्ते, से बाले अवियारमणवयणकायवक्के सुविणमवि ण पस्सति,
पावे य से कम्मे कज्जइ ॥ सूत्रं ६३ ॥ तत्थ चोयए पन्नवगं एवं वयासि-
असंतएणं मणोणं पावएणं असंतियाए वतीए पावियाए असंतएणं काएणं
पावएणं अहणंतस्स अमणक्खस्स अवियारमणवयणकायवक्कस्स सुविणमवि
अपस्सओ पावकम्मे णो कज्जइ, कस्स णं तं हेउं ?, चोयए एवं ववीति-
अन्नयरेणं मणोणं पावएणं मणवत्तिए पावे कम्मे कज्जइ, अन्नयरीए वतिए
पावियाए वतिवत्तिए पावे कम्मे कज्जइ, अन्नयरेणं काएणं पावएणं कायवत्तिए
पावे कम्मे कज्जइ, हणंतस्स समणक्खस्स सवियारमणवयणकायवक्कस्स सुविण-
मवि पासओ एवंगुणजातीस्स पावे कम्मे कज्जइ १। पुणारवि चोयए एवं
ववीति-तत्थ णं जे ते एवमाहंसु-असंतएणं मणोणं पावएणं असंतियाए
वतिए पावियाए असंतएणं काएणं पावएणं अहणंतस्स अमणक्खस्स अवि-
यारमणवयणकायवक्कस्स सुविणमवि अपस्सओ पावे कम्मे कज्जइ, तत्थ णं
जे ते एवमाहंसु मिच्छा ते एवमाहंसु २। तत्थ पन्नवए चोयगं एवं वयासी-
तं सम्मं जं मए पुवं वुत्तं, असंतएणं मणोणं पावएणं असंतियाए वतिए
पावियाए असंतएणं काएणं पावएणं अहणंतस्स अमणक्खस्स अवियारमण-
वयणकायवक्कस्स सुविणमवि अपस्सओ पावे कम्मे कज्जति, तं सम्मं, कस्स

गां तं हेउं ? , आचार्य आह-तत्थ खलु भगवया छ्जीवणिकायहेऊ पराणात्ता, तंजहा-पुढविकाइया जाव तसकाइया, इच्चेएहिं छ्हिं जीवणिकाएहिं आया अप्पडिहयपच्चक्खायपावकम्मे निच्चं पसढविउवायचित्तदंडे, तंजहा-पाणातिवाए जाव परिग्गहे कोहे जाव मिच्छादंसणासल्ले ३॥ आचार्य आह-तत्थ खलु भगवथा वहए दिट्ठंते पराणात्ते, से जहाणामए वहए सिया गाहावइस्स वा गाहावइपुत्तस्स वा रराणो वा रायपुरिसस्स वा खणां निदाय पविसिस्सामि खणां लद्धूणां वहिस्सामि (अप्पणो अक्खणयाए तस्स वा पुरिसस्स छ्हिं अलभमाणो णो वहेइ तं ज्या मे खणा भविस्सइ तस्स पुरिसस्स छ्हिं लभिस्सामि तथा मे से पुरिसे अवस्सं वहेयव्वे भविस्सइ एवं मणो पहारेमाणो) पहारेमाणो से किं नु हु नाम से वहए तस्स गाहावइस्स वा गाहावइपुत्तस्स वा रराणो वा रायपुरिस(पुत्त)स्स वा खणां निदाय पविसिस्सामि खणां लद्धूणां वहिस्सामि पहारेमाणो दिया वा रात्रो वा सुत्ते वा जागरमाणो वा अमित्तभूए मिच्छासंठिते निच्चं पसढविउवायचित्तदंडे भवति ? , एवं वियागरेमाणो समियाए वियागरे ? चायए-हंता भवति ४ ॥ आचार्य आह-जहा से वहए तस्स गाहावइस्स वा तस्स गाहावइपुत्तस्स वा रराणो वा रायपुरिसस्स वा खणां निदाय पविसिस्सामि खणां लद्धूणां वहिस्सामि पहारेमाणो दिया वा रात्रो वा सुत्ते वा जागरमाणो वा अमित्तभूए मिच्छासंठिते निच्चं पसढविउवायचित्तदंडे, एवमेव बालेवि सव्वेसिं पाणाणां जाव सव्वेसिं सत्ताणां दिया वा रात्रो वा सुत्ते वा जागरमाणो वा अमित्तभूए मिच्छासंठिते निच्चं पसढविउवायचित्तदंडे, तं०-पाणातिवाए जाव मिच्छादंसणासल्ले, एवं खलु भगवया अक्खाए असंजए अविरए अप्पडिहयपच्चक्खायपावकम्मे सकिरिए असंबुडे एगंतदंडे एगंतबाले एगंतसुत्ते यावि भवइ, से बाले अवियारमणवयणाकायवक्के सुविणमवि ण पस्सइ पावे य से कम्मे कज्जइ ५ ॥ जहा से वहए तस्स वा गाहावइस्स जाव तस्स वा रायपुरिसस्स पत्तेयं पत्तेयं चित्तसमादाए

दिया वा रात्रो वा सुत्ते वा जागरमाणो वा अमित्तभूए मिच्छासंठिते निच्चं पसदविउवायचित्तदंडे भवइ, एवमेव बाले सव्वेसि पाणाणां जाव सव्वेसि सत्ताणां पत्तेयं पत्तेयं चित्तसमादाए दिया वा रात्रो वा सुत्ते वा जागरमाणो वा अमित्तभूते मिच्छासंठिते निच्चं पसदविउवायचित्तदंडे भवइ ६ ॥

॥सूत्रं ६४॥ गो इण्ठे समट्ठे [चोदकः] इह खलु बहवे पाणा० जे इमेणां सरोरममुस्सएणां गो दिट्ठा वा सुया वा नाभिमया वा विन्नाया वा जेसिं गो पत्तेयं पत्तेयं चित्तसमायाए दिया वा रात्रो वा सुत्ते वा जागरमाणो वा अमित्तभूते मिच्छासंठिते निच्चं पसदविउवायचित्तदंडे तंजहा-पाणातिवाए जाव मिच्छादंमणासल्ले ॥सूत्रं ६५॥ आचार्य आह-तत्थ खलु भगवया दुवे दिट्ठंता पराणात्ता, तंजहा-सन्निदिट्ठंते य असन्निदिट्ठंते य, से किं तं सन्निदिट्ठंते ?, जे इमे सन्निपंचिदिया पज्जत्तगा एतेसि गां छजीवनिकाए पडुच्च तंजहा-पुढवीकायं जाव तसकायं, से एगइत्थो पुढवीकाएणां किच्चं करेइवि कारवेइवि, तस्स गां एवं भवइ-एवं खलु अहं पुढवीकाएणां किच्चं करेमिवि कारवेमिवि, गो चेव गां से एवं भवइ इमेणा वा इमेणा वा, से एतेणां पुढवीकाएणां किच्चं करेइवि कारवेइवि से गां तातो पुढवीकायात्थो असंजयअविरयअप्पडिहयपच्चक्खायपावकम्मे यावि भवइ, एवं जाव तसकाए त्ति भाणियव्वं, से एगइत्थो छजीवनिकाएहिं किच्चं करेइवि कारवेइवि, तस्स गां एवं भवइ-एवं खलु छजीवनिकाएहिं किच्चं करेमिवि कारवेमिवि, गो चेव गां से एवं भवइ-इमेहिं वा इमेहिं वा, से य तेहिं छहिं जीवनिकाएहिं जाव कारवेइवि, से य तेहिं छहिं जीवनिकाएहिं असंजयअविरयअप्पडिहयपच्चक्खायपावकम्मे तं० पाणातिवाए जाव मिच्छादंमणासल्ले, एस खलु भगवया अक्खाए असंजए अविरए अप्पडिहयपच्चक्खायपावकम्मे सुविणमवि अपस्सत्थो पावे य से कम्मे कज्जइ, से तं सन्निदिट्ठंते ? ॥ से किं तं असन्निदिट्ठंते ?, जे इमे असन्निगो पाणा तंजहा-

पुढवीकाइया जाव वणारसइकाइया छट्टा वेगइया तस पाणा, जेसि गो तका
इ वा सन्ना ति वा पन्ना ति वा मणा(णो)ति वा वई इ वा, सयं वा करणाए
अन्नेहिं वा कारावेत्तए करंतं वा समणुजाणित्तए, तेऽवि णं बाले सव्वंसिं
पाणाणां जाव सव्वेसिं सत्ताणां दिया वा रात्रो वा सुत्ते वा जागरमाणो वा
अमित्तभूता मिच्छासंठिया निच्चं पसढविउवातचित्तदंडा तंजहा—पाणाइवाते
जाव मिच्छादंसणमल्ले, इच्चेव जाव गो चेव मणो गो चेव वई पाणाणां
जाव सत्ताणां दुक्खणायाए सोयणायाए जूरणायाए तिप्पणायाए पिट्टणायाए परि-
तप्पणायाए ते दुक्खणासोयणाजावपरितप्पणावहबंधणापरिकिलेसात्रो अप्पडि-
विरया भवंति २ ॥ इति खलु से असन्निणोऽवि सत्ता अहोनिंसिं पाणातिवाए
उवक्खाइज्जंति जाव अहोनिंसिं परिग्गहे उवक्खाइज्जंति जाव मिच्छादंसण-
सल्ले उवक्खाइज्जंति, [एवं भूतवादी] सव्वजोणियावि खलु सत्ता सन्निणो हुच्चा
असन्निणो हंति असन्निणो हुच्चा सन्निणो हंति, होच्चा सन्नी अदुवा
असन्नी, तत्थ से अविचिच्चा अविधूणित्ता असंमुच्छित्ता अणुतावित्ता
असन्निकायात्रो वा सन्निकायं संकमंति सन्निकायात्रो वा असन्निकायं
संकमंति, सन्निकायात्रो वा सन्निकायं संकमंति असन्निकायात्रो वा अस-
न्निकायं संकमंति, जे एए सन्नि वा असन्नि वा सव्वे ते मिच्छायारा
निच्चं पसढविउवायचित्तदंडा, तंजहा—पाणातिवाए जाव मिच्छादंसणसल्ले,
एवं खलु भगवया अक्खाए असंजए अविरए अप्पडिहयप्पच्चक्खायपावकम्मे
सकिरिए असंबुडे एगंतदंडे एगंतबाले एगंतसुत्ते से बाले अवियारमणवयणा-
कायवक्के सुविणमवि ण पासइ पावे य से कम्मे कज्जइ ३ ॥सूत्रं ६६॥
चोदकः—से किं कुव्वं किं कारवं कहं संजयविरयप्पडिहयपच्चक्खायपावकम्मे
भवइ ?, आचार्य आह—तत्थ खलु भगवया छ्जीवणिकाय हेऊ पराणात्ता,
तंजहा—पुढवीकाइया जाव तसकाइया, से जहाणामए मम अस्सातं दंडेण
वा अट्टीण वा मुट्टीण वा लेलूण वा क्वालेण वा आतोडिज्जमाणस्स वा

जाव उवहविज्जमाणस्स वा जाव लोमुक्खण्णामायमवि हिंसाकारं दुक्खं भयं पडिसंवेदेमि, इच्चेवं जाण सव्वे पाणा जाव सव्वे सत्ता दंडेण वा जाव कवालेण वा आतोडिज्जमाणा वा हम्ममाणो वा तज्जिज्जमाणो वा तालिज्जमाणो वा जाव उवहविज्जमाणो वा जाव लोमुक्खण्णामायमवि हिंसाकारं दुक्खं भयं पडिसंवेदेंति, एवं णच्चा सव्वे पाणा जाव सव्वे सत्ता न हंतव्वा जाव ण उहवेयव्वा, एस धम्मे धुवे णिइए सासए समिच्च लोगं खेयन्नेहिं पवेदिए, एवं से भिक्खु विरते पाणाइवायातो जाव मिच्छादंसणसल्लाओ, से भिक्खु णो दंतपक्खालणेणं दंते पक्खालेज्जा, णो अंजणं णो वमणं णो धूवणित्तं पिआइते, से भिक्खु अकिरिए अलूमए अकोहे जाव अलोभे उवसंते परि- निव्वुडे, एस खलु भगवया अक्खाए संजयविरयपडिहयपच्चक्खायपावकम्मे अकिरिए संबुडे एगंतपंडिए भवइ त्तिवेमि ॥ सूत्रं ६७ ॥

॥ इति चतुर्थमध्ययनम् ॥ २-४ ॥

॥ अथ पञ्चममाचारश्रुताध्ययनम् ॥

आदाय बंधेरं च, आसुपन्ने इमं वइं । अस्सि धम्मे अणायारं, नायरेज्ज कयाइवि ॥१॥ अणादीयं परिन्नाय, अणवदग्गेति वा गुणो । सासयमसासए वा, इति दिट्ठिं न धारए ॥२॥ एएहिं दोहिं अणोहिं, ववहारो ण विज्जई । एएहिं दोहिं अणोहिं, अणायारं तु जाणए ॥३॥ समुच्छि(ज्ज)हिंति सत्थारो, सव्वे पाणा अणोलिसा । गंठिगा वा भवि- स्संति, सासयंति व णो वए ॥४॥ एएहिं दोहिं अणोहिं, ववहारो ण विज्जइ । एएहिं दोहिं अणोहिं, अणायारं तु जाणए ॥५॥ जे केइ खुहगा पाणा, अदुवा संति महालया । सरिसं तेहिं वेरंति, असरिसंती य णो वदं ॥६॥ एएहिं दोहिं अणोहिं, ववहारो ण विज्जई । एएहिं दोहिं अणोहिं, अणायारं तु जाणए ॥७॥ अहाकम्माणि (अहाकडाणि) भुंजंति, अणाम-

रणो सकम्मुणा । उवलित्तेति जाणिज्जा, अणुवलित्तेति वा पुणो ॥८॥
एएहिं दोहिं ठणोहिं, ववहारो ण विज्जई । एएहिं दोहिं ठणोहिं, अणा-
यारं तु जाणए ॥९॥ जमिदं ओरालमाहारं, कम्मगं च तहेव य (तमेव तं) ।
सव्वत्थ वीरियं अत्थि, णत्थि सव्वत्थ वीरियं ॥१०॥ एएहिं दोहिं
ठणोहिं, ववहारो ण विज्जई । एएहिं दोहिं ठणोहिं, अणायारं तु
जाणए ॥ ११ ॥ णत्थि लोए आलोए वा, णोवं सन्नं निवेसए । अत्थि लोए
अलोए वा, एवं सन्नं निवेसए ॥ १२ ॥ णत्थि जीवा अजीवा वा, णोवं
सन्नं निवेसए । अत्थि जीवा अजीवा वा, एवं सन्नं निवेसए
॥१३॥ णत्थि धम्मे अधम्मे वा, णोवं सन्नं निवेसए । अत्थि धम्मे
अधम्मे वा, एवं सन्नं निवेसए ॥१४॥ णत्थि बंधे व मोक्खे वा, णोवं सन्नं
निवेसए । अत्थि बंधे व मोक्खे वा, एवं सन्नं निवेसए ॥१५॥ णत्थि पुणो
व पावे वा, णोवं सन्नं निवेसए । अत्थि पुणो व पावे वा, एवं सन्नं
निवेसए ॥१६॥ णत्थि आसवे संवरे वा, णोवं सन्नं निवेसए । अत्थि
आसवे संवरे वा, एवं सन्नं निवेसए ॥१७॥ णत्थि वेयणा णिज्जरा वा, णोवं
सन्नं निवेसए । अत्थि वेयणा णिज्जरा वा, एवं सन्नं निवेसए ॥१८॥
णत्थि किरिया अकिरिया वा, णोवं सन्नं निवेसए । अत्थि किरिया अकि-
रिया वा, एवं सन्नं निवेसए ॥१९॥ णत्थि कोहे व माणो वा, णोवं सन्नं
निवेसए । अत्थि कोहे व माणो वा, एवं सन्नं निवेसए ॥२०॥ णत्थि माया
व लोभे वा, णोवं सन्नं निवेसए । अत्थि माया व लोभे वा, एवं सन्नं
निवेसए ॥२१॥ णत्थि पेज्जे व दोसे वा, णोवं सन्नं निवेसए । अत्थि
पेज्जे व दोसे वा, एवं सन्नं निवेसए ॥२२॥ णत्थि चाउरंते संसारे, णोवं
सन्नं निवेसए । अत्थि चाउरंते संसारे, एवं सन्नं निवेसए ॥२३॥ णत्थि
देवो व देवी वा, णोवं सन्नं निवेसए । अत्थि देवो व देवी वा, एवं सन्नं
निवेसए ॥२४॥ णत्थि सिद्धी असिद्धी वा, णोवं सन्नं निवेसए । अत्थि

सिद्धी असिद्धी वा, एवं सन्नं निवेसए ॥२५॥ एत्थि सिद्धी नियं ठाणं,
 गोवं सन्नं निवेसए । अत्थि सिद्धी नियं ठाणं, एवं सन्नं निवेसए ॥२६॥
 एत्थि साहू असाहू वा, गोवं सन्नं निवेसए । अत्थि साहू असाहू वा, एवं
 सन्नं निवेसए ॥२७॥ एत्थि कल्लाण पावे वा, गोवं सन्नं निवेसए ।
 अत्थि कल्लाण पावे वा, एवं सन्नं निवेसए ॥२८॥ कल्लाणो पावए वावि,
 ववहारो ण विज्जइ । जं वेरं तं न जाणांति, समणा बाल पंडिया ॥२९॥
 असेसं अक्खयं वादि, सच्चदुक्खेति वा पुणो । वज्झा पाणा न वज्झत्ति,
 इति वायं न नीसरे ॥३०॥ दीसंति निभियप्पाणो (समियायारा), भिवखुणो
 साहुजीविणो । एए (तेवि) मिच्छोवजीवंति, इति दिट्ठिं न धारए ॥३१॥
 दक्खिणाए पडिलंभो, अत्थि वा एत्थि (अत्थि एत्थि त्ति) वा पुणो । ण
 वियागरेज्ज मेहावी, संतिमग्गं च वूहए ॥३२॥ इच्चेएहिं ठाणेहिं, जिणादि-
 ट्ठेहिं संजए । धारयंते उ अत्थिणां, आमोक्खाए परिवएज्जासि ॥३३॥
 त्तिवेमि ॥

॥ इति पञ्चममध्ययनम् ॥२-५॥

॥ अथ षष्ठमाद्र्कीयाध्ययनम् ॥

पुराकडं अह ! इमं सुणेह, एगंतयारी समणे पुरासी । से
 भिवखुणो उवणेत्ता अणेगे, आइक्खतिरिह पुढो विथरेणं ॥१॥
 साऽऽजीविया पट्टविताऽथिरेणं, सभागत्रो गणत्रो भिवखुमज्जे । आइ-
 क्खमाणो बहुजन्नमत्थं, न संधयाती अवरेण पुव्वं ॥२॥ एगंतमेवं अदुवा
 वि इरिंह, दोऽवराणमन्नं न समेति जम्हा । पुव्विं च इरिंह च अणागतं
 वा, एगंतमेवं पडिसंधयाति ॥३॥ समिच्च लोगं तसथावराणं, खेमंकरे
 समणे माहणे वा । आइक्खमाणोवि सहस्स मज्जे, एगंतयं सारयती तहऽच्चे
 ॥४॥ धम्मं कहंतस्स उ एत्थि दोसो, खंतस्स दंतस्स जित्तिदियस्स ।

भासाय दोसे य विवज्जगस्स, गुणो य भासाय णिसेवगस्स ॥५॥ महव्वए
 पंच अणुव्वए य, तहेव पंचासव संवरे य । विरतिं इहस्सामणियंमि
 पुण्णे (पन्ने), लवावसक्की समणोत्तिवेमि ॥६॥ सीओदगं सेवउ बीयकायं,
 आहायकम्मं तह इत्थियाओ । एगंतचारिस्सिह अम्ह धम्मे, तवस्सिणो णाभि-
 समेति पावं ॥७॥ सीतोदगं वा तह बीयकायं, आहायकम्मं तह इत्थियाओ ।
 एयाइं जाणं पडिसेवमाणा, अगारिणो अस्समणा भवंति ॥८॥ सिया य
 बीओदग इत्थियाओ, पडिसेवमाणा समणा भवंतु । अगारिणोऽवी समणा
 भवंतु, सेवंति उ तेऽवि तहप्पगारं ॥९॥ जे यावि बीओदगभोति भिक्खु, भिक्खं
 विहं जायति जीवियट्ठी । ते णातिसंजोगमप्पविहाय, कायोवगा एतंकरा भवंति
 ॥१०॥ इमं वयं तु तुम पाउकुव्वं, पावाइणो गरिहसि सव्व एव । पावाइणो पुढो
 किट्ठयंता, सयं सयं दिट्ठि करेति पाउ ॥११॥ ते अन्नमन्नस्स उ गरहमाणा,
 अक्खंति भो समणा माहणा य । सतो य अत्थी असतो य णत्थी,
 गरहामो दिट्ठि ण गरहामो किंचि ॥१२॥ ण किंचि रूवेणऽभिधारयामो,
 सदिट्ठिमगं तु करेमु पाउं । एग्गे इमे किट्ठिणं आरिण्हिं, अणुत्तरे सप्पुरि-
 सेहिं अञ्जू ॥१३॥ उड्ढं अहेयं तिरियं दिसासु, तसा य जे थावर जे य पाणा ।
 भूयाहिसंकाभि दुगुञ्जमाणा, णो गरहती बुसिमं किंचि लोए ॥१४॥
 आगंतगारे आरामगारे, समणे उ भीते ण उवेति वासं । दक्खा हु संती
 बहवे मणुस्सा, ऊणातिरित्ता य लवालवा य ॥१५॥ मेहाविणो सिविस्वय
 बुद्धिमंता, सुत्तेहि अत्थेहि य णिच्छयन्ना (णिच्छयन्नु) । पुच्छिसु मा णो
 अणुगार एगे (यन्ने), इति संकमाणो ण उवेति तत्थ ॥१६॥ णो कामकिच्चा
 ण य बालकिच्चा, रायाभियांगेण कुओ भएणं । वियागरेज्ज पत्तिणं नवावि,
 सकामकिच्चेण्हि आरियाणं ॥१७॥ गंता च तत्था अदुवा अगंता, विया-
 गरेज्जा समियाऽऽसुपन्ने । अणारिया दंमणओ परित्ता, इति संकमाणो ण उवेति
 तत्थ ॥१८॥ पन्नं जहा वणिए उदयट्ठी, आयस्स हेउं पगरेति संगं । तज्जमे

समणो नायपुत्ते, इच्चेव मे होति मती वियक्का ॥१९॥ नवं न कुज्जा विहुणो
पुराणं, चिच्चाऽमइं ताइ य साह एवं । एतोवया वंभवत्ति बुत्ता, तस्सो-
दयट्ठी समणोत्तिवेमि ॥२०॥ समारभंते वणिया भूयगामं, परिग्गहं चैव ममा-
यमाणा । ते णानिसंजोगमविप्पहाय, आयस्स हेउं पगरंति संगं ॥२१॥
वित्तेसिणो मेहुणसंपगात्ता, ते भोयणाट्ठा वणिया वयंति । वयं तु कामेसु
अज्झोववन्ना, अणारिया पेमरसेसु गिच्चा ॥२२॥ आरंभं चैव परिग्गहं
च, अविउस्सिया णिस्सिय आयदंडा । तेसिं च से उदए जं वयासी, चउरं-
तणंताय दुहाय गेह ॥२३॥ गेगंत णच्चंतिव ओदए सो, वयंति ते दो
विगुणोदयमि । से उदए सातिमणंतपत्ते, तमुदयं साहयइ ताइ णाई ॥२४॥
अहिसयं सव्वपयाणुकंपी, धम्मे ठियं कम्मविवेगहेउं । तमायदंडेहिं समायरंता,
अवोहीए ते पडिरूवमेयं ॥२५॥ पिन्नागपिंडीमवि विच्छ सूले, केइ पएज्जा
पुरिसे इमेत्ति । अलाउयं वावि कुमारएत्ति, स लिप्पती पाणिवहेण अम्हं
॥२६॥ अहवावि विच्छूण मिलक्खु सूले, पिन्नागबुद्धीइ नरं पएज्जा । कुमा-
रगं वावि अलाबुयंति, न लिप्पइ पाणिवहेण अम्हं ॥२७॥ पुरिसं च
विच्छूण कुमारगं वा, सूलंमि केइ पए जायतेए । पिन्नाय पिंडं सतिमारुहेत्ता,
बुद्धाण तं कप्पति पारणाए ॥२८॥ सिणायगाणं तु दुवे सहस्से, जे भोयए
णियए भिक्खुयाणं । ते पुन्नखंधं सुमहं जिणित्ता, भवंति आरोप्प महंतमत्ता
॥२९॥ अजोगरूवं इह संजयाणं, पावं तु पाणाण पसज्झ काउं । अवोहिए
दोराहवि तं असाहु, वयंति जे यावि पडिस्सुणंति ॥३०॥ उट्ठं अहेयं तिरियं
दिसासु, विन्नाय लिंगं तसथावराणं । भूयाभिसंकाइ दुगुंढमाणो, वदे करेज्जा
व कुओ विहस्सथी ? ॥३१॥ पुरिसेत्ति विन्नत्ति न एवमत्थि, अणारिए से
पुरिसे तहा हु । को संभवो ? पिन्नागपिंडियाए, वायावि एसा बुइया अमच्चा
॥३२॥ वायाभियोगेण जमावहेज्जा, णो तारिसं वायमुदाहरिज्जा । अट्ठा-
णमेयं वयणं गुणाणं, णो दिक्खिए बूय सुरालमेयं ॥३३॥ लद्धे अट्ठे अहो

एव तुब्भे, जीवाणुभागे सुविचित्रिणो व । पुर्व्वं समुद्दं अवरं च पुट्टे, उलो-
 इए पाणितले ठिए वा ॥३४॥ जीवाणुभागं सुविचित्रयंता, आहारिया अन्न-
 विहीय सोहिं । न वियागरे छन्नपत्रोपजीवि, एसोऽणुधम्मो इह संजयाणं
 ॥३५॥ सिणायगाणं तु दुवे सहस्से, जे भोयए नियए भिक्खुयाणं । असं-
 जए लोहियपाणि से ऊ, णियच्छति गरिहमिहेव लोए ॥३६॥ थूलं उरब्भं
 इह मारियाणं, उद्दिट्ठभत्तं च पगप्पएत्ता । तं लोणतेल्लेण उवक्खडेत्ता, सपि-
 ष्पलीयं पगरंति मंसं ॥३७॥ तं भुंजमाणा पिसितं पभूतं, णो उवलिप्पाभो
 वयं रएणं । इच्चेवमाहंसु अणज्जधम्मा, अणारिया बाल रसेसु गिद्धा ॥३८॥
 जे यावि भुंजंति तहप्पगारं, सेवंति ते पावमजाणमाणा । मणं न एयं
 कुसला करेती, वायावि एसा बुइया उ मिच्छा ॥३९॥ सव्वेसिं जीवाण दय-
 ट्ठयाए, सावज्जदोसं परिवज्जयंता । तस्संकिणो इसिणो नायपुत्ता, उद्दिट्ठभत्तं
 परिवज्जयंति ॥४०॥ भूयाभिसंकाए दुगुंछमाणा, सव्वेसिं पाणाण निहाय
 दंडं । तम्हा ण भुंजंति तहप्पगारं, एसोऽणुधम्मो इह संजयाणं ॥४१॥ निग्गंथ-
 धम्मंमि इमं समाहिं, अस्सि सुठिच्चा अणिहे चरेज्जा । बुद्धे मुणी सीलगुणो-
 ववेए, अच्चत्थतं (त्रो) पाउणाती सिलोगं ॥४२॥ सिणायगाणं तु दुवे सहस्से,
 जे भोयए णियए माहणाणं । ते पुन्नखंधे सुमहऽज्जणित्ता, भवंति देवा इति
 वेयवात्रो ॥४३॥ सिणायगाणं तु दुवे सहस्से, जे भोयए णियए कुलाल-
 याणं । से गच्छति लोलुवसंपगाढे, विव्वाभितावी णारगाभिसेवी ॥४४॥
 दयावरं धम्म दुगुंछमाणा, वहावहं धम्म पसंसमाणा । एगंपि जे भोययती
 असीलं, णिवो णिसं जाति कुत्रो सुरेहिं ? ॥४५॥ दुहत्रोवि धम्मंमि
 समुट्ठियामो, अस्सि सुट्ठिच्चा तह एसकालं । आयारसीले बुइएह नाणी, ण
 संपंरायंमि विसेसमत्थि ॥४६॥ अव्वत्तरूवं पुरिसं महंतं, सणातयां अक्खय-
 मव्वयं च । सव्वेसु भूतेसुवि सव्वतो से, चंदो व ताराहिं समत्तरूवे
 ॥४७॥ एवं ण मिज्जंति ण संसरंती, ण माहणा खत्तिय वेस पेसा ।

कीडा य पक्खी य सरीसिवा य, नरा य सव्वे तह देवलोगा ॥४८॥
 लोयं अयाणित्तिह केवलेणं, कंहंति जे धम्ममजाणमाणा । णासंति अप्पाण
 परं च णट्ठा, संसार घोरंमि अणोरपारे ॥४९॥ लोयं विजाणंतिह केवलेणं,
 पुन्नेण नाणेण समाहिजुत्ता । धम्मं समत्तं च कंहंति उ, तारंति अप्पाण परं
 च तिस्रा ॥५०॥ जे गरहियं ठाणभिहावसंति, जे यावि लोए चरणोववेया ।
 उदाहडं तं तु समं मईए, अहाउसो विप्परियासमेव ॥५१॥ संवच्छरेणावि
 एगमेगं, बाणेण मारेउ महागयं तु । सेसाण जीवाण दयट्ठयाए, वासं वयं
 वित्ति पक्कप्यामो ॥५२॥ संवच्छरेणावि य एगमेगं, पाणं हणांता अणियत्त-
 दोसा । सेसाण जीवाण बहेण लग्गा, सिया य थोवं गिहिणोऽवि तम्हा
 ॥५३॥ संवच्छरेणावि य एगमेगं, पाणं हणांता समणांव्वएसु । आयाहिए
 पुरिसे अणज्जे, ण तारिसे केवलिणो भवंति ॥५४॥ बुद्धस्स आणाए इमं
 समाहिं, अस्सि सुत्तिच्चा तिविहेण ताई । तरिउं समुहं व महाभवोचं, आया-
 णावं धम्ममुदाहरेज्जा ॥५५॥ त्तिवेमि ॥

॥ इति षष्ठमध्ययनम् ॥ २-६ ॥

॥ अथ सप्तमं नालन्दीयाध्ययनम् ॥

तेणं कालेणं तेणं समएणं रायगिहे नामं नयरे होत्था, रिद्धित्थमित-
 समिद्धे वराणओ जाव पडिख्वे, तस्स णं रायगिहस्स नयरस्स बहिया उत्तर-
 पुरच्छिमे दिसीभाए, (एत्थ णं) नालंदाणामं बाहिरिया होत्था, अणोगभवण-
 सयसन्निविट्ठा जाव पडिख्वा ॥सू० ६८॥ तत्थ णं नालंदाए बाहिरियाए लेवे
 नामं गाहावई होत्था, अट्ठे दित्ते वित्ते विच्छिराणविपुलभवणसयणासण-
 जाणवाहणाइरणो बहुधणवहुजायरूवरजते आओगपओगसंपउत्ते विच्छिड्डिय-
 पउरभत्तपाणे बहुदासी दासगोमहिसगवेलगप्पभूए बहुजणस्स अपरिभूए (जाव)
 यावि होत्था ॥ से णं लेवे नामं गाहावई समणोवासए यावि होत्था, अभि-

गयजीवाजीवे जाव विहरइ, निग्गंथे पावयणे निस्संकिए निक्कंसिए निव्विति-
 गिच्छे लद्धट्ठे गहियट्ठे पुच्छियट्ठे विणिच्छियट्ठे अभिगहियट्ठे अट्ठिमिजा-
 पेमाणुरागरत्ते, अयमाउसो ! निग्गंथे पावयणे अयं अट्ठे अयं परमट्ठे सेसे
 अण्णट्ठे, उस्सियफलिहं अण्णपावयदुवारे चियत्तंतेउरप्पवेसे चाउहसट्टमुद्धिट्टपुराण-
 मासिणीसु पडिपुन्नं पोसहं सम्म अण्णपालेमाणो समणे निग्गंथे तहाविहेणं एस-
 णिज्जेणं असण्णपाणखाइमसाइमेणं पडिलाभेमाणो व्हूहिं सीलव्वयगुणविरमण-
 पच्चक्खाणपोसहोववासेहिं अण्णणं भावेमाणो एवं च णं विहरइ ॥सू० ६६॥ तस्स
 णं लेवस्स गाहावइस्स नालंदाए बाहिरियाए उत्तरपुरच्छिमे दिसिभाए एत्थ
 णं सेसदविया नामं उदगसाला होत्था, अण्णोगखंभसयसन्निविट्ठा पासादीया
 जाव पडिरूवा, तीसे णं सेसदवियाए उदगसालाए उत्तरपुरच्छिमे दिसिभाए,
 एत्थ णं हत्थिजामे नामं वण्णसंडे होत्था, किण्णे वण्णयो वण्णसंडस्स
 ॥सू० ७०॥ तेस्सि च णं गिहपदेसंमि भगवं गोयमे विहरइ, भगवं च णं
 अहे आरामंसि । अहे णं उदए पेढालपुत्ते भगवं पासावच्चिज्जे नियंठे
 मेयज्जे गोत्तेणं जेणोव भगवं गोयमे तेणोव उवागच्छइ, उवागच्छइत्ता भगवं
 गोयमं एवं वयासी-आउसंतो ! गोयमा अत्थि खलु मे केइ पदेसे पुच्छि-
 यव्वे, तं च (मे) आउसो ! अहासुयं अहादरिसियं मे वियागरेहि सवायं,
 भगवं गोयमे उदयं पेढालपुत्तं एवं वयासी-अवियाइ आउसो ! सोच्चा
 निसम्म जाणिस्सामो सवायं, उदए पेढालपुत्ते भगवं गोयमं एवं वयासी
 ॥सू० ७१॥ आउसो ! गोयमा अत्थि खलु कुमारपुत्तिया नाम समण्णा
 निग्गंथा तुम्हाणं पवयणं पवयमाणो गाहावइं समणोवासगं उव-
 संपन्नं एवं पच्चक्खावेत्ति-ण्णणत्थ अभिओएणं गाहावइचोरग्गहणविमो-
 क्खणयाए तसेहिं पाणोहिं णिहाय दंडं, एवं राहं पच्चक्खंताणं दुप्पच्चक्खायं
 भवइ, एवं राहं पच्चक्खावेमाण्णाणं दुप्पच्चक्खावियत्वं भवइ, एवं ते परं पच्च-
 क्खावेमाण्णा अतियरंति सयं पतिएणं, कस्स णं तं हेउं ?, संसारिया खलु

पाणा थावरावि पाणा तसत्ताए पञ्चायंति, तसावि पाणा थावरत्ताए पञ्चा-
यंति, थावरकायात्रो विष्पमुच्चमाणा तसकायंसि उववज्जंति, तसकायात्रो
विष्पमुच्चमाणा थावरकायंसि उववज्जंति, तेसिं च णं थावरकायंसि उवव-
राणाणं ठाणमेयं घत्तं ॥सू० ७२॥ एवं राहं पच्चक्खंताणां सुपच्चक्खायं
भवइ, एवं राहं पच्चक्खावेमाणाणं सुपच्चक्खावियं भवइ, एवं ते परं
पच्चक्खावेमाणा णातियरंति सयं पइराणां, णाराणत्थ अभित्रोगेणं गाहा-
वइचोरग्गहणविमोक्खणयाए तसभूएहिं पाणेहिं णिहाय दंडं, एवमेव सइ
भासाए परक्कमे विज्जमाणे जे ते कोहा वा लोहा वा परं पच्चक्खवेति
अयंपि णो उवएसे णो णोआउए भवइ, अवियाइं आउसो ! गोयमा !
तुब्भंपि एवं रोयइ ? ॥सू० ७३॥ सवायं भगवं गोयमे ! उदयं पेढालपुत्तं
एवं वयासी-आउसंतो ! उदगा नो खलु अग्हे एयं रोयइ, जे ते समणा
वा माहणा वा एवमाइक्खंति जाव परूवेति णो णलु ते समणा वा
णिग्गंथा वा भासं भासंति, अणुतावियं खलु ते भासं भासंति, अब्भाइक्खंति
खलु ते समणे समणोवासए वा, जेहिंवि अन्नेहिं जीवेहिं पाणेहिं भूएहिं
सत्तेहिं संजमयंति ताणवि ते अब्भाइक्खंति, कस्स णं तं हेउं ? संमारिया
खलु पाणा, तसावि पाणा थावरत्ताए पञ्चायंति थावरावि पाणा तसत्ताए
पञ्चायंति तसकायात्रो विष्पमुच्चमाणा थावरकायंसि उववज्जंति थावर-
कायात्रो विष्पमुच्चमाणा तसकायंसि उववज्जंति, तेसिं च णं तसकायंसि
उववन्नाणं ठाणमेयं अघत्तं ॥सू. ७४॥ सवायं उदए पेढालपुत्ते भगवं गोयमं
एवं वयासी-कयरे खलु ते आउसंतो गोयमा ! तुब्भे वयह तमा पाणा तसा
आउ अन्नहा ? सवायं भगवं गोयमे उदयं पेढालपुत्तं एवं वयासी-आउसंतो
उदगा ! जे तुब्भे वयह तसभूता पाणा, तसा ते वयं वयामो तसा पाणा,
जे वयं वयामो तसा पाणा ते तुब्भे वयह तसभूया पाणा, एए संति दुवे
ठाणा तुल्ला एगट्ठा. किमाउसो ! इमे भे सुप्पणीयतराए भवइ तसभूया पाणा

तसा, इमे भे दुप्पणीयतराए भवइ-तसा पाणा तसा, ततो एगमा-
उसो ! पडिकोसह एककं अभिणादह, अयंपि भेदो से णो णोआउए
भवइ १ ॥ भगवं च णं उदाहु-संतेगइआ मणुस्सा भवंति, तेसिं च
णं एवं वुत्तपुच्चं भवइ-णो खलु वयं संचाएमो मुंडा भवित्ता अगाराओ
अणगारियं पवइत्तए, सावयं राहं अणुपुव्वेणं गुत्तस्स लिसिस्सामो, ते
एवं संखंते ते एवं संखं ठवयंति ते एवं संखं ठवयंति नन्नत्थ अभि-
ओएणं गाहावइचोरग्गहणविमांक्खणयाए तसेहिं पाणोहिं निहाय दंडं,
तंपि तेसिं कुसलमेव भवइ २ ॥सू० ७५॥ तसावि वुच्चंति तसा तससंभार-
कडेणं कम्मुणा णामं च णं अब्भुवगयं भवइ, तसाउयं च णं पलिक्खीणं
भवइ, तसकायट्ठिइया ते तओ आउयं विप्पजहंति, ते तओ आउयं विप्प-
जहित्ता थावरत्ताए पच्चायंति १ । थावरावि वुच्चंति थावरा थावरसंभार-
कडेणं कम्मुणा णामं च णं अब्भुवगयं भवइ, थावराउयं च णं पलिक्खीणं
भवइ, थावरकायट्ठिइया ते तओ आउयं विप्पजहंति तओ आउयं विप्प-
जहित्ता भुज्जो परलोइयत्ताए पच्चायंति, ते पाणावि वुच्चंति, ते तसावि
वुच्चंति ते महाकाया ते चिरट्ठिइया २ ॥सूत्रं ७६॥ सवायं उदए पेढालपुत्ते
भयवं गोयमं एवं वयासी-आउसंतो गोयमा ! णत्थि णं से केइ परियाए
जराणं समणोवासगस्स एगपाणातिवायावरएवि दंडे निक्खित्ते, कस्स णं तं
हेउं ?, संसारिया खलु पाणा, थावरावि पाणा तसत्ताए पच्चायंति, तसावि
पाणा थावरत्ताए पच्चायंति, थावरकायाओ विप्पमुच्चमाणा सव्वे तसकायंसि
उववज्जंति, तसकायाओ विप्पमुच्चमाणा सव्वे थावरकायंसि उववज्जंति,
तेसिं च णं थावरकायंसि उववन्नाणं ठाणमेयं घत्तं ॥१॥ सवायं भगवं गोयमे
उदयं पेढालपुत्तं एवं वयासी-णो खलु आउसो ! अस्माकं वत्तव्वएणं तुब्भं
चेव अणुप्पवादेरां अत्थि णं से परियाए जे णं समणोवासगस्स सव्वपाणोहिं
सव्वभूएहिं सव्वजीवेहिं सव्वसत्तेहिं दंडे निक्खित्ते भवइ, कस्स णं तं हेउं ?,

संसारिया खलु पाणा, तसावि पाणा थावरत्ताए पञ्चायंति, थावरावि पाणा तसत्ताए पञ्चायंति, तसकायात्रो विष्पमुच्चमाणा सव्वे थावरकायंसि उववज्जंति, थावरकायात्रो विष्पमुच्चमाणा सव्वे तसकायंसि उववज्जंति, तेसिं च गां तसकायंसि उववन्नाणं ठाणमेयं अघत्तं, ते पाणावि बुच्चंति, ते तसावि बुच्चंति, ते महाकाया ते चिरट्टिइया, ते बहुयरगा पाणा जेहिं समणोवासगस्स सुपच्चक्खायं भवति, ते अप्पयरागा पाणा जेहिं समणोवासगस्स अपच्चक्खायं भवइ, से महया तसकायात्रो उवसंतस्स उवट्टियस्स पडिविरयस्स जन्नं तुब्भे वा अन्नो वा एवं वदह-णात्थि गां से केइ परियाए जंसि समणोवासगस्स एगपाणाएवि दंडे णिक्खित्ते, अयंपि भेदे से णो णोयाउए भवइ २॥ सूत्रं ७७॥ भगवं च गां उदाहु नियंठा खलु पुच्छियञ्चा-आउसंतो ! नियंठा इह खलु संतेगइया मणुस्सा भवंति, तेसिं च एवं वुत्तपुब्बं भवइ-जे इमे मुंडे भवित्ता आगारात्रो अणगारियं पव्वइए, एमिं च गां आमरणांताए दंडे णिक्खित्ते, जे इमे अगारमावसंति एएसिं गां आमरणांताए दंडे णो णिक्खित्ते, केइ च गां समणा जाव वासाइं चउपंचमाइं छट्टइसमाइं अप्पयरो वा भुज्जयरो वा देसं दूईजित्ता अगारमावसेज्जा ?, हंतावसेज्जा, तस्स गां तं गारत्थं वहमाणस्स से पच्चक्खारो भंगे भवइ ?, णो तिणट्ठे समट्ठे, एवमेव समणोवासगस्सवि तसेहिं पाणोहिं दंडे णिक्खित्ते, थावरेहिं पाणोहिं दंडे णो णिक्खित्ते, तस्स गां तं थावरकायं वहमाणस्स से पच्चक्खारो णो भंगे भवइ, से एवमायाणाह ? णियंठा !, एवमायाणियच्चं १॥ भगवं च गां उदाहु नियंठा खलु पुच्छियञ्चा-आउसंतो नियंठा ! इह खलु गाहावई वा गाहावइपुत्तो वा तहप्पगारेहिं कुलेहिं आगम्म धम्मं सवणावत्तियं उवसंकमेज्जा ?, हंता उवसंकमेज्जा, तेसिं च गां तहप्पगाराणं धम्मं आइक्खियव्वे ?, हंता आइक्खियव्वे, किं ते तहप्पगारं धम्मं सोच्चा णिमम्म एवं वएज्जा-इणा-मेव निग्गंथं पावयणां सच्चं अणुत्तरं केवलियं पडिपुाणां संसुद्धं णोयाउयं

सल्लकत्तणं सिद्धिमग्गं मुत्तिमग्गं निज्जाणमग्गं निव्वाणमग्गं अविहमसंदिद्धं
 सब्बदुक्खपणीणमग्गं, एत्थं ठिया जीवा सिज्झंति बुज्झंति मुच्चंति परिणि-
 व्वायंति सब्बदुक्खाणमंतं करेति, तमाणाए तहा गच्छामो तहा चिट्ठामो तहा
 णिसियामो तहा तुयट्ठामो तहा भुंजामो तहा भासामो तहा अब्भुट्ठामो तहा
 उट्ठाए उट्ठेमोत्ति पाणाणं भूयाणं जीवाणं सत्ताणं संजमेणं संजमामोत्ति
 वएज्जा ? , हंता वएज्जा, किं ते तहप्पगारा कप्पंति, पव्वावित्तए ? , हंता
 कप्पंति, किं ते तहप्पगारा कप्पंति मुंडावित्तए ? , हंता कप्पंति, किं ते तहप्प-
 गारा कप्पंति सिक्खावित्तए ? . हंता कप्पंति, किं ते तहप्पगारा कप्पंति उव-
 ट्ठावित्तए ? , हंता कप्पंति, तेसिं च णं तहप्पगाराणं सब्बपाणेहिं जाव सब्ब-
 सत्तेहिं दंडे णिक्खित्ते ? , हंता निक्खित्ते, से णं एयारूवेणं विहारेणं विह-
 रमाणा जाव वासाइं चउपंचमाइं छट्ठइसमाइं वा अप्पयरो वा भुज्जयरो वा
 देसं दूइज्जेत्ता अगारं वएज्जा ? , हंता वएज्जा, तस्स णं सब्बपाणेहिं जाव
 सब्बसत्तेहिं दंडे णिक्खित्ते ? , णो इण्णट्ठे समट्ठे, से जे से जीवे जस्स परेणं
 सब्बपाणेहिं जाव सब्बसत्तेहिं दंडे णो णिक्खित्ते, से जे से जीवे जस्स
 आरेणं सब्बपाणेहिं जाव सत्तेहिं दंडे णिक्खित्ते, से जे से जीवे जस्स
 इयाणि सब्बपाणेहिं जाव सत्तेहिं दंडे णो णिक्खित्ते भवइ, परेणं असंजए
 आरेणं संजए, इयाणि असंजए, असंजयस्स णं सब्बपाणेहिं जाव सत्तेहिं
 दंडे णो णिक्खित्ते भवइ, से एवमायाणह ? णियंठा ! , से एवमायाणियव्वं
 २॥ भगवं च णं उदाहु णियंठा खलु पुच्छियव्वा—आउसंतो ! नियंठा इह
 खलु परिव्वाइया वा परिव्वाइआओ वा अन्नपरेहितो तित्थाययणेहितो
 आगम्म धम्मं सवणवत्तियं उवसंकमेज्जा ? हंता उवसंकमेज्जा, किं तेसिं
 तहप्पगारेणं धम्मे आइक्खियव्वे ? , हंता आइक्खियव्वे, तं चेव उवट्ठावित्तए
 जाव कप्पंति ? हंता कप्पंति, किं ते तहप्पगारा कप्पंति संभुंजित्तए ? हंता
 कप्पंति, तेणं एयारूवेणं विहारेणं विहरमाणा तं चेव जाव अगारं वएज्जा ? ,

हंता वएजा, ते णं तहप्पगारा कप्पंति संभुजित्तए ? णो इण्णट्ठे समट्ठे, से जे से जीवे जे परेणं नो कप्पंति संभुजित्तए, से जे से जीवे आरेणं कप्पंति संभुजित्तए, से जे से जीवे जे इयाणीं णो कप्पंति संभुजित्तए, परेणं अस्समणे आरेणं समणे, इयाणिं अस्समणे, अस्समणेणं सद्धिं णो कप्पंति समणाणं निग्गंथाणं संभुजित्तए, से एवमायाणह ? णियंठा !, से एवमायाणियव्वं ३॥ सूत्रं ७८ ॥ भगवं च णं उदाहु संतेगइया समणोवासगा भवंति, तेसिं च णं एवं वुत्तपुव्वं भवइ-णो खलु वयं संचाएमो मुंडा भवित्ता अगाराओ अणगारियं पव्वइत्तए, वयं णं चाउइसट्टमुद्धिट्टपुराणमासिणीसु पडिपुराणं पोसहं सम्मं अणुपालेमाणा विहरिस्सामो, थूलगं पाणाइवायं पच्चक्खाइस्सामो, एवं थूलगं मुसावायं थूलगं अदिन्नादाणं थूलगं मेहुणं थूलगं परिग्गहं पच्चक्खाइस्सामो, इच्छापरिमाणं करिस्सामो, दुविहं तिविहेरां, मा खलु ममट्टाए किंचि करेह वा करावेह वा तत्थवि पच्चक्खाइस्सामो, ते णं अभोच्चा अपिच्चा असिणाइत्ता आसंदीपेदीयाओ पच्चारुहित्ता, ते तहा कालगया किं वत्तव्वं सिया-सम्मं कालगतत्ति ?, वत्तव्वं सिया, ते पाणावि वुच्चंति ते तसावि वुच्चंति ते महाकाया ते चिरट्टिइया, ते बहुतरगा पाणा जेहिं समणोवासगस्स सुपच्चक्खायं भवइ, ते अप्पयरागा पाणा जेहिं समणोवासगस्स अपच्चक्खायं भवइ, इति से महयाओ जराणं तुब्भे वयह तं चेव जाव अयंपि भेदे से णो गेयाउए भवइ १॥ भगवं च णं उदाहु संतेगइया समणोवासगा भवंति, तेसिं च णं एवं वुत्तपुव्वं भवइ, णो खलु वयं संचाएमो मुंडा भवित्ता अगाराओ जाव पव्वइत्तए, णो खलु वयं संचाएमो चाउइसट्टमुद्धिट्टपुराणमासिणीसु जाव अणुपालेमाणा विहरित्तए, वयं णं अपच्छिममारणांतियं संलेहणाजूसणाजूसिया भत्तपाणं पडियाइक्खिया जाव कालं अणवकंखमाणा विहरिस्सामो, सव्वं पाणाइवायं पच्चक्खाइस्सामो जाव सव्वं परिग्गहं पच्चक्खाइस्सामो तिविहं तिविहेरां, मा खलु ममट्टाए किंचिवि

जाव आसंदीपेढियात्रो पच्चोरुहिता एते तहा कालगया, किं वत्तव्वं सिया संमं कालगयत्ति ?, वत्तव्वं सिया, ते पाणावि बुच्चंति जाव अयंपि भेदे से णो णोयाउए भवइ २॥ भगवं च रां उदाहु संतेगइया मणुस्सा भवंति, तंजहा—महइच्छा महारंभा महापरिग्गहा अहम्मिया जाव दुप्पडियारांदा जाव सव्वात्रो परिग्गहात्रो अप्पडिविरया जावजीवाए, जेहिं समणोवासगस्स आयाणसो आमरगांताए दंडे णिविखत्ते, ते ततो आउगं विप्पजहंति, ततो भुज्जो सगमादाए दुग्गइगामिणो भवंति, ते पाणावि बुच्चंति ते तसावि बुच्चंति ते मद्वाकाया ते चिरट्टिइया ते बहुयरगा आयाणसो, इति से महयात्रो रां जरां तुब्भे वदह तं चेव अयंपि भेदे से णो णोयाउए भवइ ३॥ भगवं च रां उदाहु संतेगइया मणुस्सा भवंति, तंजहा—अणारंभा अपरिग्गहा धम्मिया धम्माणया जाव सव्वात्रो परिग्गहात्रो पडिविरया जावजीवाए, जेहिं समणोवासगस्स आयाणसो आमरगांताए दंडे णिविखत्ते ते तत्रो आउगं विप्पजहंति ते तत्रो भुज्जो सगमादाए सोग्गइगामिणो भवंति, ते पाणावि बुच्चंति जाव णो णोयाउए भवइ ४॥ भगवं च रां उदाहु संतेगइया मणुस्सा भवंति, तंजहा—अप्पेच्छा अप्पारंभा अप्पपरिग्गहा धम्मिया धम्माणया जाव एगच्चात्रो परिग्गहात्रो अप्पडिविरया, जेहिं समणोवासगस्स आयाणसो आमरगांताए दंडे णिविखत्ते, ते तत्रो आउगं विप्पजहंति, ततो भुज्जो सगमादाए सोग्गइगामिणो भवंति, ते पाणावि बुच्चंति जाव णो णोयाउए भवइ ५॥ भगवं च रां उदाहु संतेगइया मणुस्सा भवंति, तंजहा—आरणिणया आवसहिया गामणियंतिया कराहुई रहस्सिया, जेहिं समणोवासगस्स आयाणसो आमरगांताए दंडे णिविखत्ते भवइ, णो बहुसंजया णो बहुपडिविरया पाणभूयजीवसत्तेहिं, अप्पणा सच्चामोसाइं एवं एवं विउंजंति (विप्पडिवेदंति) अहं ण हंतव्वो अन्ने हंतव्वा, जाव कालमासे कालं किच्चा अन्नयराइं आसुरियाइं किव्विसियाइं जाव उववत्तारो भवंति, तत्रो विप्पमुच्चमाणा

भुज्जो एलमुयत्ताए तमोरुवत्ताए पच्चायंति, ते पाणावि बुच्चंति जाव गो
 गोयाउए भवइ ६॥ भगवं च गां उदाहु संतेगइया पाणा दीहाउया जेहि
 समणोवासगस्स आयाणसो आमरणांताए जाव दंडे णिक्खित्ते भवइ, ते
 पुब्बामेव कालं करेति, करित्ता पारलोइयत्ताए पच्चायंति, ते पाणावि
 बुच्चंति ते तमावि बुच्चंति ते महाकाया ते चिरट्टिइया ते दीहाउया ते बहु-
 यरगा, जेहिं समणोवासगस्स सुपच्चम्भायं भवइ, जाव गो गोयाउए भवइ७॥
 भगवं च गां उदाहु संतेगइया पाणा समाउया जेहिं समणोवासगस्स आया-
 णसो आमरणांताए जाव दंडे णिक्खित्ते भवइ, ते मथमेव कालं करेति
 करित्ता पारलोइयत्ताए पच्चायंति, ते पाणावि बुच्चंति तमावि बुच्चंति ते
 महाकाया ते समाउया ते बहुयरगा जेहिं समणोवासगस्स सुपच्चस्वायं
 भवइ, जाव गो गोयाउए भवइ ८॥ भगवं च गां उदाहु संतेगइया पाणा
 अप्पाउया, जेहिं समणोवासगस्स आयाणसो आमरणांताए जाव दंडे
 णिक्खित्ते भवइ, ते पुब्बामेव कालं करेति करित्ता पारलोइयत्ताए पच्चायंति,
 ते पाणावि बुच्चंति ते तमावि बुच्चंति ते महाकाया ते अप्पाउया ते बहु-
 यरगा पाणा, जेहिं समणोवासगस्स सुपच्चस्वायं भवइ, जाव गो गोयाउए
 भवइ ९॥ भगवं च गां उदाहु संतेगइया समणोवासगा भवंति, तेसिं च गां
 एवं वुत्तपुव्वं भवइ-गो खलु वयं संचाएमो मुंडे भवित्ता जाव पव्वइत्तए,
 गो खलु वयं संचाएमो चाउहमट्टमुट्टिपुणामासिणीसु पडिपुगारां पोसहं
 अणुगालित्तए, गो खलु वयं संचाएमो अपच्छिद्रमं जाव विहरित्तए, वयं च
 गां सामाइयं देसावगासियं पुरत्था पाईसां वा पडिगां वा दाहिगां वा उदीगां
 वा एतावता जाव सव्वपाणेहिं जाव सव्वसत्तेहिं दंडे णिक्खित्ते सव्वपाणभू-
 यजीवसत्तेहिं खेमंकरे अहमंसि, तत्थ आरेगां जे तसा पाणा जेहिं समणो-
 वासगस्स आयाणसो आमरणांताए दंडे णिक्खित्ते, तथो आउं विप्पजहंति
 विप्पजहित्ता तत्थ आरेगां चेव जे तसा पाणा जेहिं समणोवासगस्स

आयाणसो जाव तेसु पच्चायंति, जेहिं समणोवासगस्स सुपच्चक्खायं भवइ, ते पाणावि जाव अयंपि भेदे से णो गोयाउए भवइ १० । सूत्रं ७६॥ तत्थ आरेणं जे तमा पाणा जेहिं समणोवासगस्स आयाणसो आमरणांताए दंडे णिक्खित्ते ते तत्रो आउं विप्पजहंति विप्पजहिता तत्थ आरेणं चव जाव थावरा पाणा जेहिं समणोवासगस्स अट्टाए दंडे अणिक्खित्ते अणट्टाए दंडे णिक्खित्ते तेसु पच्चायंति, तेहिं समणोवासगस्स अट्टाए दंडे अणिक्खित्ते अणट्टाए दंडे णिक्खित्ते ते पाणावि बुच्चंति ते तसा ते चिरट्टिइया जाव अयंपि भेदे से णो गोयाउए भवइ १ ॥ तत्थ जे आरेणं तसा पाणा जेहिं समणोवासगस्स आयाणसो आमरणांताए दंडे निक्खित्ते तत्रो आउं विप्पजहंति विप्पजहिता तत्थ परेणं जे तसा थावरा पाणा जेहिं समणोवासगस्स आयाणसो आमरणांताए दंडे निक्खित्ते ते जाव तेसु पच्चायंति, तेहिं समणोवासगस्स सुपच्चक्खायं भवइ, ते पाणावि जाव अयंपि भेदे से णो गोयाउए भवइ २ ॥ तत्थ जे आरेणं थावरा पाणा जेहिं समणोवासगस्स अट्टाए दंडे अणिक्खित्ते अणट्टाए निक्खित्ते ते तत्रो आउं विप्पजहंति विप्पजहिता तत्थ आरेणं चव जे तसा पाणा जेहिं समणोवासगस्स आयाणसो आमरणांताए जाव तेसु पच्चायंति तेसु समणोवासगस्स सुपच्चक्खायं भवइ, ते पाणावि जाव अयंपि भेदे से णो गोयाउए भवइ ३ ॥ तत्थ जे ते आरेणं जे थावरा पाणा जेहिं समणोवासगस्स अट्टाए दंडे अणिक्खित्ते अणट्टाए णिक्खित्ते, ते तत्रो आउं विप्पजहंति विप्पजहिता ते तत्थ आरेणं चव जे थावरा पाणा जेहिं समणोवासगस्स अट्टाए दंडे अणिक्खित्ते अणट्टाए णिक्खित्ते तेसु पच्चायंति, तेहिं समणोवासगस्स अट्टाए अणट्टाए ते पाणावि जाव अयंपि भेदे से णो गोयाउए भवइ ४॥ तत्थ जे ते आरेणं थावरा पाणा जेहिं समणोवासगस्स अट्टाए दंडे अणिक्खित्ते अणट्टाए णिक्खित्ते तत्रो आउं विप्पजहंति विप्पजहिता तत्थ परेणं जे तसा थावरा पाणा जेहिं समणोवासगस्स

आयाणसो आमरणांताए जाव तेसु पच्चायंति तेहिं समणोवासगस्स सुपच्च-
 क्खायं भवइ, ते पाणावि जाव अयंपि भेदे से णो गेयाउए भवइ ५॥ तत्थ
 जे ते परेणं तसथावरा पाणा जेहिं समणोवासगस्स आयाणसो आमरणांताए
 जाव ते तत्रो आउं विप्पजहति विप्पजहत्ता तत्थ आरेणं जे तसा पाणा जेहिं
 समणोवासगस्स आयाणसो आमरणांताए जाव तेसु पच्चायंति, तेहिं समणो-
 दासगस्स सुपच्चक्खायं भवइ, ते पाणावि जाव अयंपि भेदे से णो गेयाउए भवइ
 ६ ॥ तत्थ जे ते परेणं तसथावरा पाणा जेहिं समणोवासगस्स आयाणसो आम-
 रणांताए जाव ते तत्रो आउं विप्पजहंति विप्पजहत्ता तत्थ आरेणं जे थावरा
 पाणा जेहिं समणोवासगस्स अट्टाए दंडे अणिक्खित्ते अणट्टाए णिक्खित्ते
 तेसु पच्चायंति, जेहिं समणोवासगस्स अट्टाए अणिक्खित्ते अणट्टाए
 णिक्खित्ते जाव ते पाणावि जाव अयंपि भेदे से णो गेयाउए भवइ ७ ॥
 तत्थ ते परेणं तसथावरा पाणा जेहिं समणोवासगस्स आयाणसो आमर-
 णांताए जाव ते तत्रो आउं विप्पजहंति विप्पजहत्ता ते तत्थ परेणं चैव जे
 तसथावरा पाणा जेहिं समणोवासगस्स आयाणसो आमरणांताए जाव तेसु पच्चा-
 यंति, जेहिं समणोवासगस्स सुपच्चक्खायं भवइ, ते पाणावि जाव अयंपि भेदे से
 णो गेयाउए भवइ ८ ॥ भगवं च णं उदाहु णं एतं भूयं ण एतं भव्वं ण एतं
 भविस्संति जराणं तसा पाणा वोच्छिज्जिहिंति थावरा पाणा भविस्संति, थावरा
 पाणावि वोच्छिज्जिहिंति तसा पाणा भविस्संति, अवोच्छिन्नेहिं तसथावरेहिं
 पाणेहिं जराणं तुब्भे वा अन्नो वा एवं वदह-णत्थि णं से केइ
 परियाए जाव णो गेयाउए भवइ ९ ॥ सूत्रं ८० ॥ भगवं च णं उदाहु
 आउसंतो ! उदगा जे खलु ममणं वा माहणं वा परिभासेइ मित्ति मन्न्ति
 आगमिन्ता णाणं आगमिन्ता दंसणं आगमिन्ता चरित्तं पावाणं कम्माणं
 अकरणायाए से खलु परलोगपलिमंथत्ताए चिट्ठइ, जे खलु समणं वा माहणं
 वा णो परिभासेइ मित्ति मन्न्ति आगमिन्ता णाणं आगमिन्ता दंसणं

२५४]

[श्रीमदागमसुधासिन्धुः :: प्रथमो विभागः

पिया ! मा पडिबंधं करेहि, तए रां से उदए पेढालपुत्ते समणस्स भगवत्त्रो
महावीरस्स अंतिए चाउज्जामात्त्रो धम्मात्त्रो पंचमहव्वइयं सपडिक्कमरां धम्मं
उवसंपज्जित्ता रां विहारइ त्तिबेमि ६ ॥ सूत्रं ८१ ॥ इति नालंदइज्जं सत्तमं
अज्झयरां समत्तं । इति सूयगडांगवीयसुयक्खंधो समत्तो ॥ग्रंथाग्रं० २१००॥

+ इति सप्तममध्ययनम् ॥२७॥ इति द्वितीयः श्रुतस्कन्धः ॥२॥

इति द्वितीयं सूत्रकृताङ्गम् ॥२॥



EXHIBIT

विभ
श्री